

2ሳሜላ ማጽፋ ጊደ ቆፋ

ናሞአንሉ ሳሜላ ማጽፋይ ኮይሮ ሳሜላ ማጽፋቴ ካሊዛይሳ ጊዲሺን ዳዊቲ ኮይሮ ዲጌሃ ባጋራ ዩሁዳ ካዎ [1-4]፤ ጉላራ ጋሞኢሼ ፑዴሃ ባጋራ ዲዛ ኢሰራኤልካ ጉጂዲ ዴሬ ኡባስ ካዎ ጊዲዲ ሃሪዳይሳ ዮቲዛ ታሪኬ [5-24]። ማጽፋዚ ዳዊቲ ባ ካዎቲላ ኣሳናሲኔ ባ ማታ ሚንፋናስ ዴራ ጊደኒኔ ዴራፔ ካሬራ ዲዛ ሞርኬታራ ኢዚ ባጸቲዳ ሚኖ ባጼ ፓቲ ዮቴስ። ዳዊቲ ኣማኖን ሚኖኔ ጸሳ ሲቂዛዴ፤ ሄሳቶካ ዴሬዛ ኣቻን ኣማኔቲዳዴ ጊዲዳይሳ ቆንጨሴስ፤ ሃራይካ ኢዚ ኢሲ ኢሲ ዎዴ ሜንጾ ኢታ ኦሶ ኦሴዛይሳኔ ባ ኣሾ ኣሞ ፖላናስ ዳሮ ኢታ ናጋራ ኦሴዳይሳ ፓቲ ዮቴስ። ጊዲኮካ ጸሳ ናቤ ናታኔይ ኢዛኮ ሺቂዲ ኢዚ ኦሴዳ ናጋራ ኢዛ ኤሪሲን ኢዚ ባ ናጋራ ፓጺዲ ጸሲ ኢዛስ ኢሚዳ ቂጸቲዛ ኤኪዴስ።

ዳዊቲ ዴኦይኔ ኢዚ ኦሴዳ ኦሶይ ኢሰራኤል ኣሳ ዳሮ ሎኢዳ ጊሻስ ኢዛፔ ካሊዛ ዎዴታን ዴራ ቦላ ሜቶይ ጋኪሺን ጋኪሺን ኢስቲ ባንታስ ሃራ ካዎፋናስ ኮይዛ ዎዴ፤ ዳዊቲ ና ዎይኮ ዳዊቲ ዛሬ ጊዲዲ ዳዊቲ ማላ ኣይሲዛ ኣስ ዴማናስ ኣሞቴቲስ።

ሃ ማጽፋይ ኦይኪዳ ኩሜላ ቆፋ

ዩሁዳን ዳዊቲ ካዎቲላ 1:1—4:12

ኩሜላ ኢሰራኤልን ዳዊቲ ካዎቲላ 5:1—24:25

ኢዛስ ኮይሮ ካዎቲላ ላይላታ 5:1—10:19

ዳዊቲኔ ቤርሳቤሆ 11:1—12:25

ሜቶኔ ዋዬ 12:26—20:26

ዉርሴላ ላይላታ 21:1—24:25

ዳዊቲ ሳኦሌ ሃይቆ ሲስ

¹ ሳኦሌ ሃይቂዳፔ ጉዬ ዳዊቲ ኣማሌቂ ኣሳ ኦሊ ጸኒዲ ሲሚዴስ፤ ጸጊላጌንካ ናሞኡ ጋላስ ጋሞኢዴስ።

² ሄሻንሉ ጋላስ ዳኬቲዳ ማይኦ ማይኢዲ ባ ሁኤ ቦላ ጉዲላ ላሊዲ ኢሲ ናቲላ ና ዳይሲ ሳኦሌ ጉታፔ ዩዴስ። ዳዊቲኮ ጋኪዳ ማላ ዛቆልላ ዚርጺ ጊዲ ቦንቸስ ኩሺ ዴንሳዴስ።

³ ዳዊቲካ ኢዛ፤ «ኔ ኣሞፔ ያዲ?» ጊዲ ኦይቸዴስ።

ኢዚ ቃሴ፤ «ታኒ ኢሰራኤል ኣሳይ ዲዛሶፔ ኬሳ ኤካ ያዲስ» ጊዴስ።

4 ዳዊቲ ቃሴ ኢዛ፡ «አዜ ዋኒዳይ ኣኔ ታሰ ኡባ ዮታ» ጊዲ ኦይቺዴሰ።

ኢዚካ ዳዊቲሰ፡ «አሳዚ ኦላሶፕ ባቃቲዴሰ፤ ዳርይ ኩንዲዴሰ፤ ሳኦሊኔ ኢዛ ና ዮናታኔይ ሃይቂዳ» ጊዴሰ።

5 ሄሳፌ ጉዬ ዳዊቲ ዋሬዛ ኢዛሰ ዮቲዳ ናዛ፡ «ሳኦሊኔ ኢዛ ና ዮናታኔይ ሃይቂዳይሳ ኣዛን ኤራዲ?» ጊ ኦይቺዴሰ።

6 ዋሬዛ ኢዛሰ ዮቲዳ ናቴላ ናዚ ኢዛሰ ዛሪዲ፡ «ቶሮንታ ዳሼ ታኒ ፑዴ ጊልቦኣ ዙማ ቦላ ኬዛዲሰ፤ ሳኦሊ ሄን ባ ቶራ ቦላ ዜምፕ ዲሺን ፓራ-ጋሬቲኔ ቶጋ ኣሳይ ጎዴሬሊሼ ኢዛ ቦላ ጋኪ ዋዲዳ።

7 ኢዚካ ጉዬ ሲሚ ዴሊዲ ታና ቤኢዲ ዴይጊዴሰ፤ ታኒካ፡ «ታ ኔሰ ኣይ ኦላ?» ጋዲሰ።

8 «ኢዚካ ታና፡ «ኔ ኦኔ?» ጊ ኦይቺዴሰ። ታኒካ ኢዛሰ፡ «ታኒ ኣማሌቄ ኣሳ» ጋዲ ዮታዲሰ።

9 «ኢዚካ ታሰ፡ «ታ ሃይቃናሰ ቶቃይሰ፤ ጊዶ ኣቲን ታሰ ሸምፖይ ኬዘንታ ኢዲዴሰ፤ ዛይ ሃ ያ፤ ታና ሸምፕሳ» ጊዴሰ።

10 ሂሰቲን ታኒ ኢዚ ኩንዲቺዳፕ ጉዬ ኣቶንታይሳ ኤራዳ ታ ኢዛኮ ሸቃዳ ኢዛ ዋዲዴሰ። ኢዛ ሁኤ ቦላ ዲዛ ካላቻዛኔ ኢዛ ቄሴ ሳጋዮዛ ኤካዳ ሄኮ ታ ጎዳሰ ኤሃዲሰ» ጊዴሰ።

11 ሄሳፌ ጉዬ ዳዊቲኔ ኢዛራ ዲዛ ኣሳይ ኡባይ ባንታ ማይኦ ዳኪዳ።

12 ኢሰቲ ማሻን ሲፌቲዳ ጊሻሰ ሳኦሊኒኔ ኢዛ ና ዮናታኔሰ፡ ጎዳ ኦላንቻታሲኔ ኩሜላ ኢሰራኤሌ ኣሳሰ ካዮቲዳ፡ ዬኪዳኔ ኦማርሰ ጋካናሰ ጾሚዳ።

13 ዳዊቲ ቃሴ ሄ ዋሬዛ ኢዛሰ ኤሂዳ ናቴላዛ፡ «ኔ ኣዋፔ ያዲ?» ጊ ኦይቺዴሰ። ናዚካ፡ «ታኒ ኔ ዴሬን ቤቲ ዲዛ ኣማሌቄ ኣሳ ና» ጊዴሰ።

14 ዳዊቲ ቃሴ፡ «ሂሰቲን ኔኒ ጎዳይ ቲይዳይሳ ዳይሳናሰ ኔ ኩሼ ዋና ጸላ ዴንላዲ?» ጊ ኦይቺዴሰ።

15 ሄሳፌ ጉዬ ዳዊቲ ናቴላታፕ ኢሳ ዴይጊዲ፡ «ኔኒ ኢዛኮ ሸቃዳ ኢዛ ዋዲ» ጊዴሰ። ሄ ናቴላዚ ኣማሌቄዛ ጫዲ ዋዲዴሰ።

16 ዳዊቲካ ኣማሌቄዛ፡ « ጎዳይ ቲይዳይሳ ታኒ ዋዲዴሰ» ጋዲ ኔ ቦላ ኔርካ ኔ ማርካቲዳ ጊሻሰ ኔ ሱላ ጎሜይ ኔ ቦላ ጊዶ!» ጊዴሰ።

ሳኦሊ ጊሻሲኔ ዮናታኔ ጊሻሰ ሸቂዳ ዚላሳ ጊንጾ

17 ዳዊቱ ሳኦሌ ገሻሲኔ ዮናታኔ ሃይቆ ገሻሰ ዚላሊሼ ዩኪደሰ።

18 ቃሴካ፥ «ዋንዳፌ ሚላሰ» ጌቴቲዛ ዚላሳ ዩሁዳ ዴራ ታማርሳና ማላ ኣዛዚደሰ። ሄሲ ያሻሬ ማጻፋን ጸፊቲ ኡቲደሰ።

19 «ሃይሶ ኢሰራኤል!
ኔ ቦንቾይ ዙሞቡላታ ቦላ
ጫዴቲ ሃይቂደሰ፤
ኦላ ቃራቲ ዋኒ
ሃይሳሉ ኩንዲዶ!

20 «ፊሊስጶሜ ማጫ ናይቲ
ኡፋዬቶንታ ማላ፥
ቃጸሬቶንታ ኣሳ ማጫ ናይቲ
ኢሊሎንታ ማላ፥
ሃይሳ ጌቴን ዋሬሶፒቲ፤
ኣሰቄሎናንካ ኣዋጀፍቲ።

21 «ኢንቴኖ ገልቦኣ ዙማቶ!
ኢንቴ ቦላ ኢራይ ቡኮፎ፤
ጸዛይካ ኢንቴ ቦላ ዶፖ፤
ያርሾሰ ገዲዛ ካሉ
ኢንቴ ጎሻ ቢታን ሞኮፎ።
ሄን ኦላ ቃራዛ
ጎንዳሌይ ቱኒደሰ፤

ሳኦሌ ጎንዳሌይ
ሃይሳፌ ጉዬን
ዛይቴን ቁጩቴና።
22 ዮናታኔ ዋንዳፌይ
ዋጾንታ ሲሚ ኤሬና፤
ሳኦሌ ማሻይካ
ሞርኬ ቃንጾሬሉ ዩጌሰ፤
ዋልቃማታካ
ሜንሔሬሉ ዩጌሰ፤
ኢዛ ሞርኬታካ ዋጺደሰ።

23 «ሳኦሊኔ ዮናታኔይ

ሹምፖራ ፓጾ ዲሼ
 ሲቄቲዛይታኔ ቆፋን ጋይቲዛይታ።
 ሃይቂሼካ ሻኬቶንታይታ፤
 ጎሌ ካፎፔ ፒላቲዛይታ፤
 ጋሞፊካ ሚኒዛይታ።

- 24 «ኢንቴኖ ኢስራኤል ማጫሳቶ!
 እቻ ቴራ ሚሳቲዛ አልኦ
 ቃሚሳ ኢንቴና ማይዚዳ፤
 ኢንቴ ማይኦዛ ዎርቃ
 ጸባቤን አሌቂሲዳ፤
 ሳኦሌስ ዬከቴ።

- 25 «ኦላ ቃራቲ
 ዋኒ ሃይሳ ማላ ኦላሶን ኩንዲዶ!
 ዮናታኔይ ኔ ዙሞቡላታ ቦላ
 ጫዴቲ ሃይቂዴስ።

- 26 ታ ኢሻ ዮናታኔ!
 ታኒ ኔ ጊሻስ ካዮታዲስ፤
 ኔ ታስ ኬሃ አልኦኮሺን፤
 ኔ ሲቆይ ታና
 ማላሊሲዛዛኮሺን
 ማጫ ሲቆፔካ ኬሂ
 ኦጄሰኮሺን።

- 27 «ኦላ ቃራቲ ዋኒ ኩንዲዶ!
 ኦላ ማሳራቲካ ዋኒ
 ሃዳ ጊዳኔ!»

2

ዩሁዳን ዳዊቲ ካዎቴል

- 1 ሄሳፌ ጉዬ ዳዊቲ፥ «ታኒ ዩሁዳ ካታማታፔ ኢሲኔይን ቦ?»
 ጊዲ ጎዳ ኦይቺዴስ።
 ጎዳይካ፥ «ኤ ባ» ጊዴስ።
 ዳዊቲ ዛሪዲ፥ «ካታማታፔ
 አዋሪን ቦ?» ጊ ኦይቺዴስ።
 ጎዳይ ቃሴ፥

«ኩብሮን ባ» ጌዴሰ።

² ሂሰቲን ዳዊት ባ ማቼታ ናምኣታራ ኩብሮን ቢዴሰ። ኢሰቲካ ኢዘራኤልን ዩሌቲዳ ኣሂናሆሞን ቃርሜሎሴ ዴሬ ኣሰ ሃይቂዳ ናባሌ ማቾ ኣቢጋሎ።

³ ሄሳዳካ ዳዊት ባናራ ዲዛ ኣሳ ኢሰታሶ ኣሳራ ኢሲፌ ጋሊ ኤሂዴሰ። ኢሰቲካ ኩብሮን ካታማታን ኡቲዳ።

⁴ ሄሳፌ ጉዬ ዩሁዳ ኣሳይ ኩብሮን ዩዴሰ። ሄን ዳዊቱ ቲይዲ ዩሁዳ ዴራ ቦላ ካዎሊዳ።

ጋላኣዴ ዴሬን ያቡሴ ኣሳይ ሳኦሌ ኣሃ ሞጊዳይሳ ዳዊቱሰ ዮቲን፤

⁵ ኢዚካ ጋላኣዴን ያቡሴ ዴሬ ኣሳሰ ሄሳ ኢዛሰ ዮታና ማላ ቃሰታኔ ኣሰ ዩዲዲ፤ «ሃይሳ ማላ ኦሊዲ ኢንቲ ጎዳ ሳኦሌ ሞጊዲ ኢንቲ ሎኤቱላ ቤሲዳ ጊሻሰ ጎዳይ ኢንቲና ኣንጆ።

⁶ ሃኢካ ጎዳይ ኢንቲሰ ባ ሚኖ ሲቆኔ ኣማኔቱላ ቆንጨሶ፤ ኢንቲ ኦሊዳ ሎኤቱላ ጊሻሰ ታኒካ ኢንቲሰ ሎኦ ሚሽ ኦፋና።

⁷ ሄሳ ጊሻሰ ሚኒቲ፤ ጎቢቲ፤ ኢንቲ ጎዳይ ሳኦሊ ሃይቂዳ ጊሻሰ ዩሁዳ ኣሳይ ታና ቲይዲ ባ ቦላ ካዎሊዴሰ» ጌዴሰ።

ኢሰራኤሌ ኣሳ ቦላ ኢያቡሰቲ ካዎቱላ

⁸ ሄ ዎዴ ሳኦሌ ኦላ ኣሳ ኣዛዚዛ ኔሬ ና ኣቢኔሪ ሳኦሌ ና ኢያቡሰቲ ኤኪዲ ማሃናይሜ ፒንሊዴሰ።

⁹ ኢዛካ ጋላኣዴ፤ ኣሴሬ፤ ኢዘራኤሌ፤ ኤፍሬሜ፤ ቢኒያሜ ቦላኔ ኩሚሳ ኢሰራኤሌ ቦላ ካዎሊዴሰ።

¹⁰ ሳኦሌ ና ኢያቡሰቲይ ኢሰራኤሌ ቦላ ካዎቲሺን ኢዛሰ ላይላይ ኦይዲ ታሙ፤ ኢዚ ናምኡ ላይላ ሃሪዴሰ። ዩሁዳ ኣሳይ ጊዲኮ ዳዊቱ ካሊዴሰ።

¹¹ ዳዊት ኩብሮንን ኡቲዲ ኢሰራኤሌ ኣሳ ላፑን ላይሊኔ ኡሱፑን ኣገና ሃሪዴሰ።

ኢሰራኤሌሲኔ ዩሁዳሰ ጊዶን ዴንዲዳ ኦላ

¹² ኔሬ ና ኣቢኔሪ ሳኦሌ ና ኢያቡሰቲ ኦሳንቻታራ ኢሲ ቦላ ማሃናይሜፔ ዴንዲዲ ጌባኦኔ ቢዳ።

¹³ ኢሰታካ ጸሪያ ና ኢዮኣቤይኔ ዳዊቱ ኣሳቲ ኬኢዲ ጌባኦኔ ኤሌ ሃላ ኣቻን ጋይቲዳ። ኢሲ ባጋይ ሃላፌ ሄ ፒንላን፤ ባጋይ ሃላፌ ሃ ፒንላን ኡቲዳ።

¹⁴ ሄሳፌ ጉዬ ኣቢኔሪ ኢዮኣቤሰ፤ «ኣኔ ኦ ባጋፌኔ ኢንቲ ባጋፌ ናቱላ ናይቲ ዴንዲዲ ኦ ሲንላን ኦላ ቲራን ጋይቲቶ» ጌዴሰ።

ኢዮኣቤይ፤ «ኤሮ ጋይቲቶ» ጌዴሰ።

15 ሄሳ ገሻሰ ቢኒያሜ ባጋፌ ኢያቡስቴስ ታማኔ ናምኡ አሲ ቆዴቲዳስ። ዳዊቱ ባጋፌካ ታማኔ ናምኡ አሲ ቆዴቲዳስ።

16 ሄሳፌ ጉዬ ኢሶይ ኢሶይ ባ ሞርኬ ሁኤ ኦይኪዲ ማሻን ሚሌራ ጫዲሽ ኢሲፌ ኦይኬቲ ኩንዲዳ። ሄሳ ገሻሰ ጌባኦኔን ዲዛ ሄ ቢታዚ፡ «ማሻ ቢታ» ጌቲቲዳስ።

17 ሄ ጋላሳ ኦላይ ኬሂ ዴጾ፤ አቢኔሪኔ ኢሰራኤል አሳይ ዳዊቱ አሳን ጸኔቲዳ።

18 ጹሪያ አቱማ ና ሄሻቲ ኢዮኣቤይ፤ አቢሳዬይኔ አሳሄሌይ ሄን ዴቴስ። አሳሄሌይ ዋራን ዲዛ ጌኔሳ ማላ ዋላስ ፒላታ።

19 ኢዚ አቢኔሪ ኦይካናስ ሃዲርስ ኡሻች ጎንታ ኢዛ ጌዶራ ካሊዳስ።

20 አቢኔሪ ጉዬ ሲሚ ጴሊዲ፤ «አሳሄሌ! ኔኔ!» ጌ ኦይቸዳስ። ኢዚካ፤ «ኤ ታናኮ!» ጌ ዛሪዳስ።

21 ሂስቲን አቢኔሪ ኢዛ፤ «ኔኒ ታ ጌዶፔ ሃዲርሳ ባጋ ዋይኮ ኡሻቻ ባጋ ሲማዳ ናቴላ ኢሳፌ ኢዛ ኦላ ማሳራ ቦንቃ ኤካ» ጌዳስ። ጌዶ አቲን አሳሄሌይ ካሌቲዲ ኢዛ ጌዶፔ ዱጸንታ ኢጺዳስ።

22 ቃሴካ አቢኔሪ ኢዛስ፤ «ኔ ታ ጌዶ ካሌቲዛይሳ አጊኮ ኔስ ሎኦ፤ ታኒ ኔና አይስ ቢታራ ኦይሴዳ? ሂስቲዳ ታኒ ኔ አሻ ኢዮኣቤ ኣይፌሶ ቶቁ ጋዳ ዋስታ ጴሎ?» ጌዳስ።

23 አሳሄሌይ ጌዲኮ ኢዛ ካሌቴላ አጊቤና፤ ሄሳ ገሻሰ አቢኔሪ ባ ቶራ ጴራን ኢዛስ ኡሎን ጫዲን ቶራዚ ኢዛስ ዘኮዛራ ካንሉ ኬዚዳስ። አሳሄሌይ ሄን ጋዴ ቦላ ኩንዲዳ ማላ ሄራካ ሃይቂዳስ። ኦኒካ አሳሄሌይ ኩንዲ ሃይቂዳሶ ጋኪሽ ኤቂ ኤኬስ።

24 ኢዮኣቤይኔ አቢሳዬይ ጌዲኮ አቢኔሪ ካሌቲዳ፤ ኢዛ ጎዴሬሊሽ ጌባኦኔ ባዞ ኤፊዛ ኦጌዛራ ኣዬ ማታን ዲዛ ኣማ ዙምቡላ ሄራ ጋኪሽን ኣርሽይ ወሊዳስ።

25 ሄሳፌ ቢኒያሜ አሳይ አቢኔሪኮ ሸቂዲ ዙምቡላዛ ጴራን ኢሲኖ ጌዲዲ ሳልፊዳስ።

26 አቢኔሪ ኢዮኣቤ ጴይጊዲ፤ «ኦኒ ሜርናስ ኦላ ኦሌቲሽ ዳኔ? ኢዛስ ወርሴላ ጋቲይ ጫሞ ጌዲዳይሳ ኔ ዋናዳ ኤርንታ አጋዲ? ኔ አሳይ ባ አሻታ ጎዲዛይሳ አጋና ማላ ኔ ኢስታስ ኣዛዘ ኢሞንታይ ኣዉዴ ጋካናሴ?» ጌዳስ።

27 ኢዮኣቤይካ ዛሪዲ፤ «ዴኦ ጸሳይ ቤዪን፤ ኔ ሃይሳ ዮቶንታ አጊዳኮ አሳይ ዋንታና ጋካናሽ ባ አሻታ ጎዶ አጌና» ጌዳስ።

28 ሄሳፌ ጉዬ ኢዮኣቤይ ባ ዛዬ ፑኒዳስ፤ አሳይካ ኡባይ ኢሰራኤል ጎዲዛይሳ አጊዳስ። ኦላዚ ሄሳን ኤቂዳስ።

29 አቢነሪኔ ኢዛ አሳይ ኦማርሳራ አራቤራ ካንሏ ቢዳ፤ ሄፔ ዮርዳኖሴ ሻፋ ፒኒዲ ኡባይካ ቢተሮኔራ ካንሏ ማሃናይሜ ዪዳ።

30 ሄሳፌ ጉዬ ኢዮኣቤይ አቢነሪ ጎዲዛይሳ አጊ ሲሚዲ ኢዚ ዴሬዛ ሺሺዳ ዋዴ ዳዊቲ አሳ ጊደፌ አሳሄሌይ አቲን ሃራይ ታማኔ ኡዱፉን አሲ ዳይዳይሲ ኤሬቲዳሰ።

31 ዳዊቲ አሳይ ጊዲኮ ቢኒያሜ አሳፔ አቢነሪ ካሊዛ 330 አሰ ዋዲዳሰ።

32 ኢዮኣቤይኔ ኢዛራ ዲዛ አሳይ አሳሄሌይ ኩንዲዳሶሆፔ ኢዛ አሃ ዴንሏዲ ቤቲሊሄሜን ኢዛ አዋ ዱፎን ሞጊዳ። ሄሳፌ ጉዬ ኦማርሰ ኩሜላ ሄሜቲሼ አቁዲ ቡሮ ጋዴይ ዋንቲሺን ኬብርኔ ከዚዳ።

3

1 ሳኦሌ ኬላ ጊደኒይ ዳዊቲ ኬላ ጊደን ዲዛ ኦላይ ዳሮ ዋዴ ጋምኢዳሰ፤ ዳዊቲ ባጋይ ሚኒ ሚኒ ቢሺን ሳኦሌ ባጋይ ዳቡሪ ዳቡሪ ቢዳሰ።

2 ዳዊቲ ኬብርኔን ዲሺን ኢዛሰ ኡቡፑን አቱማ ናይቲ ዬሌቲዳ፤ ኢዛሰ ባይራ ናዚ ኢዝራኤሌ ዴሬ አሰ አሂናሆሞፔ አሚኖኔይ ዬሌቲዳሰ።

3 ናምኣንሶ ናዚ ቃርሜሎሴ ዴሬ አሰ ናባሌ ማቾ አቢጋሊፔ ኪልኣቤይ ዬሌቲዳሰ፤ ሄሻንሶ ናዚ ጌሹሬ ካዋ ታለማዬ ቢዮ ማኢኪፔ አቤሴሎሜይ ዬሌቲዳሰ።

4 ኦይዳንሶ ናዚ አዶኒያሲ ሃጊቲፔ ዬሌቲዳሰ፤ ኢቻሻንሶ ናዚ ሻፋጺያይ አቢጸሊፔ ዬሌቲዳሰ፤

5 ኡቡፑንሶ ናዚ ዳዊቲ ማቾ ኤግሊፔ ዪቲራሜይ ዬሌቲዳሰ፤ ሃይቲ ዳዊቲ ኬብርኔን ዲሺን ኢዛሰ ዬሌቲዳይታ።

አቢነሪኔ ዳዊቲ ኢሲፌቲላ

6 ሳኦሌ ኬሊኔ ዳዊቲ ኬሊ ኦሌቲሼ ዲዛ ዋዴ አቢነሪ ሳኦሌ ኬላን ባ ዋልቃ ሚንሏሼ ዳሰ።

7 ሳኦሊ አያ ቢዮ ኤርጺፎ ላጌሶ ኦይኪዳሰ፤ ኢያቡሰቲይ አቢነሪ፥ «ኔ አይሰ ታ አዋ ላጌሶይራ አቃዲ?» ጊዳሰ።

8 አቢነሪ ኢያቡሰቲ ሃሳያን ኬሂ ሃንቄቲዳ ጊሻሰ፥ «ዩሁዳ ማዳናሰ ታኒ ገሻ ካኔ? ሃቾ ጋካናሰ ታኒ ኔ አዋ ሳኦሌ ኬላሰ፥ ኢዛ አሻታሲኔ ኢዛ ዳቦታሰ ታ አማኔቲላ ፓጪንቻቤኬ፤ ኔናካ ዳዊቲሰ አሳ አማቤኬ፤ ጊዶ አቲን ኔኒ ሃኢ ሃኖ ሃ ማጫሳይራ ታ ሃኒዳ ሚሻሰ ታና ሞታይ?

9-10 ጎዳይ ሳኦሌ ከላፌ ካዎቲላ ዋሊ ኤኪዲ ዳኔፔ ቢዲ ቤርሳቤሄ ጋካናሰ ዲዛ ኢሰራኤሌ ቦላኔ የሁዳ ቦላ ዳዊቲ ካዎቲላ ጫቂ ዋሊዳ ጫቆዛ ታ ፖሎንታ ኣጊኮ ጸሲ ኣቢኔሬ ቦላ ኢታ ሚሽ ኤሆ» ጊዴሰ።

11 ኢያቡሰቲይ ኣቢኔሬሰ ኬሂ ባቢዳ ጊሻሰ ዛሪዲ ኢሲ ቃላ ጸቓናሰ ዳንዳይቤና።

12 ሄሳፌ ጉዬ ኣቢኔሬ ዳዊቲሰ፡ «ሃና ቢታያ ኦናሴ? ታናራ ቃላ ጌላ፤ ቤኣ ኢሰራኤሌ ኡባይ ኔኮ ሲማና ማላ ታ ኔና ማዳና» ጊ ዮታና ማላ ኦጋል ዬዲዴሰ።

13 ዳዊቲካ፡ «ኤሮ ሎኦ፤ ታ ኔናራ ቃላ ጌላና፤ ጊዶ ኣቲን ታ ኔፔ ኢሲ ሚሽ ኮያይሰ፤ ሄሲካ ኮይሮ ታኮ ያሼ ሳኦሌ ቢዮ ሚልኮሎ ኔ ታሰ ኤካ ያና ማላ ኮያይሰ፤ ሂሰቶንታ ኣጊኮ ታኮ ዮፓ» ጊዴሰ።

14 ሄሳፌ ጉዬ ዳዊቲ፡ «ፊሊሰጾሜ ኣሰ ጴታታ ኣቱማቲላ ጪሎሻ ጪጋዳ ኤኪዳ ታ ማሻ ሚልኮሎ ታሰ ኢማ» ጊዲ ሳኦሌ ና ኢያቡሰቲኮ ባ ቃሰታኔታ ኪቲዴሰ።

15 ሄሳ ጊሻሰ ኢያቡሰቲይ ባ ቃሰታኔታ ኪቲዲ ኢዚ ኣዚና ላይሻ ና ፓልቲኤሌሶፔ ኬሲ ኤኪዴሰ።

16 ኢዚ ኣዚናይ ባሂሪማ ጋካናሰ ዬኪሼ ኢዞ ካሊ ቢዴሰ። ሄሳፌ ጉዬ ኣቢኔሬ፡ «ሃኢ ኔሰ ጊዳና! ጉዬ ኔሶ ሲማ» ጊዴሰ።

17 ኣቢኔሬ ኢሰራኤሌ ጪማታራ ዞሬቲሼ ኢሰታሰ፡ «ካሴ ኣፋዳ ዋዴን ዳዊቲ ኢንቲ ቦላ ካዎታና ማላ ኮዬዴታ።

18 ጎዳይ ዳዊቲሰ፡ «ታ ኣይሌ ዳዊቲ ባጋራ ታኒ ታ ዴራ ኢሰራኤሌ ኢሰታ ሞርኬታ ኩሼፔኔ ፊሊሰጾሜታ ኩሼፔ ኣሻና ጊዛ ሂዶታ ቃላ ኢሚ ዋሊዳ ጊሻሰ ሃይሳ ኢንቲ ሃኢራ ኦሊቲ» ጊዴሰ።

19 ሄሳላካ ኣቢኔሬ ቢኒያሜ ቆሞታሰ ባርካ ቢዲ ሃይሳ ዮቲዴሰ፤ ሄሳፌ ጉዬ ኢሰራኤሌ ኣሳይ ቢኒያሜ ኬላ ኣሳይ ኡባይ ኦላናሰ ኮዬዳ ኡባ ዳዊቲሰ ዮታናሰ ኬብርኔ ቢዴሰ።

20 ኣቢኔሬ 20 ኣሳታራ ዳዊቲ ዲዛሶ ኬብርኔ ቢዴሰ፤ ዳዊቲካ ኣቢኔሬሲኔ ኢዛራ ዲዛ ኣሰ ኡባሰ ጊቢራ ጊገሲዴሰ።

21 ሄሳፌ ጉዬ ኣቢኔሬ ዳዊቲሰ፡ «ኔናራ ኢሰቲ ጫቂታና ማላ፡ ኔ ዋዚናይካ ኣሞቲዳ ማላ ኔ ኡባ ሃራና ማላ ኤሶን ባዳ ታ ጎዳ ካዎዛሰ ኩማላ ኢሰራኤሌ ኣኔ ሺሻይሰ» ጊዴሰ። ሄሳ ጊሻሰ ዳዊቲ ኣቢኔሬ ሞይዚዴሰ፤ ኢዚካ ሳርን ቢዴሰ።

ኣቢኔሬ ሃይቆ

22 ኢየሱቤይን ዳዊት አሳይ ሄ ዎዴ ዳር ሚሽ ዲኢ ኤኪዲ ኦላፔ ሲሚዳ። አቢነሪ ገዲኮ ዳዊት ሳርን ኢዛ ሞይዚዳ ገሻሰ ኬብሮንን ዳና።

23 ኢየሱቤይን ኢዛራ ኢሲፌ ዲዛ ኦላንቻ ኡባይ ሄ ጋኪዳ ማላ ኔሬ ና አቢነሪ ካዎዛኮ ዪዳይሳ፣ ካዎዚ ኢዛ ሞይዚዳይሳን ኢዚካ ሳርን ኬዚ ቢዳይሳ ኢየሱቤይ ሲዪዴሰ።

24 ሄሳ ገሻሰ ኢየሱቤይ ካዎዛኮ ገሊዲ፣ «ሃይሲ ኔ ኦሊዳይሲ አዜ? እኔ አቢነሪ ኔ ኩሼን ገሊን ዋናዳ ኔ ኢዛ ሳርን ሞይዛ ዪዳዲ?»

25 ኔሬ ና አቢነሪ ኔ ኤራሳ፤ ኢዚ ዪዳይ ኔና ባሌላናሰ፣ ኔ ዋና ኬዚዛኮን ገሊዛኮ ኤራናሲን ኔ ኦሊዛ ኡባ ዎቻናሰ ዪዴሰ» ገዴሰ።

26 ሄሳፌ ጉዬ ኢየሱቤይ ዳዊት አቻፌ ኬዚዴሰ፤ አቢነሪ ኤኪ ያና ማላ አሰ ከቲዴሰ፤ ከቲቲዳ ቃሰታነቲ ኢዛ ሴይሬን ዲዛ ሃላ ኦላ ማታ ጋኪሺን ዛሪዳ፤ ሄሲ ሃኒሺን ዳዊት ኤሪቤና።

27 አቢነሪ ጉዬ ኬብሮን ሲሚዳ ዎዴ ኢየሱቤይ ኢዛ ጸላ ሃሳይሳና ኮይዛ አሰ ሚሳቲዲ ኢሲ ባጋ ሹርኢ ሂሰቲዲ ጌዴ ገምቤዛ ፔንጌ ኤፊዴሰ፤ ሄን ባ ኢሻ አሳሄሌ ሱሐ አዛራና ኮዪዲ ኢዛሰ ኡሎን ጫዲ ዎዲዴሰ።

28 ሄሳፌ ጉዬ አቢነሪ ዎዲዳይሳ ዳዊት ሲዪዲ፣ «ታኒኔ ታ ካዎቲላይ ኔሬ ና አቢነሪ ሱላፌ ጎዳ ሲንላን ሚርናሰ ጌሻ።

29 ኢዛ ሱላይ ኢየሱቤ ሁኤኒኔ ኢዛ አዋ ከላ ኡባ ቦላ ገዴ፤ አሳቲላፌ ሃላ ጎጊሲዛ ሃርጌይ ዎይኮ ጉፊን ካልኦቲዛ ዎቤይ ዎይኮ ማሻን ሃይቂዛይ ዎይኮ ሚዛዚ ዳዪን ኮሻቲዛይ ኢየሱቤ ኬላፌ ዳዮፖ» ገዴሰ።

30 አቢነሪ ጌባኦኔን ኦሌቲዳ ኦላን ኢየሱቤሲን አቢሳዬ ኢሻ አሳሄሌ ዎዲዳ ገሻሰ ኢሰቲካ አቢነሪ ዎዲዳ።

ዳዊት ካዮቴሐ

31 ሄሳፌ ጉዬ ዳዊት ኢየሱቤሲን ኢዛራ ኢሲፌ ዲዛ አሳ ኡባሰ፣ «ኢንቲ ማይኦ ዳኪዲ፣ ማቃ ማይኢዲ አቢነሪ ሲንላን ዬኪቲ» ገዴሰ። ዳዊት ባ ሁኤራ አሃ አዛቢዴሰ።

32 ሂሰቲዲ አቢነሪ አሃ ኤፊዲ ኬብሮንን ሞጊዳ፤ ካዎዚ አቢነሪ ዱፎ ቦላ ዋሲ ዬኪዴሰ፤ ዴሬዚካ ሂሳሶ ዬኪዴሰ።

33 ካዎዚ አቢነሪ ገሻሰ ካዮ ሚላሰ ሚላሊዴሰ፤

«አቢነሪ! ሹፋር አሳ ማላ

ዋና ሃይቃዲ?

34 ኔ ኩሼቲ ቃሼቲቤቲና፤

ኔ ቶሆቲ አግሪሞቄን ጌሊቤቴና፤

እሲ ኢታ አሳ ሲንፋን

ኩንዲዛ ማላ

ኔካ ሄሳፉ ኩንዳዳሳ።»

ዴሬዚ ኡባይ ቃሴ ዛሪ ዩኪዴሰ።

³⁵ ሄሳፌ ጉዬ ዴሬ ኡባይ ካል ዶናን ጌልሊዛ ዋዴ ዳዊቲኮ ዪዲ ኢዚ ካል ማና ማላ ሚንሊ ዋሲዳ። ጊዶ አቲን ዳዊቲ፥ «አርሼይ ዉላናሽ ጋካናሰ ካል ዋይኮ ሃራ ሚሽ ዶናን ታ ጌልሊኮ ጸሳይ ሃይሳ ማላ ታ ቦላ ኤሆ፤ ሃይሳፌካ አፋዛ ሚሽ ታ ቦላ ኤሆ» ጊ ጫቂዴሰ።

³⁶ ዴሬዚ ኡባይ ሄሳ ቤኢዲ ኡፋዬቲዴሰ፤ አዳፊካ ካዋዛ ሃኖይ ዴሬዛ ኡፋይሲዴሰ።

³⁷ ሄሳፉካ ሄ ጋላሰ ዴሬዚ ኡባይኔ ኩሜላ ኢሰራኤሌይ ካዋዛ ኩሼይ ኔሬ ና አቢኔሬ ሃይቆን ባይንዳይሳ ኤሪዴሰ።

³⁸ ሄሳፌ ጉዬ ካዋዚ ባ ዴራሰ፥ «ሃች ኢሰራኤሌን ዳናይኔ ጌታ እሲ ሃይቂዳይሳ ኤሪቤኬቲ?»

³⁹ ታ ቲዬቲዳ ካዋ ጊዲኮካ ሃች ታ ላፋቴሊ ታሰ ኤሬቲዴሰ፤ ሃይቲ ጹሪያ ናይቲ ታሰ ዋልቃቲዳ። ጎዳይ ኢታ ኦሊዳዴሰ ኢዛ ኦሶ ማላ አሞ» ጊዴሰ።

4

ኢያቡስቴ ሃይቆ

¹ አቢኔሪ ኬብሮኔን ሃይቂዳይሳ ሳኦሌ ና ኢያቡስቴይ ሲዪዳ ማላ ኬሂ ያዪዴሰ፤ ኢሰራኤሌ ዴሬይካ ዳጋሚዴሰ።

² ሄ ዋዴ ሳኦሌ ና ኢያቡስቴሰ ካሌሊዛ ናሞኡ አሳቲ ዴቴሰ፤ ኢሰቲካ ባኣናኔ ኤሬካቤ ጌቴቴቴሰ፤ ኢሰቲ ቢኒያሜ ቆሞታፔ ቢኤሮቴ ዴሬ ዩሌታ ጊዲዳ አርሞኔ ናይታ፤ ቢኤሮቴይ ቢኒያሜ ካታማታፔ ኢሲኔይ ማላ ቆዴታዉሰ።

³ ቢኤሮቴ አሳይ ጌቲሜ ባቃቲ ቢዲ ሃች ጋካናሰ ሄን ቤቴ አሰ ጊዲዲ ዴሰ።

⁴ ሳኦሌ ና ዮናታኔሰ ናሞኡ ቶሆቲ ሲሊዳ ኢሲ ናይ ዴሰ፤ ሳኦሌ ሃይቆይኔ ዮናታኔ ሃይቆ ዋሬይ ኢዘራኤሌፔ ኢዛኮ ጋኪዛ ዋዴ ኢዛሰ ላይላይ ኢቻሻ። ኢዚካ ቶሆ ሲላ ጊዲዳይ ሄ ዋዴ ኢዛ ዲቺዛራ ኤካዳ ኤሶን ባቃቲሺን ኩንዲዳ ጊሻሳ። ኢዛ ሱንሊ ሜሞፌቦስቴ ጌቴቴሰ።

5 ሄ ዋዴ ቢኤርቲ ዴሬ አስ አርሞኔ ናይቲ ኤሬካቤይኔ ባኣናይ ኢያቡሰቲኮ ባና ዴንዲዲ፤ ኢዚ ጋላሳ ሽምፖ ኤካናሰ ባ ሂጸ ቦላ ኢሹቻን ዲሺን ሴታ ጋላሰ አዋይ ሴሊሺን ኢዛኮ ጋኪዲ።

6 ገሰቲ ኮይዛ አስ ሚሳቲዲ ኬላ ጊዶ ጌሊዲ ኢዛሰ ኡሎን ጫዲዲ። ሄሳፌ ጉዬ ኤሬካቤይኔ ኢዛ ኢሻ ባኣናይ ሉሹ ጊ ኬዚ ቢዲ።

7 ኢሰቲ ሶ ጌሊዲይ ኢያቡሰቲይ ባ አልጋ ኪፊሌን ኢቺ ዲሺና፤ ኢሰቲ ኢዛ ጫዲ ዋዲዳ፤ ጉዬ ኢዛ ሁኤ ቃንጺ ኤኪዲ ኩሜላ ኦማርሰ አራቤ ኦጌራ ቢዲ።

8 ኢያቡሰቲ ሁኤ ዳዊቲኮ ኬብርኔ ኤፊዲ ካዋዛሰ፡ «ኔና ዋዳና ኮይዛ ኔ ሞርኬ ሳኦሌ ና ኢያቡሰቲ ሁኤ ሃይሳ ቤኣ፤ ሄኮ ጎዳይ ሃች ታ ጎዳ ካዋዛ ገሻሰ ሳኦሌ ቦላኔ ኢዛ ዜሬላ ቦላ ሃሎ ኬሲዴሰ» ጊዲ።

9 ዳዊቲካ ቢኤርቲ ዴሬ አስ አርሞኔ ናይታ ኤሬካቤሲኔ ኢዛ ኢሻ ባኣናሰ፡ «ታና ሜቶፔ አሺዳ ዴኦ ጸሳይ ቤኢን፡

10 ታሰ ሚሺራቾ ቃላ ኤሂዳ ኢዛሰ ሚሳቲን፡ «ሄኮ ሳኦሊ ሃይቂዴሰን ጊዲ ታሰ ዮቲዳዴ ኦይካዳ ጸጊላጌን ዋዳዲሰ። ሂሰቲኮ ሄ ኣዴዛሰ ታ ኢሚዳ ሞጎታይ ሄሳ።

11 ሂሰቲን ባ ኬላን ባ አልጋ ቦላ ኢቺ ሽምፒዛ ጸሎ አስ ዋዲዳ ኢታ አሳታሰ ኢታ ቂጻቲ ኢማና ቤሴን? ኢዛ ሱላ ኢንቲ ኩሼፔ ኣጫናሲኔ ኢንቲና ቢታፌ ዳይሳናሰ ታሰ ቤሴን?» ጊዴሰ።

12 ሄሳ ገሻሰ ዳዊቲ ባ አሳታ ኣዛዚን ኢሰቲ ሄይታ ዋዲዳ፤ ኢሰታ ኩሼኔ ቶሆ ቃንጺዲ ኬብርኔን ዲዛ ኤሌ ሃላ አቻን ካቂዳ፤ ኢያቡሰቲ ሁኤ ቃንጺ ኤኪዲ ኬብርኔን ዲዛ ኣቢፊሬ ዲፎዛ አቻን ሞጊዲ።

5

ኢስራኤል ቦላ ዳዊቲ ካዋቲላ

(1ታሪ 11:1-9፤ 14:1-7)

1 ኢስራኤል አሳይ ኡባይ ኬብርኔ ዳዊቲኮ ቢዲ፡ «ሄኮ ኦኒ ኔ ሚቂላታኔ ኔ አሾታ።

2 ካሴ ሳኦሊ ኦ ቦላ ካዋቲ ዲዛ ዋዴ ኢስራኤል ኦላ አሳ ካሌሊዛይ ኔና፤ ጎዳይ፡ «ታ ዴሬ ኢስራኤል ናጋናይ ኔና፤ ኢሰታ ካሌላናይ ኔና ጊዳናን ጊዲ ኔሰ ዮቲ ዋሊዴሰ» ጊዲ።

3 ሄሳ ጊሻስ ኢስራኤል አሳ ካሌሊዛይት ኡባይ ኬብሮኔ ዩዳ፤ ካዎ ዳዊት ኬብሮኔን ጎዳ ሲንፋን ኢስታራ ጫቆ ቃላ ጌሊዴስ፤ ኢስቲካ ዳዊት ተይዲ ኢስራኤል ቦላ ካዎሊዳ።

4 ዳዊት ካዎቲሺን ኢዛስ ላይላይ 30፤ ኢዚ 40 ላይላ ዳራ አይሲዴስ።

5 ኢዚ ኬብሮኔን ኡቲዲ የሁዳ ቦላ ላቸን ላይሊኔ ኡሱቸን አገና፤ ዩሩሳላሜን ኡቲዲ ኩሜላ ኢስራኤል ቦላኔ የሁዳ ቦላ 33 ላይላ ካዎቲዴስ።

ዩሩሳላሜ ጸኔቴሰ

6 ካዎዚኔ ኢዛ አሳይ ዩሩሳላሜን ዲዛ ያቡሴ አሳ ኦላናስ ሄ ቢዳ። ያቡሴ አሳይካ ዳዊት፡ «ዳዊት ሃይሳን ጌላና ዳንዳዬና» ጊ ቆፒዳ ጊሻስ ዳዊቱስ፡ «ሃራይ ኦቶሺን ቆቄቲኔ ዋቤቲ ኔና ቲቃና፤ ሄሳ ጊሻስ ኔ ሃ ጌላካ» ጊዳ።

7 ጊዶ ኦቲን ዳዊት ጸዮኔ ሚጸ ኦይኪዴስ፤ ሂናካ ሃኢ ዳዊት ካታማ ጌቲቲዛሶሆ።

8 ሄ ጋላስ ዳዊት፡ «ያቡሴ አሳ ጸናና ኮይዛይ፡ ዳዊት ሞርኬ ጊዲዳ ዋቤታኮኔ ቆቄታኮ ጋካናስ ሃሰ ፒኒዛ ፑርዴራ ፑዲንፋ ኬዛናስ ቤሴስ» ጊዴስ፤ ሄሳ ጊሻስ፡ «ዋቤቲኔ ቆቄቲ ካዎ ኬሰ ጌሌቴና» ጌቲቲዴስ።

9 ሄሳፌ ጉዬ ዳዊት ሚጸዮ ባስ ዲሳሶ ሂስቲዴስ፤ ኢዞ፡ «ዳዊት ካታማ» ጊ ሱንሊዴስ። ዳዊት ሚሎፔ ደሚዲ ኢዞ ጊዶ አሊዲ ዩዩ አቆናስ ጊምቢዴስ።

10 ጎዳይ ኡባፌ ዋልቃማ ጸሳይ ኢዛራ ዲዛ ጊሻስ ዳዊት ኡባ ዋዴ ሚኒ ሚኒ ቢዴስ።

11 ሄ ዋዴ ጸርሴ ካዎ ኪራሜይ ዳዊቲኮ ኦስ ኪታ ዩዲዴስ፤ ሄሳሐካ ዚጋ ሚሰ ማሲዛ ሂላንቻታኔ ሹቶ ማሲዛ ሂላንቻታ ዩዲዴስ፤ ኢስቲካ ዳዊቲኮ ካዎ ኬሰ ኬዲዳ።

12 ጎዳይ ኢስራኤል ቦላ ኢዛ ካዎቲላ ሚንሊዳይሳ፡ ባ ዳራ ኢስራኤል ጊሻስ ኢዛ ካዎቲላ ኦሲዳይሳ ዳዊት ኤሪዴስ።

13 ዳዊት ኬብሮኔፔ ቢዳፔ ጉዬ ካሴይታ ቦላ ዩሩሳላሜን ሃራ ላጌሶታ ዋሊዴስ፤ ማቹታካ ኤኪዴስ፤ ሃራ ኦቲማ ናይቲኔ ማጫ ናይቲ ኢዛስ ዩሌቲዳ።

14 ኢዚ ዩሩሳላሜን ዩሊዳ ናይቲ፡ ሻሙኤ፡ ሾባቤ፡ ናታኔ፡ ሶሎሞኔ፡

15 ኢያቤሄራ፡ ኤልሹኤ፡ ኔፌጌ፡ ናፊያ፡

16 ኤልሻማ፡ ኤልኦዳኔ ኤልፋሌጾ ጌቲቲቲኮ።

ፊሊሰዶሜ ጸኔቴስ

(1ታሪ 14:8-17)

17 ዳዊቲ ኢስራኤሌ አሳ ቦላ ካዎቲዳይሳ ፊሊሰዶሜ አሳይ ሲዩዲ ኢዛ ኮያናስ ገጹ ዴንዲዴስ፤ ሄሳ ሲዩዲ ዳዊቲ ዲጌ ባ ሚጸ ዎዲዴስ።

18 ሄ ዎዴ ፊሊሰዶሜ አሳይ ዩዲ ኤራፋይሜ ሾባን ላሌቲ ዲንካኒዴስ።

19 ሄሳ ገሻስ ዳዊቲ ጎዳ፥ «ባዳ ፊሊሰዶሜ አሳራ ኦሌቶ? ኔ ኢስታ ታ ኩሼን አላ ኢማኔ?» ገ ኦይቺዴስ።

ጎዳይካ ኢዛ፥ «ኤ ባ፤ ቱማፔ ፊሊሰዶሜታ ታኒ ኔ ኩሼን አላ ኢማና» ገዴስ።

20 ሄሳ ገሻስ ዳዊቲ ባኣሊ-ፓራጺሚ* ቢዲ ፊሊሰዶሜ አሳ ኦሊ ጸኒዴስ፤ ኢዚካ፥ «ዲኦ ሃሊ ቆቂ ኬዚዲ ላሊዛ ማላ፥ ጎዳይ ታ ሞርኬታ ታ ሲንፋፌ ላሊዴስ» ገዴስ። ሄሳ ጋሶን ሄ ሶሆዛ ሱንሊ ባኣሊ-ፓራጺሚ ጌቲቲዴስ።

21 ፊሊሰዶሜ አሳይ ባ ኤቃ ጸሳታ ዩጌ ኣጌዲ ባቃቲዳ ገሻስ ዳዊቲኔ ኢዛ ካሊዛ አሳይ ዲኢ ኤኪ ቢዳ።

22 ፊሊሰዶሜ አሳይ ቃሴካ ዩዲ ኤራፋይሜ ሾባን ላሌቲ ዲንካኒዴስ።

23 ሄሳ ገሻስ ዳዊቲ ጎዳ ኦይቺዴስ፤ ጎዳይካ ኢዛስ፥ «ኢስታፌ ጉዬ ባጋራ ኢስታ ገዴላዳ ባላሳኔ ሚላፌ ሲንላ ባጋራ ባዳ ኢስታራ ጋይታ ኦቲን ኢስቲ ዲዛሶ ሲቲ ጋ ኬዘፓ።

24 ባላሳኔ ሚላ ጾራ ቦላራ ኦላ ገሪስ ሲዩዛ ዎዴ ጎዳይ ፊሊሰዶሜ ኦላ አሳ ኦላናስ ኔፔ ካሴቲ ኬዚዴስ ጉስ ገዲዳ ገሻስ ሄ ዎዴ ኤሶታዳ ሲንላ ሲቲ ጋ ባ» ገዴስ።

25 ሄሳ ገሻስ ዳዊቲ ጎዳይ ኢዛ ኣዛዚዳ ማላ ኦሊዴስ፤ ፊሊሰዶሜ አሳካ ጌባፔ ቢዲ ጌዜሬ ጋካናስ ጎዲ ጎዲ ሾጪዴስ።

6

ዩሩሳላሚ ጫቆ ቃላ ታቦታ ቡስ

(1ታሪ 13:1-14፤ 15:25—16:6፥43)

1 ቃሴካ ዳዊቲ ኢስራኤሌ አሳፔ ዶሬቲዳ 30,000 ኣስ ሺሺዴስ።

* 5:20 ኢብራዊታ ቃላራ ባኣሊ-ፓራጺሚ ጉሲ ሚንፔሬሊዲ ጌሊዳ ጎዳ ጉሳ።

2 ኢዚኔ ኢዛራ ዲዛ አሳይ ኡባይ ኪሩቤ ቦላ ኡቲዳ ጎዳ ኡባሬ ዋልቃማ ጸሳ ሱንፋን ጴይጌቲዳ ጸሳ ጫቆ ቃላ ታቦታ ኤሃናስ ባኣሊ-ዩሁዳ ጌቲቲዛሶ ቢዳ።

3 ጸሳ ጫቆ ቃላ ታቦታዛ ኦራላ ፓራ-ጋሬን ዋሊዳ፤ ዙሞቡላ ቦላ ዲዛ አቢናዳቤ ኬላሬ ኬሲ ኤሂዳ፤ ፓራ ላገዛይቲ አሚናዳቤ ና ኦዛኔ አሂዮ።

4 ጸሳ ጫቆ ቃላ ታቦታዚ ፓራ-ጋሬዛ ቦላ ዲሺን አሂዮይ ኢዛፔ ሲንፋራ ቤስ።

5 ዳዊቲኔ ኢስራኤሌ አሳይ ኡባይ ዬላን፣ ዲላን፣ ማሲንቆን፣ ካራቤን፣ ጸናጺሌኒኔ ዳላን ባስ ዲዛ ዋልቃ ኡባን ጎዳ ሲንፋን ጉፒዳ (ካኢዳ)።

6 ኢስቲ ናኮኔ ካላ ባሌ ጋኪሺን ቦራቲ ቋጹቲዳ ጊሻስ ኦዛይ ባ ኩሼ ዬዲዲ ጫቆ ቃላ ታቦታዛ ኦይኪዳስ።

7 ኦዛይ ሄሳ ጸላቴላን ኦሊዳ ጊሻስ ጎዳ ሃንቆይ ኢዛ ቦላ ኤጲዳስ፤ ሄሳ ጊሻስ ጸሳይ ኢዛ ዋዲዳስ፤ ኢዚካ ሄን ጸሳ ጫቆ ቃላ ታቦታ ኣቻን ሃይቂዳስ።

8 ጎዳ ሃንቆይ ኦዛ ዋዲዳ ጊሻስ ዳዊቲ ሙዞቲዳሲኔ ጩጪዳስ፤ ሄ ሶሆዚ ሃኝ ጋካናስ፣ «ፓሬሴ-ኦዛኔ» ጌቲቲሰ።

9 ዳዊቲ ሄ ጋላስ ጎዳስ ባቢዳ ጊሻስ፣ «ጎዳ ጫቆ ቃላ ታቦታይ ዋኒ ታኮ ያኔ?» ጌዳስ።

10 ሄሳ ጊሻስ ዳዊቲ ጎዳ ጫቆ ቃላ ታቦታ ባናራ ዳና ማላ ዳዊቲ ካታማ ኤኪ ባና ኮዪቤና፤ ሄሳ ጊሻስ ኦኔ ላሚዲ ጌቲ ዳሬ አስ አቢዳሬ ሶ ኤፊሲዳስ።

11 ጎዳ ጫቆ ቃላ ታቦታይ ጌቲ ዳሬ አስ አቢዳሬ ኬላን ሄሹ አገና ኡቲዳስ፤ ጎዳይ አቢዳሬኔ ኢዛሶ አሳ ኡባ አንጂዳስ።

12 ሄ ዋዴ፣ «ጸሳ ጫቆ ቃላ ታቦታ ጋሶን ጎዳይ አቢዳሬ፣ ኢዛሶ አሳኔ ኢዛሶ ዲዛ ኡባ አንጂዳስ» ጌዲ ዳዊቲሰ ዮቲዳ። ሄሳ ጊሻስ ዳዊቲ ሄ ቢዳ፣ ጸሳ ጫቆ ቃላ ታቦታ አቢዳሬሶፔ ዳዊቲ ካታማ ጌታ ኡፋይሳን ኤፊዳስ።

13 ሄ ጎዳ ጫቆ ቃላ ታቦታ ቶኪዳ አሳቲ ኡሱፑን ታንጎ ቢዳ ቆዳን ኢሲ ቦራይኔ ኢሲ ዋዶ ማሪ ያርሼቲስ።

14 ዳዊቲ ላይኖፔ ዳዊቲዳ ኤፋዴ ባ ጸሳን ጌዲዲ ኩሜላ ዋልቃን ጎዳ ሲንፋን ማጉሊዳስ።

15 ሄሳ ማላን ዳዊቲኔ ኩሜላ ኢስራኤሌ አሳይ ኡፋይሳን ኢሊሊሼኔ ዛዬ ፑኒሼ ጎዳ ጫቆ ቃላ ታቦታ ፑዴ ኤሂዳ።

16 ጎዳ ጫቆ ቃላ ታቦታይ ዳዊቱ ካታማ ጌሊሺን ሳኦሌ ና ሚልኮላ ማስኮቲራ ጸላዲስ፤ ካዎ ዳዊቱ ጎዳ ሲንላን ጉፒሺኒኔ ዲሪሺን ቤኣዳ ባ ዎዚናራ ኢዛ ካቋዲስ።

17 ሄሳፌ ጉዬ ጎዳ ጫቆ ቃላ ታቦታ ኤሂዲ ዳዊቱ ኢዛስ ቶኪዳ ዲንካኔዛ ጊዶን ኢዛስ ጊግሲዳሶሆዛን ዎሒዳ፤ ዳዊቱካ ጹጌቲዛ ያርሾኔ ኢሲፌቲላ ያርሾ ጎዳ ሲንላን ሺሺዴስ።

18 ዳዊቱ ጹጌቲዛ ያርሾዛኔ ኢሲፌቲላ ያርሾዛ ሺሺዳፔ ጉዬ ዴሬዛ ኡባፌ ዎልቃማ ጎዳ ሱንላን ኣንጂዴስ።

19 ኢስራኤሌ ባጋ ጊዲዳ ኣስ ኡባስ፤ ኣቱማሲኔ ማጫስ ኢሳስ ኢሳስ ኢሲ ኢሲ ኡኩል፤ ኢሲ ኢሲ ሙጾ ኣሾኔ ኢሲ ኢሲ ዛቢቤ ኮምፓ ኢሚዴስ፤ ሄሳፌ ኡባይካ ባሶ ባሶ ቢዳ።

20 ዳዊቱ ባሶ ኣሳ ኣንጃናስ ባሶ ሲሚ ቢን ሳኦሌ ና ሚልኮላ ኢዛ ሞካና ኬዛዳ፤ «ሃች ኢስራኤሌታ ካዎይ ጌታ ኣሳታ ጋራዴታ ሲንላን ሙ ላፋ ኣሳ ማላ ካሎ ቤቶይ ኢዛስ ቦንች ጌዲኔ?» ጋዲስ።

21 ዳዊቱካ ኢዚስ፤ «ኤ፥ ኔ ኣዋፔኔ ታ ኬላን ዲዛ ኡባፌ ኣሒዲ ጎዳ ዴሬ ኢስራኤሌ ኣይሳና ማላ ታና ዶሪዳ ጎዳ ሲንላን ማጉላዲስ፤ ሃኢካ ታ ማጉላና።

22 ሄሳፌካ ቦላሪ ካሴፔ ኣላዳ ታናቴላ ካዉሻና፤ ሄሳፌ ኣቋዳ ካቋቲዳዴ ጊደና፤ ጊዶ ኣቲን ኔ ካቋዳ ጋራዴታ ሲንላን ታ ቦንቹታና» ጊዴስ።

23 ሳኦሌ ና ሚልኮላ ሃይቃናሺ ጋካናስ ና ዬላቤኩ።

7

ጸሲ ዳዊቱስ ኢሚዳ ሂዶታ (1ታሪ 17:1-15)

1 ካዎዚ ባ ካዎቲላ ኬላን ዎፑ ጊ ኡቲዳፔኔ ጎዳይ ኢዛ ዩሾን ዲዛ ኢዛ ሞርኬታፔ ሽምፒሲዳፔ ጉዬ፤

2 ናቤ ናታኔስ፤ «ሄኮ ታኒ ዚጋፔ ኬጾቲዳ ካዎቲላ ኬላን ዳይስ፤ ጸሳ ጫቆ ቃላ ታቦታይ ጊዲኮ ዲንካኔን ዴስ» ጊዴስ።

3 ናታኔይካ፤ «ጎዳይ ኔናራ ጊዲዳ ጊሻስ ኔ ቆፒዳ ኡባ ኦላ» ጊዴስ።

4 ሄ ጋላሳ ኦማርስ ጎዳ ቃላይ ናታኔኮ ዩዲ፤

5 «ኔኒ ባዳ ታ ኣይሌ ዳዊቱስ፤ ታ ኢዛን ዳና ኬል ኔ ኬጸካ።

6 ታኒ ኢስራኤል አሳ ገብጾፔ ከሶሶፌ ደማዳ ሃች ጋካናስ ዲንካኔ ታስ አቆሶ ሂስታዳ ኢሲሶፔ ሃራሶ ዩያ ዩያ ዳኣዲስ አቲን ኬላን ዳኣቤኬ።

7 ታኒ ኢስራኤል አሳራ ቢዳሶ ኡባን ታ ዳሬ ኢስራኤል ናጋና ማላ ታ አዛዚን ካሌሊዛይታፔ ኢሳ፥ ሳኔ ታስ ዚጋ ሚላፌ ኣይስ ኬጸቤኪ?» ጊዳዳይ ዲዜ?

8 «ሃኢካ ታ አይሌ ዳዊቲስ ኡባፌ ዎልቃማ ጎዳይ፥ ታ ዳሬ ኢስራኤል ኔ አይሳና ማላ ታ ኔና ዳንላዲስ፤ ዶርስ ሄሚዛሶሆፔ ታ ኔና ኤካዲስ።

9 ኔ ቢዳሶ ኡባን ታ ኔናራ ጊዳዲስ፤ ኔ ሞርኬታ ኡባ ታ ኔ ሲንላፌ ዳይሳዲስ፤ ሃኢካ ኢስታ ሱንላይ ቢታ ቦላ ኬሂ ኤሬቲዳ ዳር ጊታ አሳታፔ ኢሳ ሱንላ ማላ ታ ኔ ሱንላ ቶቂሳና።

10 ኢዛስ ቡዞ ዱሳሶይ ዳና ማላ ሃይሳፌ ቃጸንታ ማላ ታ ዳሬ ኢስራኤልስ ሶሆ አማናኔ ሚንላና። ሃይሳፌ ካሴ ሃኒዳ ማላ ሃይሳፌ ጉዬ ኢታ ዳሬይ ኢስታ ኡንኤልና።

11 ታ ዳሬ ኢስራኤል ካሌሊዛይታ ታ ሹሚዳ ዎዴፔ ደሚዲ ኢስቲ ኢዛ ቦላ ኦሊዳይሳላ ሃይሳፌ ጉዬ ኢዛ ቦላ ኦሴቲና፤ ሄሳላካ ኔ ሞርኬታ ኡባፌ ታ ኔና ናጋና። ጎዳይ ባ ሁኤራ ኬል ኔስ ኬጸናይሳ ኢዚ ዮቲስ።

12 ኔ ላይላ ዉርሳዳ ካሴ ኔ አዎታኔ ጋይቲዛ ዎዴ ኔና ላታና ዜሬል ታ ኔፔ ኬሳና፤ ኢዛ ካዎቲላካ ታ ሚንላና።

13 ታ ሱንላስ ኬል ኬጸናይ ኢዛ፤ ታኒካ ኢዛ ካዎቲላ ሜርናስ ሚንላና።

14 ታ ኢዛስ አዎ ጊዳና፤ ኢዚካ ታስ ና ጊዳና፤ ኢዚ ሞሮ ኦሊኮ አስ ሙሪዛ ጉፌራ ታ ኢዛ ሙራና፤ አሳ ናይ ሊሶን ጋራፌቲዛ ማላ ታ ኢዛ ጋራፋና።

15 ታ ማሮቲላ ኔፔ ካሴ ዲዛ ሳኦሌፔ ሃሲዳይሳላ ታ ኢዛፔ ሃሲኬ።

16 ኔ ኬላይኔ ኔ ካዎቲላ ታ ሲንላን ሜርናስ ሚኒ ዳና፤ ኔ ካዎቲላ አራታይካ ሜርናስ ሚኒ ዳና» ጊዳስ።

17 ናታኔይ ሃይሳ አጁታ ቃላ ኩሜል ዳዊቲስ ዮቲዳስ።

ዳዊቲ ዎሳ

(1ታሪ 17:16-27)

18 ሃይሳፌ ጉዬ ካዎ ዳዊቲ ጌሊ ጎዳ ሲንላን ኡቲዲ፥

7:12 ማዛ 89:3-4፤ 132:11፤ ዮሃ 7:42፤ ሃዋ 2:30

7:14 ማዛ 89:26-27፤

2ቆሮ 6:18፤ ኢብ 1:5

7:16 ማዛ 89:36-37

«ኡባ ሃሪዛ ጎዳዉ! ኔ ታና ሃይሳስ ጋፋናስ ታ ኦኔ? ታሶ አሳይካ አዜ?

19 ኡባ ሃሪዛ ጎዳዉ፥ ሃይሲ ኔ ሲንፋን ጉል ጊዲሺን ኔ ጊዲኮ ኔ አይሌዛሶይ ሲንፋፌ ሃናናይሳ ዮታዳሳ፤ ኡባ ሃሪዛ ጎዳዉ! ኔ አሳራ ጋይቲዛ ሎሴ ኦጌይ ሃይሴ?

20 «ዳዊቲ ኔና ሃይሳፌ ቦላራ ሃራ አይ ጋና ዳንዳይዜ? ኡባ ሃሪዛ ጎዳዉ፥ ኔ አይሌዛ ኔ ኤራሳ።

21 ኔ ቃላዛ ገሻሲኔ ኔ ዋዚና ቆፋ ማላ ኔ ሃይሳ ገታ ሚሽ ኦፋዳሳ፤ ኔ አይሌዚ ኤራና ማላ ቆንጨሳዳሳ።

22 «ኡባ ሃሪዛ ጎዳዉ፥ ኔ አይ ማላ ገታ! ሙሌካ ኔና ሚሳቲዛይ ኦኒካ ዳና፤ ኦኒ ኦ ሃይፋራ ሲዪዳ ማላ ኔፔ አቲን ሃራ ጸሲ ዳና።

23 «ባ ዴሬ ገዳና ማላ ኢዛ አሻናሰ ጸሲ ኢዛፔ ሲንፋራ ቢዳ ዴሬይ፥ ባ ሱንፋስ ኦፋና ማላ ካዋቲፋታኔ ኢስታ ኤቃ ጸሳታ ባ ሲንፋፌ ጎዲዲ ገታኔ ያሺሲዛ ማላታ ኦሊዲ ገብጾፔ ዋዚ ኤኪዳ ኔ ዴሬ ኢስራኤሌ ማላይ ቢታ ቦላ ኦኒ ዲዜ?

24 ኔ ዴሬዛ ኢስራኤሌ ሜርናስ ኔስ ቡዞ ዴሬ ኦፋዳ ሚንፋዳሳ፤ ጎዳዉ፥ ኔ ኢዛ ጸሰ ገዳዳሳ።

25 «ሃኢካ ጎዳ ጸሳዉ፥ ኔኒ ኔ አይሌዛሲኔ ኢዛ ኬፋስ ኢሚዳ ሂደታ ሜርናስ ናጋ፤ ኔ ዮቲዳ ማላካ ፖላ፤

26 ሄሳ ገሻሰ ኔ ሱንፋ ሜርናስ ገታ ገዳና፤ አሳይካ፥ ሓባፌ ዋልቃማ ጎዳይ ኢስራኤሌ ጸሳ» ጋና። ኔ አይሌ ዳዊቲ ኬፋይ ኔ ሲንፋን ሚኖ ገዳና።

27 «አቤት ኡባፌ ዋልቃማ ጎዳዉ፥ ኢስራኤሌ ጸሳዉ፥ ታ ኔስ ኬል ኬጸና» ጋዳ ሄሳ ታስ ኔ አይሌዛሰ ቆንጨሳዳሳ። ሄሳ ገሻሰ ኔ አይሌዚ ሃ ዋሳዮ ዋሳናስ ባ ዋዚናን ጸሊዴስ።

28 አቤት ኡባ ሃሪዛ ጎዳዉ! ኔኒ ጸሳ፤ ኔ ቃላይካ አማኔቲዳይሳ፤ ሃይሳ ሎኦ ሚሽ ኦፋናስ ኔኒ ኔ አይሌዛሰ ሂደታ ኢማዳሳ።

29 ኢዚ ኔ ሲንፋን ሜርናስ ሚኒ ዳና ማላ፥ ሃኢካ ኔ አይሌዛ ኬል አንጃርኪ! አቤት ኡባ ሃሪዛ ጎዳዉ! ሃይሳ ኔርካ ኔ ዮታዳሳ፤ ኔ አንጃን ኔ አይሌዛ ኬል ሜርናስ አንጃታና» ገዴስ።

8

ዳዊቲ ጸኒዳ ጸኖታ
(1ታሪ 18:1-17)

1 ሄሳፌ ጉዬ ዳዊት ፊሊስጶሜ አሳ ጸኒዳስ፤ ባ ሹኔ ጋርሳን አይሲዳስ፤ ሜቴጊ-አማ ጌቴቴዛ ካታማዮ ፊሊስጶሜታ ኩሼፔ ዋሊ ኤኪዳስ።

2 ሄሳፉካ ዳዊት ሞክሮታ ጸኒዳስ፤ ኢስታ ቢታ ቦላ ኢሺሲዲ ዋዶሮን ዋዲ ያሊዳስ፤ ዋዲ ያሊዳይታፔ ናሞኡ ኩሼ ጊዲዛይታ ኢዚ ዋዲን ኢሲ ኩሼ ጊዲዛይታ ፓጸ አቲዳ፤ ሄሳ ጊሻስ ሞክሮ አሳይ ዳዊቴስ ሃሬቴዳሲኔ ኢዛስ ጊሪዳስ።

3 ሄሳፌካ ሃራ ዳዊት ኤፊራዲሴ ሻፋ ማታን ዲዛ ዴሬዛ ዛሪ አይካና ቢዲ፡ ጸባ ካዋ ኤራሆቤ ና ሃዳዲኤዜሬ ኦሊ ጸኒዳስ።

4 ዳዊት ኢዛፔ 1,000 ፓራ-ጋሬታ፡ 7,000 ቶጋንቻታ፡ * 20,000 ኦላንቻታ ዲኢዳስ፤ 100 ፓራ-ጋሬታ ጸላ አሺዲ ሃንኮይታ ኡባ ጊልዳዬ ዬዲዳስ።

5 ዳማስቆ አራሜን ዲዛ ጸባ ካዋ ሃዳዲኤዜሬ ማዳናስ ዬዳ ዋዴ ዳዊት ኢስታፌ 22,000 አስ ዋዲዳስ።

6 ሄሳፌ ጉዬ ዳማስቆን ዲዛ አራሜን ባ ኦላ አሳታ ካሞቤ ገግሲዳስ። አራሜ አሳይ ኢዛስ ሃሬቴዳሲኔ ጊሪዳስ፤ ጎዳይ ዳዊት ቢዳሶ ኡባን ኢዛስ ጸኖ ኢሚዳስ።

7 ሃዳዲኤዜሬ ሹሜቴ ኦይኪዳ ዋርቃ ጎንዳሌታ ዳዊት ኤኪዲ ዬሩሳላሜ ኤፊዳስ።

8 ካዋ ዳዊት ቤጻሄኔ ቤርታዬ ጌቴቴዛ ሃዳዲኤዜሬ ካታማታፔ ኬሂፔ ዳሮ ጸርቂማላ ዴንሊ ኤፊዳስ።

9 ሃማቴ ዴሬ ካዋ ቶኡዬ ዳዊት ኩሜላ ሃዳዲኤዜሬ ኦላ አሳ ጸኒዳይሳ ሲዬዳ ዋዴ።

10 ቶኡዬ ሃዳዲኤዜሬራ ኡባ ዋዴ ኦሌቴሹ ዲዛ ጊሻስ ሳርካኔ ኢዚ ሃዳዲኤዜሬ ጸኒዳ ጸኖ ቆንጪሳናስ ባ ና ኢዮራሜ ካዋ ዳዊቴኮ ከቲ ዬዲዳስ፤ ኢዚካ ቢራፔ፡ ዋርቃፌኔ ጸርቂማላፔ ኦሴቴዳ ሚሻታ ኤኪ ዬዳስ።

11 ካዋ ዳዊት ካሴ ባ ጊሪሲዳ ካዋታፔ ጌሊዳ ቢራኒኔ ዋርቃን ኦሊዳ ማላ ሃይታ ሃ ሚሻታካ ጎዳስ ዲማሲዳስ።

12 ኢዛስ ጊሪዳ ካዋቲ፡ ኤዶሜ፡ ሞክሮ፡ አሞኔ አሳ፡ ፊሊስጶሜ አሳኔ አማሌቄ አሳ። ሄሳፉካ ጸባ ካዋ ኤራሆቤ ና ሃዳዲኤዜሬፔ ዲኢ ኤኪዳይሳ ጎዳስ ዲማሲዳስ።

13 ማጺኔ ሾባ ጌቴቴዛሶን ዳዊት ኤዶሜ አሳፔ 18,000 አስ ዋዲ ሲሚዳፔ ጉዬ ኢዛ ሱንላይ ኬሂ ናሹቴዳስ።

* 8:4 1,000 ፓራ-ጋሬታ፡ 7,000 ቶጋንቻታ ጊዛይሳ ኢሲ ኢሲ ጌሻ ማጸፋታን 17,000 ቶጋንቻታ ጌሰ። 8:13 ማዛ 60

14 ኩሜላ ኤደሜን ኦላንቻታ ካምቤ ገግሲዴስ፤ ኤደሜ አሳይ ኡባይ ዳዊቱስ ሃሬቲዴስ፤ ዳዊቱ ቢዳሶ ኡባን ጎዳይ ኢዛስ ጾኖ ኢሚዴስ።

ዳዊቱ ሹሜታ

15 ዳዊቱ ኩሜላ ኢሰራኤል ቦላ ካዎቲዴስ፤ ዴራስ ሱሬ ፒርዳኔ ዎጋ ኤሲዴስ።

16 ጹሪያ ና ኢዮኣቤይ ኦላንቻታ ሃላቃ፤ አሂሉዴ ና ኢዮሳፊጾይ ታሪኬ ጸፌ።

17 ቃሴ አሂጹቤ ና ሳዶቄይኔ አቢያታሬ ና አሂሚሌኬይ ቄሴ፤ ሳራያይ ጸፌ።

18 ዮዳሄ ና ባናያይ ኬሊቲ አሳሲኔ ፔሊቲ አሳሰ ሃላቃ፤ ዳዊቱ አቱማ ናይቲ ካዎቲላ ኬላን ዞሬ ኢሚዛይታ። †

9

ዳዊቱኔ ሜምፌቦስቲ

1 ዳዊቱ፡ «ዮናታኔ ገሻስ ጋዳ ታኒ ኢዛስ ኪያቲላ ኦላና ማላ ሳኦሌ ሶ አሳፔ አቲዳ አሲ ዲዜ?» ገ ኦይቺዴስ።

2 ሄ ዎዴ ሳኦሌ ሶን ጸባ ጌቲቲዛ ኢሲ አይሌይ ዴስ፤ ኢዚ ዳዊቲኮ ባና ማላ ኢዛስ አሳይ ዮቲዴስ። ካዎዚካ ኢዛ፡ «ጸባ ጌቲቲዛይ ኔኔ?» ገ ኦይቺዴስ።

ኢዚካ፡ «ኤ ታና ኔ ኦሳንቻዛ» ገዴስ።

3 ካዎዚካ፡ «ጸሳ ኪያቲላ ታ ኢዛስ ኦላና ማላ ሳኦሌ ሶ አሳፔ አቲዳ አሲ ዴኔ?» ገ ኦይቺዴስ።

ጸባይካ ካዎዛስ፡ «ዮናታኔስ ቶሆ ሲሊዳ ኢሲ ናይ ዴስ» ገዴስ።

4 ካዎዚካ፡ «ኢዚ አዋን ዲዜ?» ገ ኦይቺዴስ፤

ጸባይካ፡ «ሎዲባሬ ጌቲቲዛሶን አምኤሌ ና ማኪሬሶን ዴስ» ገ ዛሬዴስ።

5 ሄሳ ገሻስ ካዎ ዳዊቱ ሜምፌቦስቲ ሎዲባሬፔ አምኤሌ ና ማኪሬ ሶፔ ከቲ ኤሂሲዴስ።

6 ሳኦሌ ናዛ ዮናታኔ ና ሜምፌቦስቲይ ዳዊቲኮ ዪዲ ኢዛ ቦንቸስ ቢታ ቦላ ጉፋኒዲ ሳርኪዴስ።

ዳዊቱ ኢዛ፡ «ሜምፌቦስቲ!» ገ ጴይገዴስ።

ኢዚካ፡ «ሄኮ ኔ ኦሳንቻዚ ሃን ዳይስ» ገዴስ።

† 8:18 ዞሬ ኢሚዛይታ ገዛይሳ ኢሲ ኢሲ ካሴ ዎዴ ቢርሼላቲ ቄሴታ ጌቲስ።

7 ዳዊቲካ ኢዛ፤ «ባቦፋ፤ ኔ ኣዋ ዮናታኔ ጊሻስ ጋዳ ታኒ ኔስ ኪያቴል ኦፋና፤ ኔ ማይዛ ሳኦሌ ቢታ ሙሌራ ታ ኔስ ዛራና፤ ኔኒ ኡባ ዋዴ ታ ማዳፌ ማንዳሳ» ጊዴስ።

8 ሜምፌቦስቴይ ቢታ ቦላ ጉፋኒዲ፤ «ሃይቂዳ ካና ማላ ቆዴቲዳ ታስ ኔ ሃይሳ ከና ኦፋናስ ኔ ኦሳንቻይ ታ ኦኔ?» ጊዴስ።

9 ሄሳፌ ጉዬ ካዎዚ ሳኦሌ ኣይሌ ጸባ ጴይጊዲ፤ «ሳኦሌሲኔ ኢዛሶ ኣሳስ ዲዛ ሚሽ ኡባ ኔ ጎዳ ናዛ ና ሜምፌቦስቴስ ኢማዲስ።

10 ኔኒ፤ ኔ ናይቲኔ ኔ ኦሳንቻቲ ኢንቲ ጎዳ ናዛ ናይ ባስ ዴማና ማላ ኢዛ ጋዴ ኢዛስ ጎዬዲ ካል ኢዛስ ጌልሊቴ፤ ኔ ጎዳ ናዛ ና ሜምፌቦስቴይ ጊዲኮ ኣይ ዋዴካ ታ ማዳፌ ማና» ጊዴስ። ሄ ዋዴ ጸባስ 15 ኣቱማ ናይቲኔ 20 ኦሳንቻቲ ዴቲስ።

11 ሄሳፌ ጉዬ ጸባይ ካዎዛስ፤ «ታ ጎዳ ካዎ! ኔ ኦሳንቻ ኔ ኣዛዚዳ ኡባ ኔ ኣይሌይ ፖላና» ጊዴስ። ሄሳ ጊሻስ ሜምፌቦስቴይ ካዎዛ ናይታፔ ኢሳ ማላ ጊዲዲ ዳዊቲ ማዳፌ ሚሽ ዴኢዴስ።

12 ሜምፌቦስቴስ ሚካ ጌቲቲዛ ኢሲ ጉላ ናይ ዴስ፤ ጸባሶ ኣሳይ ኡባይ ሜምፌቦስቴስ ኦሊሼ ጋምኢዴስ።

13 ሜምፌቦስቴይ ኡባ ዋዴ ካዎ ማዳፌ ሚዛ ጊሻስ ዬሩሳላሜን ዴኢዴስ፤ ኢዛስ ናምኡ ቶሆቲ ሲላ።

10

ኣሞኔታ ጸኔቴል

(1ታሪ 19:1-19)

1 ሄሳፌ ጉዬ ኣሞኔታ ካዎይ ሃይቂዴስ፤ ኢዛ ና ሃኖኔይ ኢዛሶሆን ካዎቲዴስ።

2 ዳዊቲካ፤ «ኢዛ ኣዎይ ታስ ኪያ ኦሊዳይሳሶ ታኒካ ናኦሴ ና ሃኖኔስ ኢዛ ኩሼ ዛራና» ጊ ቆፒዴስ። ሄሳ ጊሻስ ኢዛ ኣዎ ሃይቆ ጊሻስ ሚሹቲዳይሳ ዮታና ማላ ዳዊቲ ኣስ ከቲዴስ፤ ዳዊቲ ዬዲዳ ኣሳቲ ቢዲ ኣሞኔ ዴሬ ጋኪዳ ማላ።

3 ኣሞኔ ዴሬ ሹሜቲ ባ ጎዳ ሃኖኔ፤ «ዳዊቲ ባስ ሴቲቲዳ ሚሻ ቆንጨሳናስ ኣስ ከቲዳይ ኔ ኣዎ ቦንቻናስ ከቲዳ ኔስ ሚሳቲዜ? ኢዚ ከቲዳ ኣሳቲ ካታማዮ ፓጨ ጴላናስ፤ ጸሞሳናሲኔ ቆይሳናስ ጊዴኔ?» ጊዴ።

4 ሄሳ ጊሻስ ሃኖኔይ ዳዊቲ ኣሳታ ኦይኪዲ ኢሳ ኢሳ ቡቕ ባጋሲ ሚዲዴስ፤ ኢስቲ ማይኢዳ ማይኦዛካ ፑዴ ጴሳ ጋሊ ቃንጺ ዬዲዴስ።

5 አሳቲ ከሄ ዩላቲዳይሳ ዳዊቲ ሲዩዳ ጊሻሰ አስ ኢስታስ ከቲዴስ፤ ካዎዚ፥ «ኢንቲ ቡቻይ ዲጫናሼ ጋካናስ ኢያርኮን ጋምኢዲ ሄሳፌ ጉዬ ሲሚ ዩቲ» ጊዴስ።

6 አሞኔ አሳይ ዳዊቲ ኢስታ ኢዲዳይሳ ኤሪዲ ቤት-ኤሪኣቤፔኔ ጸባፌ 20,000 አራሜፔ ቶሆራ ቢዛ ዎታዳራታ ሄሳፉካ ካዎ ማኢካይ 1,000 አሳራ ቃሴካ ጸባፌ 12,000 አስ ቃጸሪዳ።

7 ዳዊቲ ሄሳ ሲዩዳ ኢዮኣቤ ኩሜላ ኦላ አሳራ ጋላ ዩዲዴስ።

8 አሞኔ አሳይ ከዚዲ ባ ካታማ ጌሊዛ ፔንጌ ቦላ ሳልፌን ኤቂዴስ፤ ጸባ አሳይ፥ ኤሪሆቤ አሳይ፥ ሄሳፉካ ጸቢያ አሳይ፤ ማኢካ አሳይ ዳምባ ቦላ ዲማ ሳልፊዳ።

9 ኢዮኣቤይካ ጉዬራኔ ሲንላራ ኦላይ ባና ጊዶሊዳይሳ ቤኢዲ ኢስራኤሌ ጋርሳን ኤሬቲዳ ኦላንቻታፔ ጉላታ ዶሪዲ አራሜ ኦላንቻታ ሲንላን አሊ ኤሲዴስ።

10 ሃንኮ አቲዳ ኦላንቻታ ባ ኢሻ አቢሳዬ ኢስታ ቦላ ሹሚዲ አሞኔ አሳ ሲንላን ኤሲዴስ።

11 ኢዮኣቤይካ፥ «አራሜ አሳይ ታ ቦላ ሚኒኮ ኔ ያዳ ታና ማዳ፤ አሞኔ አሳይ ኔ ቦላ ሚኒኮ ታ ባዳ ኔና ማዳና።

12 ሄሳ ጊሻሰ ሚና! ኑኒ ኑ ዴሬዛሲኔ ኑ ጸሳ ካታማታስ አኔ ሚኒ ኦሌቶስ፤ ጎዳይ ባና ሎኢዳ ማላ ኦላ» ጊዴስ።

13 ሄሳፌ ጉዬ ኢዮኣቤይኔ ኢዛራ ዲዛ ኦላ አሳይ አራሜ አሳ ኦላናስ ጌዴ ሲንላ ሆርዶሬዴስ፤ አራሜ አሳይ ኢስታ ሲንላፌ ባቃቲዴስ።

14 አራሜ አሳይ ባቃቲዳይሳ አሞኔ አሳይ ቤኢዲ ኢስቲካ አቢሳዬ ሲንላፌ ባቃቲዲ ጌዴ ካታማይ ጊዶ ጌሊዳ፤ ሄሳ ጊሻሰ ኢዮኣቤይ አሞኔ አሳ ኦሊዛይሳ አጋጊዲ ጉዬ ዩሩሳላሚ ሲሚዴስ።

15 አራሜ አሳይ ኢስራኤሌ አሳን ጸኔቲዳይሳ ቤኢዲ ቃሴካ ኢሲ ቦላ ሽቂዳ።

16 ሃዳዲኤዜሬ አሳታ ከቲዲ ሻፋፔ ሄ ፒንላን ዲዛ አራሜ አሳ ኤሂሲዴስ፤ ኢስቲካ ሃዳዲኤዜሬ ኦላ አሳ አዛዚዛ ሶባኬ አላፌቱላን ኤላሚ ቢዳ።

17 ዳዊቲ ሄሳ ሲዩዳ ኩሜላ ኢስራኤሌ አሳ ሺሺዴስ፤ ሄሳፌ ጉዬ ዮርዳናሴ ፒኒዲ ኤላሚ ቢዴስ፤ አራሜ አሳይ ኦላስ ጊጌቲዲ ዳዊቲራ ቲራን ጋይቲዴስ።

18 ጊዶ አቲን ኢስቲ ኢስራኤሌ ሲንላፌ ባቃቲዳ፤ ዳዊቲ ኢስታፌ 700 ፓራ-ጋሪ አሳታኔ 40,000 ቶሆን ቢዛ ኦላንቻታ ዎዲዴስ። ሄሳላ ኢስቲ ኦላ አሳ አዛዚዛ ሶባኬካ ጫዲ ማዲንሊዳ ጊሻሰ ኢዚ ሄን ሃይቂዴስ።

19 ሃዳዲኤዜሬፔ ጋርሳራ ዲዛ ካዎቲ ኡባይ ኢሰራኤል አሳን ጸኔቲዳይሳ ቤኢዲ ኢሰራኤል አሳራ ሳርቴል ሜጂዲ ኢስታስ ሃራቲዳ።

ሄሳ ጊሻስ አራሜ አሳይ አሞኔ አሳ ማዳናስ ባቢዴስ።

11

ዳዊቱኔ ቤርሳቤሆ

1 ካዎቲ ኦላስ ኬዚዛ ኦፊንላ አገናታን ዳዊቲ ኢዮአቤ ካዎ ሹሜታራኔ ኩሜላ ኦላንቻታራ ጋሊ ኦላስ ዩዲዴስ፤ ኢስቲካ አሞኔ ዴሬ አሳ ጃይሲዳ፤ ኤራባ ካታማዮ ጊዶሊዳ፤ ጊዶ አቲን ሄ ዎዴ ዳዊቲ ዩሩሳላሜን አቲዴስ።

2 ኢሲ ጋላስ ቢላሄ ዎዴ ዳዊቲ ጂስኮፌ ቤጊዲ ካዎ ኬላ ፖቄ ቦላ ኬዚዲ ሲሜሬቲሼ ኢሲ ማጫሳያ ባ ቦላ ሜጩቲሺን ቤኢዴስ፤ ማጫሳያ ኬሃ ማላ ሎኦ።

3 ዳዊቲ አስ ከቲዲ ማጫሳይ ጊሻስ ኦይሼቺዴስ፤ አዴዚካ፡ «ሃና ሂቲ ዴሬ አስ ኦሪዮ ማቾ ኤልአሜ ቢዮ ቤርሳቤሆ ጊዴኬ?» ጊዴስ።

4 ሄሳፌ ጉዬ ዳዊቲ አስ ዩዲዲ ኢዞ ባኮ ኤሂሲን ኢዚ ዲዛሶ ጌላዲስ፤ ሂስቲን ኢዚራ ዚንኢዴስ፤ ሄ ዎዴ ኢዛ ማጫ ናስ ዩዛ አገና ዎጋፔ ጌያ ኡታዲስ።

5 ማጫሳያ ቃንላታዳ ዳዊቱስ፡ «ታ ኔስ ሻራዲስ» ጋሼ ኪታ ዩዳዲስ።

6 ሄሳፌ ጉዬ ዳዊቲ ኢዮአቤስ፡ «ሂቲ ዴሬ አስ ኦሪዮ ሃ ታኮ ዩዳ» ጊ ከቲዴስ፤ ኢዮአቤይካ ኦሪዮ ዳዊቲኮ ዩዲዴስ።

7 ኦሪዮይ ዳዊቲኮ ዩን ዳዊቲ ኢዮአቤኔ ኦላንቻታ ሳርቴል ኦይቺዴስ፤ ሂሳላካ ኦላዚ ዋኒ ኦሌቲዛኮ ኢዛ ኦይቺዴስ።

8 ሄሳፌ ጉዬ ዳዊቲ ኦሪዮ፡ «አኔ ኔኒ ኔሶ ባዳ ቶሆ ሜጩታ» ጊዴስ፤ ኦሪዮይ ካዎ ኬላፌ ሞይዜቲ ቢዴስ፤ ካዎዚ ሞጎታ ካል ጌዶራ ኢዛስ ዩዲዴስ።

9 ጊዶ አቲን ኦሪዮይ ባ ጎዳ ኦላንቻታ ኡባራ ካዎ ኬላ ጊቤ ፔንጌ ቦላ ኢቺዴስ አቲን ባሶ ቢቤና።

10 ዳዊቲ፡ «ኦሪዮይ ባሶ ቢቤና» ጊዛይሳ ሲዩዳ ማላ ኦሪዮ፡ «ኔ ቡሮ ኦፔፔ ጌሎ ቦላ ዳሳ ዲኪ? ኔሶ አይስ ባቤኪ?» ጊ ኦይቺዴስ።

11 ኦሪዮይካ ዳዊቱስ፡ «ታቦታይ፡ ኢሰራኤል አሳይኔ ዩሁዳ አሳይ ዲንካኔን ዲሺን፡ ታ ጎዳ ኢዮአቤይኔ ታ ጎዳ አሳይ ጮ

ዴምባ ቦላ ዲሺን ታኒ ማናሲኔ ኡያናሰ ቃሴካ ታ ማቼይራ ኣቃናሰ ዋና ታሶ ቦ? ኢንቴ ኣሾ! ታ ሃይሳ ማላ ኦሊኬ» ጌዴስ።

12 ዳዊቲካ ኢዛስ፡ «ኤሮ፡ ኔ ሃች ሃይሳን ኣቂኮ ዋንቶ ታ ኔና ሞይዛና» ጌዴስ። ሄሳ ጊሻሰ ኦሪዮይ ሄ ጋላሲኔ ዋንቴላ ጋላሰ ዩሩሳላሚን ታኪዴስ።

13 ዋንቴላ ጋላሰ ዳዊቲ ባ ዲዛሶን ኢዛስ ጊቢራ ጊግሲዲ ሚዚ፡ ኡሺ ካልሲዲ ኢዛ ማፉሲዴስ፤ ጋዴይ ቃሚሺን ኦሪዮይ ጋዴን ኦንጌቲ ዲዛ ሂጸን ኢቻናሰ ኢዛ ጎዳ ኣይሌቲ ዲዛሶ ቢዴስ ኣቲን ባሶ ቢቤና።

14 ጋዴይ ዋንቴሺን ዳዊቲ ኢዮኣቤሰ ዳብዳቤ ጸፊዲ ኦሪዮ ቦላ ዩዲዴስ።

15 ዳብዳቤዛን፡ «ኦሪዮ ኦላይ ሚኒዛሶን ኤሳ፤ ሄን ኢዚ ጫዴቲ ሃይቃና ማላ ኣጋጊዲ ባቃቲቲ» ጌ ጸፊዴስ።

16 ሄሳ ጊሻሰ ኢዮኣቤይ ካታማዮ ጊዶሊዳ ዋዴ ኬሂ ኤቄቲዛ ኦላንቻቲ ዲዛ ሚጸን ኦሪዮ ኤሲዴስ።

17 ካታማዩን ዲዛ ኣሳይ ኬዚዲ ኢዮኣቤራ ኦላ ዳንጺዴስ፤ ዳዊቲ ኦላንቻታፔ ጉላቲ ኩንዲዳ፤ ሄሳቶካ ሂቲ ዴሬ ኣሰ ኦሪዮይ ሃይቂዴስ።

18 ኢዮኣቤይ ኦላሶን ሃኒዳ ኡባ ዳዊቲሰ ከቲ ዩዲዴስ።

19 ከቲቲ ቢዛይሳስ፡ «ሃይሳ ኦላ ሃኖታ ኔ ካዋዛሰ ዮቲዳፔ ጉዬ።

20 ካዋዚ ኔ ቦላ ሃንቄቲዲ፡ ላኢንቴ ኦሌታናሰ ኣይሰ ሄሳ ማላ ካታማይኮ ኬሂ ሸቂዴቲ? ጊምቤዛ ካራራ ኢንቴ ቦላ ዋንዳፌ ዲካናይሳ ኤሬኬቲ?

21 ዩሩቤሺቴ* ና ኣቢሚሌኬ ኢሲ ማጫሳያ ቴቤሴን ጊምቤዛ ካራራ ዋጸ ማይዴ ዩዳዳ ዋጳቤኬ? ሂሰቲን ኢንቴ ኣይሰ ሄሳ ኬና ጌዴ ጊምቤዛኮ ሸቂዴቲ?» ጌ ኦይቺኮ ኔኒካ ኢዛሰ ዛራዳ፡ «ሂቲ ዴሬ ኣሰ ኔ ኦሳንቻ ኦሪዮይ ሃይቂዴስ» ጋዳ ዮታ» ጌዴስ።

22 ሄሳ ጊሻሰ ከቲቲዳ ኣዴዚ ዴንዲ ቢዴስ፤ ሄ ቢ ጋኪዳ ማላ ኢዮኣቤይ ዩዲዳ ከታ ኡባ ዳዊቲሰ ዩዲዴስ።

23 ከቲቲ ቢዴይሲ ዳዊቲሰ፡ «ኣሳቲ ኦ ቦላ ዋልቃሚዲ ኦና ኦላናሰ ዴምባ ጋካናሰ ዩዳ፤ ጊዶ ኣቲን ኦኒ ኢሰታ ካታማይ ፔንጌ ጋካናሰ ጎዲዴስ።

24 ሄሳፌ ጉዬ ዋንዳፌ ዲኪዛ ኣሳቲ ጊምቤዛ ቦላ ኡቲዲ ኔ ኣይሌታ ጊዲዳ ኦ ቦላ ዋንዳፌ ዲኪዳ፤ ካዋዛ ኦሳንቻታፔ

* 11:21 ዩሩቤሺቴ፡ ዩሩቤሺቴ ኢሲ ኢሲ ጌሻ ማጸፋታን ዩሩባቤሌ፡ ጌዶኔ፡ ቃሴ ሃራታን ቦሺቴ ጌቲክሰ 11:21 ዳና 9:53

ጉላታ ዋዲዳ፤ ኔ ኦሳንቻ ሂቲ ዳሬ ኣስ ኦሪዮይካ ሃይቂዳስ» ጊዴስ።

²⁵ ዳዊቲ ከቲቲ ዩዳይሳስ፡ «ኔኒ ኢዮኣቤስ፡ ላይ ዋዴ ጊዲንካ ማሻይ ኢሲቶ ሄሳፌ ዋይኮ ሃይሳፌ ሜስ፤ ሄሳ ጊሻስ ሃይሳ ሃ ሃናዛን ካዮቶፋ፤ ካታማዮ ኦላ ኦይካናሲኔ ቆይሳናስ ሚና» ጋዳ ሚንሉፋ» ጊዴስ።

²⁶ ኦሪዮ ማቼያ ኢዚ ኣዚናይ ሃይቂዳይሳ ሲያዳ ኬሃ ሚሼታዳ ኢዛስ ዩካዱስ።

²⁷ ካዮቴፋ ዋዴይ ኣዲዳፔ ጉዬ ዳዊቲ ከቲ ኤሂሲዱ ኢዞ ባስ ማቾ ኤኪዴስ፤ ኢዛ ዳዊቲስ ኣቱማ ና ዩላዱስ፤ ጊዶ ኣቲን ዳዊቲ ኦሊዳ ኦሶይ ጎዳ ኡፋይሲቤና።

12

ናታኔኔ ካዋ ዳዊቲ

¹ ጎዳይ ናቤ ናታኔ ዳዊቲኮ ከቲዴስ፤ ኢዚካ ዳዊቲኮ ቢዱ፡ «ኢሲ ካታማን ናምኡ ኣሳቲ ዴቲስ፤ ኢስታፌ ኢሶይ ዱሬ፤ ሃንኮይሲ ማንቆ።

² ዱሬዛስ ኬሂ ዳር ዶርሳቲኔ ሚዛቲ ዴቲስ።

³ ጊዶ ኣቲን ማንቆዛስ ኢዚ ሻሚዳ ዶርሳ ላቃ ኢሲኔይፔ ኣቲን ሃራይ ዴና፤ ኢዚ ኢዞ ባ ናይታራ ኣልኢሲ ዲቺዴስ፤ ኢዛራ ኢሲፌ ማወስ፤ ኢሲፌ ኡያወስ፤ ኢዛ ኪኦን ኢቻወስ፤ ኢዛ ኢዛስ ዩሎ ማላ።

⁴ «ኢሲ ጋላስ ዱሬዛሶ ኢማሊ ዩዴስ፤ ዱሬ ኣዴዚ ባ ዶርሳታፔ ዋይኮ ሚዛታፔ ኤኪዱ ሄ ኢማላዛስ ሚዛ ካል ጊሊሳና ኮዩቤና፤ ጊዶ ኣቲን ማንቆዛ ላቃዮ ኤፊዱ ባሶ ዩዳ ኢማላዛስ ካል ጊግሲዴስ» ጊዴስ።

⁵ ዳዊቲ ሄሳ ኦሊዳይሳ ቦላ ኬሂ ሃንቂቲዱ ናታኔስ፡ «ዴኦ ጎዳይ ቤኢን ሃይሳ ኦሊዳዴስ ሃይቆይ ቤሴስ!

⁶ ኢዚ ሃይሳ ማላ ኦሶ ኦሊዳ ጊሻሲኔ ቃጴታይ ባይንዳ ጊሻስ ሄ ላቃይ ጊሻስ ኦይዱ ኩሼ ቃንጸና ቤሴስ» ጊዴስ።

⁷ ሄሳፌ ጉዬ ናታኔይ ዳዊቲስ ዛሪዱ፡ «ሄ ቢታኔዚ ኔና! ጎዳ ኢሰራኤሌ ጸሳይ ኔና፡ ላኒ ኢሰራኤሌ ቦላ ካዋ ጊዳና ማላ ታ ኔና ቲያዲስ፤ ሳኦሌ ኩሼፔካ ኔና ኣሻዲስ።

⁸ ኔ ጎዳ ኬፋ ታ ኔስ ኢማዲስ፤ ታ ኔ ጎዳ ማቼታካ ኔ ሾጳ ጋርስ ጌልፋዲስ፤ ኢሰራኤሌ ኬፋኔ ዩሁዳ ኬፋ ታ ኔስ ኢማዲስ፤ ሃይቲ ኡባይ ኔስ ጉጺዳኮ ታ ኔስ ሄይታፔ ቦላራ ጉጃናኮሺን።

9 ሂሰቲን ኢዛ ሲንላን ኢታ ሚሽ ኦላዳ ጎዳ ቃላ ኣይሰ ካወሻዲ? ሂቲ ዴፌ ኣሰ ኦሪዮ ማሻን ሲፋዳሳ፤ ኢዛ ማቼዮ ኔሰ ኤካዳሳ፤ ኢዛካ ኣሞኔታ ማሻን ዋጂሳዳሳ፡፡

10 ኔኒ ታና ካወሹዳ ጊሻሲኔ ሂቲ ዴፌ ኣሰ ኦሪዮ ማቼ ኔሰ ኤኪዳ ጊሻሰ ኔ ኬላፌ ሜርናሰ ማሻይ ሻኬቲና፡፡ ጌሰ፡፡

11 «ጎዳይ ኔና፡ «ቤኣ ኔ ኬላፌ ኔ ቦላ ኢታ ሚሽ ታ ዴንላና፤ ኔ ኣይፌይ ቤኢሽን ኔ ማቼታ ኤካዳ ኔሰ ማታ ጊዲዳ ኢሳዴሰ ታ ኣላ ኢማና፤ ኢዚካ ሴታ ጋላሰ ኔ ማቼታራ ዚንኣና፡፡

12 ኔኒ ካሴ ሃይሳ ጌማን ኦላዳሳ፤ ታኒ ጊዲኮ ኢሰራኤል ኡባ ሲንላን ጋላሰ ፖኦይ ዲሺን ቆንጨሳና፡፡ ጌሰ» ጊዴሰ፡፡

13 ሄሳፌ ጉዬ ዳዊቲ ናታኔሰ፡ «ታኒ ጎዳ ኬሃ ቆሃዲሰ» ጊዴሰ፤ ናታኔይ ኢዛሰ ዛሪዲ፡ «ጎዳይ ኔ ናጋራ ወርሲዳ ጊሻሰ ኔ ሃይቃካ፤

14 ጊዴ ኣቲን ኔ ሃይሳ ኦሊን ሞርኬቲ ጎዳ ኬሂ ካወሻና ማላ * ኔ ኦሊዳ ጊሻሰ ኔሰ ዬሌቲዳ ናዚ ሃይቃና» ጊዴሰ፡፡

ዳዊቲ ናዛ ሃይቆ

15 ናታኔይ ባሶ ሲሚ ቢዳፔ ጉዬ ኦሪዮ ማቼያ ዳዊቲሰ ዬሊዳ ናዛ ቦላ ጎዳይ ኢታ ሃርጌ ዬጊዴሰ፡፡

16 ዳዊቲ ባ ናዛ ጊሻሰ ጸሳ ዋሲዴሲኔ ጸሚዴሰ፡፡ ሄሳፌ ጉዬ ጌዴ ባ ኪፊሌ ጌሊዲ ኦማርሰ ኦማርሰ ቃንጾንታ ሳኣ ቦላ ኢቺ ኣቋዴሰ፡፡

17 ኢዛ ካዋቲላ ኬላ ጨማቲ ኢዛ ሳኣፔ ዴንላናሰ ኢዛ ማታን ኤቋዳ፤ ኢዚ ጊዲኮ ዴንዶንታ ኢጲዴሰ፤ ኢሰቲ ሚሺን ኣይኮካ ሚቤና፡፡

18 ላፑንላ ጋላሰ ናዚ ሃይቋዴሰ፤ ዳዊቲ ኦሳንቻቲ፡ «ናዚ ፓጻ ዲሺን ኦ ዮቲን ኦ ጊዛ ሲዩቤና፤ ሂሰቲን ኦ ሃኢ ናዛ ሃይቆ ኢዛሰ ዋሰቲ ዮታና ዳንዳይዘኒ? ኢዚ ባርካ ባ ቦላ ቆሆ ጋላና ዳንዳይሰ» ጊ ቆፒዲ ዮታናሰ ባቢዳ፡፡

19 ኢዛ ኦሳንቻቲ ጋርሳራ ሳሱኬቲ ሃሳይዛይሳ ዳዊቲ ቤኢዲ ናዚ ሃይቋዳይሳ ኤሪዴሰ፤ ሄሳ ጊሻሰ፡ «ናዚ ሃይቋዴ?» ጊዲ ኢሰታ ኦይቺዴሰ፡፡ ኢሰቲካ ኢዛሰ፡ «ኤ ሃይቋዴሰ» ጊዲ፡፡

20 ሄ ዋዴ ዳዊቲ ሳኣ ቦላፌ ዴንዲዲ፡ ሚጨቲዲ፡ ጎርፔቲዲኔ ማይኦ ሳሚዳፔ ጉዬ ጎዳ ኬላ ቢ ጎይኒዴሰ፡፡ ሄሳፌ

12:12 2ሳሜ 16:22 * 12:14 ጎዳ ኬሂ ካወሻና ማላ ጊዛይሳ ኢሲ ኢሲ ገሻ ማጻፋ ቢርሼላቲ ጸሳ ሞርኬቲ ጸሳ ቂጻና ዋይኮ ካጻና ማላ ኔ ኦሊዳ ጊሻሰ ጌቲሰ፡፡

ጉዬ እዚ ባ ከፊሌ ጌሊደሰ፤ ባሰ ቁማ ኢማና ማላ እዚ ኦይቸን ኢሚዳ ቁማ ሚደሰ።

21 እዚ ኦሳንቻቲ እዛ፡ «ሃይሳሶ ኣይሰ ኦላዲ? ናዚ ሼምፖራ ፓጻ ዲሺን ጸማዳሳኔ ዩካዳሳ፤ ጊዶ ኣቲን ናዚ ሃይቂዳፔ ጉዬ ኔ ዴንዳዳ ካል ማዳሳ» ጊዳ።

22 ዳዊቲ እሰታሰ፡ «ኤ ቱማ፡ ናዚ ሼምፖራ ፓጻ ዲዛ ዎዴ፡ ሳዳይ ታሰ ኣቶ ጊዲ ናዚ ሼምፖራ ፓጻ ዎላናኮን ጋዳ ጸማዲሲኔ ዩካዲሰ።»

23 ሃኢ ጊዲኮ ናዚ ሃይቂን ታ ኣዛሰ ጸሞ? ታ እዚ ሃ ዛራናሰ ዳንዳያዚና? ታ ኢዛኮ ባና ኣቲን እዚ ሃ ታኮ ሲሜና!» ጊደሰ።

ሶሎሞኔ ዩሌቴል

24 ሄሳፌ ጉዬ ዳዊቲ ባ ማቼዮ ቤርሳቤሆ ሚንፊሊደሰ፤ እዚኮ ጌሊዲ እዚራ ኣቂደሰ፤ እዛካ እዛሰ ኣቱማ ና ዩላዲሰ፤ ናዛ፡ «ሶሎሞኔ» ጊ ሱንፊደሰ፤ ጎዳይካ እዛ ዶሲደሰ፤

25 ጎዳይ ናዛ ዶሲዳ ጊሻሰ እዛ ሱንፊ ዩዲዲያ ጌቴቲ ዴይጌታና ማላ ናቤ ናታኔ ባጋራ ቃላ ከቲደሰ።

ኤራባ ካታማ ጸኔቴል

(1ታሪ 20:1-3)

26 ሄ ዎዴ ኢዮኣቤይ ኣሞኔታ ካታማ ኤራባ ኦሊዲ ካዎቴላ ኬላ ሚጸ ኦይኪደሰ።

27 ሄሳፌ ጉዬ ኢዮኣቤይ ዳዊቲኮ ኣሰ ከቲ ዩዲዲ፡ «ታኒ ኤራባ ኦላዳ ሃሊ ዲዛ ካታማዮ ኦይካዲሰ፤

28 ሃኢ ኔኒ ኣቲዳ ኦላንቻታ ሺሻ ኤካዳ ካታማዮ ጊዶላ ኦይካ፤ ኔ ሂሰቶንታ ኣጊኮ ካታማዮ ታ ኦይኪኮ እዛ ታ ሱንላን ዴይጌታና» ጊደሰ።

29 ሄሳ ጊሻሰ ዳዊቲ ኩሜላ ኦላንቻታ ሺሺ ኤኪ ቢዲ ኤራባ ኦሊ ኦይኪደሰ።

30 እሰታ ካዎዛ ካላቻ እዛ ሁኤፔ ኤኪደሰ፤ ሄ ካላቻዚ እሲ ሜክሊቱ † ዎርቃ ጊዲሺን ቦንቹቲዳ ኢንቁን ኣሊቂቲደሰ፤ ዳዊቲ ሄ ካላቻዛ ባ ሁኤን ጎጺደሰ፤ ዳዊቲ ካታማይፔ ከሂ ዳር ሚሽ ዲኢ ኤኪደሰ።

31 ሄን ዲዛ ዴራ ኬሲዲ እሰታ ማጋዜን፡ ጸይሌኒኔ ካልታን ጎኤቲዲ ኦሶ ኦላና ማላ ዎልቃሊ ኦሲሲደሰ፤ ሄሳካ ጹቤ ሜዲሲደሰ። ሄሳ ማላ ኦሶይ ሃራ ኣሞኔታ ካታማታ ኡባን

† 12:30 እሲ ሜክሊቱ ጊዛይሲ ሄቹ ታማኔ ኢቻሽ ከሎ ጊራሜ ቤሴስ

ነሴታና ማላ ኦሊዴሰ። ሄሳፌ ጉዬ ዳዊቲኔ ኢዛ ኦላንቻቲ ኡባይ ዬሩሳላሜ ሲሚዳ።

13

አሚኖኔኔ ቲኢማር

¹ ዳዊቲ ና ኣቤሴሎሜስ ቲኢማር ጌቲቲዛ ማላ ሎኦ ሚቻ ዳጧስ፤ ዳዊቲ ና አሚኖኔይ ኢዞ ዶሲዴሰ።

² አሚኖኔይ ባ ሚቻ ቲኢማር ዶሲዳ ጋሶን ሳኬታናሼ ጋካናስ ጩጩዴሰ፤ ኢዛ ጌላኦ ጊዲዳ ጊሻስ ኢዚ ኢዚራ ኣቃና ዳንዳይቤና።

³ አሚኖኔስ ኢዮናዳቤ ጌቲቲዛ ላጌይ ዴስ፤ ኢዚ ዳዊቲ ኢሻ ሻሜኤ ና፤ ኢዮናዳቤይ ኬሂ ጌኔ ኣሳ።

⁴ ኢዚ አሚኖኔ፥ «ኔ ጌልቃ ጌልቃ ኣቂዛ ጋሶይካ ኣዛኮን ታስ ኣይስ ዮቲኪ!» ጊ ኦይቺዴሰ። አሚኖኔይ፥ «ታ ኢሻ ኣቤሴሎሜ ሚቻ ቲኢማር ዶሲዳ ጊሻስ ጌልቃዲሰ» ጊዴሰ።

⁵ ኢዮናዳቤይካ ኢዛስ፥ «ሂስቲኮ ኔኒ፥ ታኒ ሳኬታዲሰ» ጋዳ ሂጸን ኬዛ ኢቻ፤ ኔ ኣዋይ ኔና ኦይቻና ዪሺን፥ ታ ሚቻ ቲኢማራ ያዳ ታስ ሚዛ ሚሽ ጊጊሳ ኢሚዳኮ ታና ሎኤሰ፤ ካፋካ ሃይሳን ታ ጸሊሺን ጊጊሳዳ ባ ኩሼራ ኢዛ ታና ባርሳና ማላ ኣዛዛርኪ!» ጋዳ ኢዛ ኦይቻ» ጊዴሰ።

⁶ ሂስቲን አሚኖኔይ ሳኬቲዳ ኣስ ሚሳቲዲ ኢቺዴሰ፤ ካዋዚ ኢዛ ኦይቻና ዪን አሚኖኔይ ኢዛ፥ «ታ ሚቻ ቲኢማራ ያዳ ታ ቤኢሺን ሶሎ ኡካዳ ባ ኩሼራ ታና ባርሳና ማላ ታ ኔና ዋሳይስ» ጊ ኦይቺዴሰ።

⁷ ዳዊቲ፥ «ኔ ኢሻ አሚኖኔሶ ባዳ ኢዛስ ማና ካል ጊጊሳ» ጊዲ ቲኢማሪስ ዮታና ማላ ካዋ ኬል ኪቲዴሰ።

⁸ ሄሳ ጊሻስ ቲኢማራ ኢዚ ኢሻ አሚኖኔይ ኢቺ ዲዛሶ ባዴሰ፤ ጉላ ቡኬሶ ኡካዳ ሙጉቂዳፔ ጉዬ ኢዚ ቤኢሺን ጊጊሳዳ ኡካዲሰ።

⁹ ሄሳፌ ጉዬ ባሼዛ ኬሳዳ ሶሎዛ ኢዛስ ሺሻዲሰ፤ ጊዶ ኣቲን ኢዚ ማና ኮዪቤና።

አሚኖኔይ፥ «ኡባ ኣሳ ሃይሳፌ ኬሲቲ» ጊዴሰ፤ ዲዛ ኣሳይ ኡባይካ ኢዛ ዬጊ ኬዚዴሰ።

¹⁰ ሄሳፌ ጉዬ አሚኖኔይ ቲኢማር፥ «ታና ባርሳና ማላ ካፋ ሃ ታ ኢቺዳ ኪፊሌ ኤካ ያ» ጊዴሰ፤ ቲኢማራ ባ ጊጊሲዳ ቁማ ኡካዳ ባ ኢሻ አሚኖኔይ ኢቺዳ ኪፊሌ ጌላዲሰ።

11 ጌዶ አቲን ኢዛ ቁማ ኢዛሰ ሺሺን ኢዚ ኢዛ ጨርፍ ሂሰቲ ኦይኪዲ፥ «ታ ሚቼዬ! ኣኔ ኢሲፌ ዚንኦሰ» ጌዴሰ።

12 ኢዛካ ዛራዳ ኢዛሰ፥ «ታ ኢሻዞ ታ ኔና ሾቢስ፥ ኣጋ፤ ሄሲ ሃኔና፤ ታና ዋልቃራ ኦይኮፋ፤ ሃይሳ ማላ ሚሺ ኢሰራኤልን ኦሴቲ ኤሬና፤ ሃይሳ ዩላቺዛ ኦሶ ኦላፋ።

13 ታ ሃይሳፌ ጉዬ ዋናኔ? ታ ካዉሻቴላ ቶካዳ ታ ኣዋ ጌላኔ? ኔኒካ ኢሰራኤልን ካዉሻ ኣሳታፔ ኢሳ ማላ ቆዴታና ጌዲኪ? ዲጫ ዛይ ካዋዛሰ ዮታ፤ ኢዚ ታ ኔና ጌሎንታ ማላ ዲጌና» ጋዴሰ።

14 ኢዚ ጌዲኮ ኢዛ ገዛይሳ ሲያና ኮዩቤና፤ ኢዚ ኢዚፔ ኬሂ ሚኖ ጌዲዳ ገሻሰ ኢዛ ዋልቃራ ኦይኪዲ ኢዚ ጌላኦቴላ ኤኪዴሰ።

15 ሄሳፌ ጉዬ ኣሚኖኔይ ኢዛ ኬሂ ኢዲዴሰ፤ ኡባካ ካሴ ኢዛ ሲቆሪፔ ቦላራ ኢዲዴሰ። ኣሚኖኔይ፥ «ኪቻ ታ ኣቻፌ ኬዛ!» ጌዴሰ።

16 ኢዛካ፥ «ሄሲ ሃኔና! ኔኒ ታና ኬሳ ዩዶይ ካሴ ኔ ታ ቦላ ጋሊዳ ቆሆዛፔ ኣላዳ ታና ቆሃሳ!» ጋዴሰ፤ ኢዚ ጌዲኮ ኢዛ ገዛይሳ ኤኪቤና።

17 ኢዚ ባ ኣይሌዛ ጴይጌዲ፥ «ሃኖ ማጫሳዮ ኬሳዳ ካራ ጎርዳ» ጌዴሰ።

18 ሄሳ ገሻሰ ኢዛ ጌሎንታ ማላ ካሬዛ ጎርዲዴሰ፤ ሄ ዋዴ ጌላኦ ጌዲዳ ካዋ ናይቲ ማይኢዛ ኣለቆ ማይኦ ማይኦ ኡታዴሰ።

19 ቲኢማራ ባ ሁኡን ቢዲንሐ ላላዴሰ፤ ኣለቆ ማይኦዛካ ዳካዴሰ፤ ሄሳፌ ጉዬ ባ ሁኡ ባቃ ኦይካዳ ዩካሼ ባዴሰ።

20 ኢዚ ኢሻ ኣቤሴሎማይ ኢዛ፥ «ሄሲ ኔ ኢሻ ኣሚኖኔይ ኔናራ ታኪዴ? ታ ሚቼዬ ኣኔ ሃኢ ጮኡ ጋ፤ ኢዚ ኔ ኢሻ ጌዲዳ ገሻሰ ኔ ጨጮፓ» ጌዴሰ። ቲኢማራ ባ ኢሻ ኣቤሴሎማሶን ሳዮ ጌዳ ኡታዴሰ።

21 ካዋ ዳዊቲ ሄ ሃኖዛ ሲዩዲ ኬሂ ሃንቁቲዴሰ፤

22 ኣቤሴሎማይ ኣሚኖኔ ቦላ ኢታ ጌዲን ሎኦ ጌዲን ኢሲ ቃላካ ጳቂቤና፤ ጋሶይካ ኣሚኖኔይ ኢዛ ሚቾ ቲኢማሮ ካዉሺዳ ገሻሰ ኬሂ ኢዲዴሰ።

ኣሚኖኔ ሃይቆ

23 ናምኡ ላይላፌ ጉዬ ኣቤሴሎማይ ኤፍሬሜ ቆሳ ማታን ዲዛ ባኣሊ-ሃጾሬ ካታማን ባ ዶርሳታ ኢሰኬ ቃንጺሺ ሄን ካዋ ኣቲማ ናይቲ ቤታና ማላ ጴይጌዴሰ።

24 አቤሴሎሜይ ካዎዛኮ ቢዲ፥ «ሄኮ ኔ አይሌይ ባ ደርሳታ ኢስኬ ቃንጸሼ ዴስ፤ ሄሳ ገሻስ ካዎዚኔ ኢዛ ሹማቲ ኢስታስ ሎኦ ሼኔ ገዲኮ ታስ ሄን ቤቴቶ» ገ ሾቢዴስ።

25 ካዎዚካ፥ «ታ ናዞ! ኑ ኡባይ ባናስ ቤሴና፤ ኑ ኔስ ቶሆ ገዳና» ገዴስ። አቤሴሎሜይ ሚንሒ ዎሲንካ ካዎዚ ባና ኮዪቤና፤ ገዶ አቲን ኢዛ አንጂዲ ሞይዚ ዬዲዴስ።

26 አቤሴሎሜይ፥ «ሂስቲኮ ታ ኢሻ አሚኖኔይ ኑናራ ባና ማላ አዛዛ» ገዴስ።

ካዎዚ፥ «ኢዚ ኢንቴናራ አይስ ባኔ?» ገ ኦይቺዴስ።

27 ገዶ አቲን አቤሴሎሜይ ኢዛ ሚንሒ ዎሲዳ ገሻስ ዳዊቲ አሚኖኔይኔ ሃንኮ አቱማ ናይቲ ኡባይ ኢዛራ ኢሲፌ ባና ማላ ኦሒዴስ።

28 አቤሴሎሜይ ባ አይሌታስ፥ «አሚኖኔይ ዎይኔ ኡሻ ኡዬዲ ማዓታናሽ ጋካናስ ናጉቴቴ፤ ሄሳፌ ጉዬ ታኒ ኢንቴና፥ ለአሚኖኔ ሾጪቴ» ገዛ ዎዴ ኢንቴ ኢዛ ዎዲቴ፤ ኢንቴና አዛዚዳይ ታና ገዲዳ ገሻስ ባቦፍቴ፥ ሚኒቴ፥ ጸለቴ» ገ አዛዚዴስ።

29 አቤሴሎሜ አይሌቲ ኢስታ ጎዳይ ኢስታ አዛዚዳይሳ አሚኖኔ ቦላ ፖሊዳ፤ ሄሳፌ ጉዬ ካዎዛ ናይቲ ኡባይ ባ ባቁሎ ቶገዲ ባቃቲዳ።

30 ኢስቲ ቡሮ ኦጌ ቦላ ዲሺን፥ «አቤሴሎሜይ ካዎዛ ናይታ ኡባ ዎዲ ወርሲዴስ፤ ኢሳዴይካ አቲቤና» ገዛ ዎሬይ ዳዊቲኮ ጋኪዴስ።

31 ካዎዚ ዴንዲ ኤቂዲ ባ ማይኦ ዳኪዴስ፤ ቢታ ቦላ ጉፋኒዴስ፤ ኢዛ ማታን ኤቂ ዲዛ ኢዛ አይሌቲ ኡባይ ባንታ ማይኦ ዳኪዳ።

32 ገዶ አቲን ዳዊቲ ኢሻ ሻማኤ ና ኢዮናዳቤይ፥ «ካዎ ናይታ ኡባ ዎዲ ወርሲዳ ሚሳቲሲዲ ታ ጎዳይ ቆፖፎ፤ ኢዛ ሚሾ ቲኢማሮ ዎልቃንሒ ኦይኪዳ ዎዴፕ ዶሚዲ አቤሴሎሜይ ገዲ ዴንዲዳ ዮኦ ገዲዳ ገሻስ አሚኖኔይ ጸላ ሃይቂዴስ።

33 ሃይቂዳይ አሚኖኔ ጸላ ገዲዳ ገሻስ፥ «ካዎ ናይቲ ኡባይ ሃይቂዳ» ጌቴቲዳይሳ ካዎይ ታ ጎዳይ አማናናስ ቤሴና» ገዴስ።

34 አቤሴሎሜይ ኤሶን ባቃቲዴስ።

ዛቤ ናገዛይሲ ጾቂ ገ ጸሊሺን ኢዛፕ አርሼይ ወሊዛ ባጋራ ዲዛ ኦጌራ ዳሮ አሳቲ ዙማ ሚሌራ ዴጌ ዎዲሺን ቤኢዴስ። ዛቤ ናገዛይሲ ቢዲ ካዎዛስ፥ «ሆሮናዬ ባጋራ ዙምቡላታ ቲጸራ አሳይ ዴጌ ቢሺን ታ ቤኣይስ» ገ ዮቲዴስ።

35 ኢዮናዳቤይ ዳዊቲስ፡ «ቤኣ ካዎ ናይቲ ዪዳ፤ ካሴ ኔ ኣይሌይ ጊዳይሳ ማላ ሃኒደስ» ጊደስ።

36 ኢዚ ቡሮ ዮቲ ዉርሶንታ ዲሺን ካዎዛ ናይቲ ዋሲሼኔ ዬኪሼ ጌሊዳ፤ ሄሳዶካ ካዎዚኔ ኢዛ ኦሳንቻቲ ኡባይ ኬሂፔ ዬኪዳ።

37 ኣቤሴሎሜይ ጋንጊዲ ጌሹሬ ካዎ ኣሚሁዴ ና ታሊማዬኮ ቢደስ፤ ጊዶ ኣቲን ዳዊቲ ሃይቂዳ ናዛ ጊሻስ ኡባ ዎዴ ዬኪሼ ጋምኢደስ።

38 ኣቤሴሎሜይ ጋንጊዲ ጌሹሬ ቢዲ ሄን 3 ላይላ ኡቲደስ።

39 ካዎ ዳዊቲ ባ ና ኣሚኖኔ ሃይቆን ጋኪዳ ካዮቲላፌ ሚኔቲዳፔ ጉዬ ኣቤሴሎሜኮ ባና ኢዛ ዎዚናይ ዴንዲደስ።

14

ዬሩሳሌም ኣቤሴሎሜ ሲሞ

1 ካዎ ዳዊቲ ኣቤሴሎሜ ላሞቲዳይሳ ጹሪያ ና ኢዮኣቤይ ኤሪደስ።

2 ሄሳ ጊሻስ ኢዮኣቤይ ኢሲ ኣስ ቱቁሄ ከቲዲ ኢሲ ዎዚናማ ማጨስ ኤሂሲደስ፤ ኢዞ፡ «ኔኒ ካዮቲዛ ኣስ ሚሳታናስ ካዮ ማይኦ ማይኣ፤ ቁባቲ ቲዬቶፋ፤ ሃይቂዳ ኣሳስ ዳሮ ዎዴ ካዮታሼ ዲዛ ማጨስ ሚሳታ ቤታ።

3 ሄሳፌ ጉዬ ካዎዛኮ ባዳ ታ ኔስ ዮቲዛይሳ ኢዛስ ዮታ» ጊዲ ኢዛ ዮታና ቃላታ ኢዮኣቤይ ኢዚስ ዮቲደስ።

4 ቱቁሄ ዴሬ ማጨሳያ ካዎዛኮ ጌላዲስ፤ ሲንሳ ጉል ጉፋናዳ ቦንቾ ሳሮካ ኢሚዳፔ ጉዬ፡ «ካዎንቶ ታና ማዲቲ!» ጋዲስ።

5 ካዎዚካ ኢዞ፡ «ኔና ኣዜ ማቲዳይ?» ጊ ኦይቺደስ። ኢዛካ ዛራዳ፡ «ታኒ ቱማፔ ኣዚናይ ሃይቂዳ ኣምኦ።

6 ታስ ኔ ኣይሌይስ ናምኡ ኣቱማ ናይቲ ዴቲስ፤ ናምኣቲ ባ ጋርሳን ኢሶይ ኢሳራ ዴምባን ኦዬቲዳ፤ ኢስታ ኣሼቺዛይ ባይንዳ ጊሻስ ኢሶይ ሃንኮይሳ ሾጪ ዎዲደስ።

7 ሂሰቲን ዳቦቲ ኡባይ ኔ ኣይሌይ ቦላ ዴንዲዳ፡ «ባ ኢሻ ዎዲዳይሳ ኑስ ሃ ኣላ ኢማ፤ ኢዚ ባ ኢሻ ዎዲዳ ጊሻስ ኩኒካ ኢዛ ዎዳና፤ ሄሳፌ ጉዬ ኔኒ ላታይ ባይንዳሮ ጊዳና» ጌቲስ፤ ሄሳ ጊሻስ ታስ ኣቲዳ ኢሲ ጸምፔዛ ዳይሲዲ ታ ኣዚናዛ ቢታ ቦላ ሱንላ ባይንዳኔ ዛሬይ ባይንዳ ቶንላ ኬሳና ሃኔቲስ» ጋዲስ።

8 ካዎዚካ ማጨሳዮ፡ «ኔኒ ሲማ ኔሶ ባ፤ ታ ኔ ኦይቺ ጊሻስ ቤሲዛ ኣዛዞ ኢማና» ጊደስ።

9 ጊደ ኣቲን ቲቁሂ ዳሬ ማጫሳያ፡ «ታ ጎዳ ካዎ! ቆሆዚ ታ ቦላኔ ታ ኣዎ ኩላን ጋኮ፤ ካዎይኔ ኢዛ ኣራታይ ቆሆፕፕ ጌዱይታ ጊዴቶ» ጋዱሰ።

10 ካዎዚካ ኢዚሰ፡ «ኦኒካ ኔ ቦላ ኢሲ ሚሽ ሃሳይዛ ጊዱኮ ሃ ታኮ ኤካ ያ፤ ዛሪ ኔና ዋዪሴና» ጊዴሰ።

11 ኢዛ፡ «ሱላ ኣጨዛይቲ ታ ናዛ ዎጂዲ ካሴፔ ኣጂዛ ቆሆ ጋጾንታ ማላ ካዎይ ጎዳ ባ ጸሳ ዎሶ» ጋዱሰ።

ካዎዚካ ኢዚሰ፡ «ጎዳይ ቤኢን፡ ኔ ናዛ ሁኤ ኢሰኩፌ ኢሲናካ ቦሼቱኩ» ጊ ጫቂዴሰ።

12 ሄሳፌ ጉዬ ማጫሳያ፡ «ታ ኔ ኣይሌያ ታ ጎዳሰ ካዎሰ ኢሲ ቃላ ዮታና ማላ ኤሮ ጋርኪ!» ጋዱሰ፤ ኢዚካ፡ «ኤሮ ዮታ» ጊዴሰ።

13 ማጫሳያ ዛራዳ ኢዛሰ፡ «ኔኒ ሃይሳ ማላ ዮኦ ጸሳ ዳራ ቦላ ኣዛሰ ቆፓዲ? ካዎዚ ዳሬፔ ጎዴቲ ቤቲ ቢዳ ባ ናዛ ዛሪቤና፤ ሂሰቲን ሄሳ ኢዚ ዮቲሼ ባርካ ባ ቦላ ፐርዲቤን?

14 ቢታን ጉኪዳ ሃሊ ሲሞንታይሳሶ ኮኒ ኡባይካ ሃይቆሰ፤ ጸሲ ቢታፌ ጎዴቲዳ ኣሲ ኢዛ ሲንሳፌ ባቃቲ ቢዳሶን ኣቶንታ ማላ ሲሚ ያና ኦጌ ኢዛሰ ገገሴሰ ኣቲን ኢዛ ሼምፖይ ጳያና ማላ ኮዬና።

15 «ሃኢካ ታ ሃይሳ ዩዳይ ዳሬዚ ታና ባቢሲዳ ጊሻሰ ሄሳ ታ ጎዳሰ ካዎሰ ዮታናሳ፤ ታ ኔ ኣይሌያ፡ ታ ካዎዛሰ ዮታና፤ ኢዚካ ታ ኦይቺዳይሳ ፖላናሰ ዳንዳይዛ ጊዳና።

16 ጸሲ ኦሰ እሚዳ ጸንጾፌ ታናኔ ታ ናዛ ሾዳናሰ ዴንዲዳ ኣዴዛ ኩሼፔ ካዎዚ ባ ኦሳንቻዮ ኣሻናሰ ኤኖ ጋና ጋ ቆፓዲሰ።

17 «ሃኢካ ታ ኔ ኣይሌያ፡ ካዎይ ታ ጎዳዚ ሎኦ ኢታፔ ሻኪ ኤሮን ጸሳ ኪታንቻ ማላ ጊዲዳ ጊሻሰ ታ ጎዳ ካዎዛ ቃላይ ታና ሚንሌሶ፤ ጎዳ ኔ ጸሳይ ኔናራ ጊደ» ጋዱሰ።

18 ሄሳፌ ጉዬ ካዎዚ ማጫሳዮ፡ «ታኒካ ኔና ኦይቺዛ ኦይሻታሰ ዛሮ ታፔ ቆቶፋ» ጊዴሰ።

ማጫሳያካ፡ «ኤሮ፡ ታ ጎዳይ ካዎይ ኦይቻ» ጋዱሰ።

19 ካዎዚካ ዛራዲ ኢዞ፡ «ሃ ኡባን ኢዮኣቤ ኩሼይ ዴኔ?» ጊ ኦይቺዴሰ።

ማጫሳያ ዛራዳ፡ «ታ ጎዳ ካዎዞ ኔ ኣሾ፤ ታ ጎዳ ካዎይ ሃሳይዳ ኡባፌ ሃዲርሰኔ ኡሻቾ ጊዛይ ዳና፤ ኤ ታ ሃይሳ ኡባ ሃሳያና ማላ ታና ኣዛዚዳይኔ ሃ ኡባ ቃላይ ኔ ኣይሌይ ዶናን ሃሳዬታና ማላ ታና ኪቲዳይ ኔ ኦሳንቻ ኢዮኣቤ።

20 ኔ ኦሳንቻ ኢዮኣቤይ ሃይሳ ኦሊዳይ ዲዛ ሃኖታ ላማና ኮዪዳ ጊሻሳ፤ ጊዶ ኣቲን ታ ጎዳሰ ጸሳ ኪታንቻታሰ ዲዛ ኣፆ ኤራቴሊ ዲዛ ጊሻሰ ቢታይ ቦላ ሃኒዛ ሚሽ ኡባ ኢዚ ኤሬሰ» ጋዲሰ።

21 ካዎዚካ ኢዮኣቤሰ፡ «ኤሮ ሎኦ፤ ኤሮ፤ ባዳ ናቴላዛ ኣቤሴሎሜ ዛራ ኤካ ያ» ጊዳሰ።

22 ኢዮኣቤይካ ቦንቾ ሳሮካ ካዎዛሰ ቆንጨሳናሰ ዲጌ ቢታ ቦላ ጉፋኒዲ ሳሮኪዳሰ፤ ካዎዛ ኣንጂዳሰ፤ ካሌሊዲ ኢዮኣቤይ፡ «ካዎዚ ባ ኦሳንቻዛ ዎሳ ኤኪዳ ጊሻሰ ኔ ኣይሌይ ኔ ሲንላን ቱማ ዴሚዳይሳ ሃቶ ኤሪዳሰ» ጊዳሰ።

23 ሄሳፌ ጉዬ ኢዮኣቤይ ጌሹሬ ቢዲ ኣቤሴሎሜ ዬሩሳላሚ ዛሪ ኤሂዳሰ።

24 ካዎይ ጊዲኮ፡ «ባሶ ቦ፤ ኢዚ ታ ኣይፌሶ ቤኣናሰ ዳንዳዬና» ጊዳሰ፤ ሄሳ ጊሻሰ ኣቤሴሎሜይ ባሶ ቢዳሰ፤ ካዎዛ ኣይፌሶካ ቤኢቤና።

ኣቤሴሎሜይ ካዎዛራ ማቃይኒዳ ማቃይኖ

25 ኣቤሴሎሜ ማላ፡ ማላ ሎኦይ ኩሜላ ኢሰራኤሌ ኣሳ ጋርሳንካ ዴና፤ ኢዛሰ ሁኤ ቢናናፔ ቢዲ ቶሆ ጸጉንሕ ጋካናሰ ቦሬይ ዴና።

26 ሁኤ ኢሰኬይ ኢዛ ዴጂሺን ላይላን ኢሲቶ ጫኪሴሰ፤ ጫኬቲዳ ቢናናዚ ካዎ ኬላ ሜዛኔን ዎሊሺን 200 ሳቂሌ * ዴዴሰ።

27 ኣቤሴሎሜሰ ተኢማሮ ጌቲቲዛ ኢሲ ማጫ ናይኔ ሄቹ ኣቲማ ናይቲ ዬሌቲዳ። ማጫ ናያ ኬሃ ማላ ሎኦ።

28 ኣቤሴሎሜይ ካዎዛ ቤኦንታ ዬሩሳላሚን ናምኡ ላይሕ ኡቲዳሰ።

29 ሄሳፌ ጉዬ ኢዮኣቤይ ካዎዛኮ ባና ማላ ኣቤሴሎሜይ ዴይጊሲዳሰ፤ ኢዮኣቤይ ጊዲኮ ኢዛኮ ያና ኮዪቤና፤ ናምኣንሶካ ዛሪዲ ዴይጊሲዳሰ፤ ኢዮኣቤይ ያና ኮዪቤና።

30 ሂሰቲን ኣቤሴሎሜይ ባ ኣይሌታሰ፡ «ቤኢቲ፤ ኢዮኣቤ ጋዴይ ታ ጋዴሪ ቆሳ፤ ኢዛ ጋዴን ማጸ ጋኪዳ ባንጋይ ዴሰ፤ ቢዲ ኢዛን ታማ ዬዲቲ» ጊዳሰ፤ ሄሳ ጊሻሰ ኣቤሴሎሜ ኣይሌቲ ቢዲ ኢዮኣቤ ካላ ታማን ጸጊዳ።

31 ሄሳፌ ጉዬ ኢዮኣቤይ ኣቤሴሎሜሶ ቢዲ፡ «ኔ ኣይሌቲ ኣይሰ ታ ካላ ታማን ጸጊዶ?» ጊ ኦይቺዳሰ።

* 14:26 200 ሳቂሌ ጊዛይሲ 2 ኪሎ ላጌ ጊዳሰ።

32 አቤሴሎሜይ ኢዮአቤስ ዛሬዲ፡ «ታኒ ኪቲን ኔኒ ዮንታ ኢጲዳ ገሻሳ፤ ሃኖ ጋካናስ ታ ሄን ዲዛኮ ታስ ሎኦ ጊዳና ጊዳስ ጋዳ ኔ ካዋስ ዮታና ማላ፡ ታ ኔና ካዋዛኮ ዬዳና ኮያዳ ኔና ሃያ፡ ጋዳ ጴይጊሳዲስ፤ ሃኒ ጊዲኮ ታ ካዋዛ አይፊሶ ቤኣና ኮያይስ፤ አይ ሞሮይ ታ ቦላ ቤቲኮ ኢዚ ታና ዋዶ» ጊዳስ።

33 ኢዮአቤይ ካዋዛኮ ቢዲ ሄሳ ኢዛስ ዮቲዳስ፤ ሄሳፌ ጉዬ ካዋዚ አቤሴሎሜ ጴይጊሲዳስ፤ ኢዚካ ዬዲ ካዋዛ ሲንፋን ጉፋኒዲ ሳርኪዳስ፤ ካዋዚካ አቤሴሎሜ ዬሪ ኤኪዳስ።

15

አቤሴሎሜ ማካላቲል

1 ሄሳፌ ጉዬ አቤሴሎሜይ ፓራ-ጋሬኔ ፓራታ፡ ሄሳፋካ ኢዛፔ ሲንፋራ ዋጽናስ 50 አሳታ ባስ ገገሲዳስ።

2 አቤሴሎሜይ ማላዶ ዋንታራ ዳንዲዲ ካታማ ፔንጌ ጌልልዛ ኦጌ ጋጸን ኤቂ ናጌስ። አይ አሲካ ባ ሚሻ ካዋስ ማጋኒዲ ፒርዲሳና ዬዛ ዋዴ ኡባን አቤሴሎሜይ ኢዛዴ ባኮ ጴይጌ ጴይጊዲ፡ «ኔ አዋ ካታማፔ ያዲ?» ጊ ኦይቹስ፤ ሄ ኦይቹቲዳ አዳዚካ፡ «ታ ኔ ኦሳንቻይ ኢሰራኤሌ ቆሞታ ጋርሳፌ ኢሳፌ ያዲስ» ጊ ዛሬስ።

3 ሄሳፌ ጉዬ አቤሴሎሜይ ኢዛስ፡ «ቤኣ! ኔ ማጋናዚ ሊኬኔ ቤሲዛዛ፤ ጊዶ ኣቲን ካዋ ዋካሌታፔ ሃይሳ ጸላና ኣሲ ኔስ ዳና» ጌስ።

4 ካሌልዲካ፡ «ታኒ ሃኖ ቢታይ ቦላ ፒርዲዛ ዳና ጊዳ ሹሜቲዳኮ ኣዜ ዲዛይ? ማጋናይ ዋይኮ ሞቶይ ዲዛ ኣሲ ኡባይ ታኮ ዬዲ ሱሬ ፒርዳ ዳማና ማላ ታ ኦፋናኮሺን» ጌስ።

5 ሄሳፋካ አይ አሲካ ኢዛኮ ሺቂዲ ሳርኪዛ ዋዴ አቤሴሎሜይ ባ ኩሼን ኢዲሚ ኦይኪዲ ዬሬስ።

6 ካዋዛኮ ሱሬ ፒርዳ ዳማናስ ዬዛ ኢሰራኤሌ ኣሳ ኡባኮ አቤሴሎሜይ ሄሳፋ ሃኒ ሃኒ ሺቂዛ ገሻስ ኢሰራኤሌ ኣሳ ዋዚና ኤኪዳስ።

7 ኦይዲ ላይፋፌ ጉዬ አቤሴሎሜይ ካዋዛ፡ «ታኒ ኣዲኔቲዳ ኣዲና ጋፋናስ ኬብሮኔ ባናስ ታስ ፒቃዴ አማ።

8 ታኒ ኔ ኦሳንቻይ ኣራሚ ዳሬን ጌሹሬን ዳሼ፡ «ሳዲይ ታና ዬሩሳላሚ ዛሬዛ ጊዲኮ ጎዳስ ኬብሮኔን ጎይናና) ጋ ኣዲኔታዲስ» ጊዳስ።

9 ካዋዚ ኢዛ፡ «ሳርን ባ» ጊዳስ፤ ሄሳ ገሻስ አቤሴሎሜይ ኬብሮኔ ቢዳስ።

10 ሄሳፌ ጉዬ አቤሴሎሜይ፥ «አንተ ዛፄ ጌሪስ ሲዪዛ ዎዴ፥ (አቤሴሎሜይ ከብርኔን ካዎቲዳስ) ጌቱ ጋና አሳንቻታ ኩሜላ ኢስራኤል ቆሞታ ኡባ ጌዶን ቆታራ ዋሏደስ» ጌዴስ።

11 ዬሩሳላሜፔ 200 አሳቲ ኢዛራ ኢሲፌ ቢዳ፤ ኢስቲ አማላቴላ ያይጌቲዲ አሽኬቴላን ቢዳ አቲን ኢስቲ ዮኦዛ ጊሻስ አይኮካ ኤሪዛ ሚሺ ዴና።

12 አቤሴሎሜይ ያርሾዛ ሺሺዛ ዎዴ ዳዊቱ ዞሪዛ ጌሎ ዴሪ አስ አክጾፌሌ ባ ቢታ ጌሎፔ ኢዛኮ ያና ማላ ከቲዴስ፤ ሄሳ ጊሻስ ሴራዚ ሚኒዴስ፤ አቤሴሎሜ ካሊዛይታ ቆዳይ ጉጃቲ ጉጃቲ ቢዴስ።

ዳዊቱ ባቃታ

13 ከቲቲዛይሲ ዪዲ፥ «ኢስራኤል አሳ ዎዚናይ አቤሴሎሜራ ዴስ» ጌዲ ዳዊቱስ ዮቲዴስ።

14 ሄሳፌ ጉዬ ዳዊቲ ባ ሹሜ ኡባታስ፥ «ዴንዲቲ፤ እኔ ባቃቶስ፤ ኑ ሂስቶንታ አጊኮ ኑፔ ኢሳዴይካ አቤሴሎሜ ኩሼፔ ኬሲ ኤኪ አቲና፤ ሃኢራ ኑ ሃይሳፌ ኬዛና ቤሴስ፤ ኑ ሂስቶንታ አጊኮ ካሌቲ ዪዲ ኑና ኦይኪኮ ኢዚ ኑና ቋይሳና፤ ካታማዮካ ማሻን ሲፋና» ጌዴስ።

15 ካዎዛ ሹሜቲካ፥ «ኑ ካዎይ ኮዪዲይሳ ኡባ ኦላናስ ኑኒ ኔ አሳንቻቲ ጊጌቲ ኡቲዶስ» ጌ ዛሪዳ።

16 ካዎዚ ባሶ አሳ ኩሜላራ ኬዚ ቢዴስ፤ ካዎቴላ ኬላ ናጋና ማላ 10 ላጌሶታ ዋሏዴስ።

17 ሄሳ ጊሻስ ካዎይ ኩሜላ አሳራ ሃኪ ቢዳፔ ጉዬ ሄን ኢሲሶን ኤቂዳ።

18 አሳይ ኡባይ ኬሊቲቲኔ ፔሊቲቲ ሄሳላካ ጌቲፔ ኢዛራ ዪዳ 600 አሳታ ጉጃን ሳልፊዲ ካዎዛ ሲንላ አጂዳ።

19 ካዎዚ ጌቲ ዴሪ አስ ኢታዬይ፥ «ኔ ኑናራ አይስ ያዲ? ሲማዳ ካዎ አቤሴሎሜራ ኢሲፌ ኡታ፤ ኔኒ ኔ ሁኤስ ኔ ቢታፌ ዲኤታ ዪዳ አማላ።

20 ኔኒ ሃኢ ዚኔ ያዳሳ፤ ሂስቲን ታ ታስ አዋ ቢዛኮ ኤሮንታ ዳሼ ኔ ኑናራ ቶይላታና ማላ አይስ ኦሶ? እኔ ሃኢ ኔኒ ኔ አሳታ ኤካዳ ጉዬ ሲማ፤ ሎኤቴሊኔ አማኔቴላይ ኔናራ ጌዶ» ጌዴስ።

21 ጌዶ አቲን ኢታዬይ፥ «ዴኦ ጎዳይ ቤኢን፤ ሄሳላካ ታ ጎዳ ካዎ አሹ፤ ዴኦ ጌዲን ሃይቆ ጌዲን አዋንካ ታ ጎዳ ካዎይ ሃኒዛይሳ ታኒ ኔ አይሌዚ ሃናና» ጌ ዛሪዴስ።

22 ዳዊቲካ ኢታዬ፡ «ሂስቲኮ ሲንሐ ኣቆ ባ» ጊዴስ፤ ሄሳ ጊሻስ ጌቲ ዴሬ ኣስ ኢታዬይ ባ ኣሳታኔ ባናራ ዲዛ ባሶ ኣሳታ ኤኪ ቢዴስ።

23 ዴሬይ ኡባይ ኣቋ ቢዛ ዎዴ ሄ ዴሬ ኣሳይ ዋሲሼ ዩኪዴስ፤ ካዎዚ ቄዲሮኔ ዙሌዛ ፒኒዴስ፤ ኣሳይ ኡባይ ፒኒዲ ባዞ ቢታ ቢዴስ።

24 ሳዶቂይካ ሄን ዴስ፤ ኢዛራ ኢሲፌ ዲዛ ሌዌቲ ኡባይ ጸሳ ጫቆ ቃላ ታቦታ ቶኪዳ፤ ኢስቲካ ዛሪዲ ጸሳ ጫቆ ቃላ ታቦታዛ ዎሊዳ፤ ኣቢያታሬይ ኣሳይ ኩሜሐ ካታማዮ ዬዲ ኬዛናሼ ጋካናስ ያርሾ ሺሺዴስ።

25 ሄሳፌ ጉዬ ካዎዚ ሳዶቂ፡ «ኔኒ ጸሳ ጫቆ ቃላ ታቦታዛ ኤካዳ ጉዬ ካታማዮ ሲማ። ታኒ ጎዳ ሲንሳን ኣዮቲዳ ጊዲኮ ኢዚ ታና ዛሪዲ ታቦታዛኔ ኢዛ ኣቆሶዛ ታ ቤኣና ማላ ጋላና።

26 ጊዶ ኣቲን ኢዚ፡ «ታ ኔናን ኡፋዬታቤኬ» ጊዛ ጊዲኮ ባስ ሎኦ ሚሳቲ ቤቲዲይሳ ታ ቦላ ኦሶ፤ ታኒ ኤካናስ ጊጌታ ኡታዲስ» ጊዴስ።

27 ቃሴካ ካዎዚ ቄሴ ሳዶቂ፡ «ኔኒ ናቤ ጊዲኪ? ሂስቲኮ ኔኒ ኔ ና ኣከማሴኔ ኣቢያታሬ ና ዮናታኔ ኔናራ ኤካዳ ሳሮን ጉዬ ካታማዮ ሲማ፤ ኔኒኔ ኣቢያታሬይ ናምኣቲ ኢንቲ ናይታ ኤኪዲ ቢቲ።

28 ታኒካ ኔፔ ዎሬ ሲያና ጋካናስ ባዞን ዲዛ ሻፋ ፒኒዛሶን ናጋና» ጊዴስ።

29 ሄሳ ጊሻስ ሳዶቂይኔ ኣቢያታሬይ ጸሳ ጫቆ ቃላ ታቦታ ጉዬ ዩሩሳላሜ ዛሪዲ ሄን ታኪዳ።

30 ጊዶ ኣቲን ዳዊቲ ዩኪሼ ፑዴ ዳብራዛይቲ ዙማ ፑዲንሳ ኬዚዴስ፤ ባ ሁኤ ጉሉንቲዲ ሜላ ቶሆራ ዴስ፤ ኢዛራ ኢሲፌ ዲዛ ኣሳይ ኡባይ ኢዛይሳሶ ባንታ ሁኤ ጉሉንቲዲ ዩኪሼ ፑዲንሳ ኬዜቲስ።

31 ሄ ዎዴ፡ «ሴራ ጊዶን ኣቤሴሎሜራ ዲዛይ ኣክጾፌሌ» ጊ ዳዊቲስ ዮቲዳ፤ ሄሳ ጊሻስ ዳዊቲ፡ «ኣቤት ጎዳዉ! ኣክጾፌሌ ዘሬዛ ሃዳ ሂሳታርኪ» ጊ ዎሲዴስ።

32 ዳዊቲ ዴሬይ ጸሳ ጎይኒዛሶሆ ፑዴ ዙማ ካራ ጋኪሺን ኣርኬ ዴሬ ኣስ ሁሼይ ባ ማይኦ ዳኪዲ ባ ሁኤ ቦላ ጉዲላ ላሊዲ ኢዛራ ጋይታናስ ዩዴስ።

33 ሄሳፌ ጉዬ ዳዊቲ ኢዛ፡ «ኔኒ ታናራ ኢሲፌ ቢኮ ታስ ቶሆ ጊዳና፤

34 ገደ አቲን ኔኒ ጉዬ ካታማዮ ሲማዳ አቤሴሎሜስ፡ ታ ኔ አይሌ ገዳና፤ ካሴ ታኒ ኔ አዋስ አይሌ ገዲዳ ማላ ሃቺካ ታ ኔስ ሃጋዛና፤ ጋዳ አክጾፌሌ ዞሬ ኔ ላላዳ ታና ማዳና።

35 ቄሴቲ ሳዶቄይኔ አቢያታሬይ ሄን ኔናራ ዳና ዴቴኔ? ካዎ ኬላፌ ኔ ሲዩዳይሳ ኡባ ኢስታስ ዮታ።

36 ሳዶቄ ና አከማሰኔ አቢያታሬ ና ዮናታኔይ ናምኡ አቱማ ናይቲ ሄን ኢስታራ ዴቴስ። ኔ ሲዩዛ ኡባ ታስ ኢስታ ቦላ ኪታ ዬዳ» ገዴስ።

37 ሄሳ ገሻስ ዳዊቴስ ሲቆ ላጌ ሁሼይ አቤሴሎሜይ ዩሩሳላሜ ጌሊዳ ማላ ሄ ጋኪዴስ።

16

ዳዊቲኔ ጸባ

1 ዳዊቲ ዙማፔ ጉል አፏ ቢዳ ማላ ጸባ ጌቲቲዛ ሜምሬቦስቲ ኦሳንቻይ 200 ሶሎ፡ ዛቢቤፔ ኡኬቲዳ ቄሪ ኡኬል ጴታታ፡ ባላሴፔ ኡኬቲዳ 100 ቄሪ ኡኬልኔ ኢሲ ሉካሞ ኩሜል ዎይኔ ኡሺ ጫኔቲዳ ናምኡ ሃሬታ ላጊ ኤኪዲ ኢዛራ ጋይታና ዩዴስ።

2 ዳዊቲ ጸባ፡ «ሃይሳ ኡባ አዛስ ኤሃዲ?» ገ ኦይቺዴስ። ጸባይካ፡ «ሃሬታ ካዎ ኬላ አሳቲ ቶጋና ማላ፡ ሶሎዛኔ ኡኬላታ ናቲላቲ ማና ማላ፡ ዎይኔ ኡሻዛ ባዞን ዳቡሪዳ አሳይ ኡያና ማላ ኤሃዲስ» ገዴስ።

3 ሄሳፌ ጉዬ ካዎዚ፡ «ኔ ጎዳ ናዚ አዎኔ?» ገ ኦይቺዴስ።

ጸባይ ዛሪዲ፡ «ኢዚ፡ ሲሰራኤል አሳይ ሃች ታ አዎ ካዎቴል ታስ ዛራና፤ ገ ቆፒዳ ገሻስ ሃኢ ዩሩሳላሜን ኡቲዴስ» ገዴስ።

4 ሄሳፌ ጉዬ ካዎዚ ጸባስ፡ «ካሴ ሜምሬቦስቲስ ዲዛይ ኡባይ ሃይሳፌ ጉዬ ኔሳ» ገዴስ፤

ጸባይ፡ «ዳሮ አሽኬቴላን ሲንሳ ጉል ጉፋናዳ ታ ኔስ ኩሼ ዴንላና፤ ካዎ ታ ጎዳዉ ኔ ሲንላን ታስ አዮቴል ቤቶ» ገዴስ።

ሺምኤ ዶቄል

5 ካዎ ዳዊቲ ባሂሪሜ ጋኪሺን ሳኦሌ ኬላ አሳ ቆዋፌ ኢሳዴይ ፑቱ ገዴስ፤ ኢዚካ ጌራ ና ሺምኤ፤ ኢዚ ዶቄሼ ኬዚዴስ።

6 ካዎዛ ዎታዳራቲኔ ካዎ ቦንቾ ናጊዛ ዛቤቲ ኡባይ ዳዊቴፔ ሃዲርሳ ባጋራኔ ኡሻቻ ባጋራ ዲሺንካ ዳዊቲ ቦላኔ ኢዛ ሹሜታ ቦላ ሹቾ ጫዲዴስ።

7 ሸምኤይ ኢዛ ደቂሼ፥ «ኬዛ! ሃይሳፌ ኬዛ! ሃይሶ ሸምፖ ዋጂዳይሶ! ሃይሶ ኢታዞ!

8 ኢዛፔ ኔ ካዋቲላ ዋላ ኤኪዳ ሳኦሌ ኬላ ኣሳ ኡባ ሱላ ጎዳይ ኔ ቦላ ዛሪሼ ዴሰ። ጎዳይ ኔ ካዋቲላ ኔ ና ኣቤሴሎሜስ ኣሊ ኢሚዴስ፤ ኔኒ ሸምፖ ዋጂዳ ኣሰ ጊዲዳ ጊሻሰ ቤያ ኔ ቦላ ሜቶይ ዪዴስ» ጊዴስ።

9 ሄሳፌ ጉዬ ጹሪያ ና ኣቢሳዬይ ካዋዛስ፥ «ሃይሲ ሃይቁላ ካናይ፥ ካዋዛ ታ ጎዳ ዋስቲ ደቂኬ? ታ ፒና ባዳ ኢዛ ቆጶ ቃንጸና» ጊዴስ።

10 ጊዶ ኣቲን ካዋዚ፥ «ኢንቴኖ ጹሪያ ናይቶ! ኢንቴና ታናራ ጋሊዛ ኣይ ሚሽ ዲዜ? ጎዳይ፥ ላዊቲ ዶቃ፥ ጊን ኢዚ ታና ደቂዛ ጊዲኮ፥ (ሃይሳ ኣይሰ ኦላዲ?) ጊዲ ኢዛ ኦይቻና ዳንዳይዛይ ኦኔ?» ጊዴስ።

11 ሄሳፌ ጉዬ ዳዊቲ ኣቢሳዬኔ ባ ሹሜታ ኡባ፥ «ታ ጉልባቴፔ ኬዚዳ ታ ናዚ ታና ጳይሳና ኮይኮ፥ ሃይሳ ቢኒያሜ ቆሞዛ ጊሻሰ ኣይሰ ማላሌቲቲ? ሄሳ ጊሻሰ ኣጋጊቲ! ጎዳይ ኢዛ ዶቃ ጊዲ ዬዲዳ ጊዲኮ ዶቆ።

12 ጎዳይ ታ ካዉሻቲላ ቤኢዲ ሃቻ ዶቁላ ጊሻሰ ኢዚ ታሰ ሎኦ ኦላናኮ ኦኔ ኤሪዛይ» ጊዴስ።

13 ሄሳ ጊሻሰ ዳዊቲኔ ኢዛራ ዲዛ ኣሳይ ባ ኦጌ ሲንሐ ጉጂዴስ፤ ሸምኤይ ኢዛ ጊናራ ዲዛ ላዳራ ቢሼ ዶቁስ፥ ሹቕ ጫዴሲኔ ቢታ ኢዛ ቦላ ላሌስ።

14 ካዋዚኔ ኢዛራ ኢሲፌ ዲዛ ኣሳቲ ኡባይ ባንቲ ባና ጊ ቆፒዳሶ ጋኪዳ፤ ኬሂ ዳቡሪዳ ጊሻሰ ሄን ሸምፒዳ።

ሁሼይኔ ኣክጾፌሌይ ኢሚዳ ዞሪ

15 ሄ ዋዳ ኣቤሴሎሜይኔ ኢሰራኤሌ ኣሳይ ኡባይ ዬሩሳላሜ ዪዳ፤ ኣክጾፌሌይ ኢዛራ ኢሲፌ ዴስ።

16 ዳዊቲ ላጌ ኣርኬ ዴሪ ኣሰ ሁሼይ ኣቤሴሎሜኮ ዪዲ፥ «ካዋ! ሜርናስ ካዋታ! ካዋ! ሜርናስ ካዋታ!» ጊዴስ።

17 ኣቤሴሎሜይ ሁሼስ፥ «ኔ ላጌዛሰ ዲዛ ኣማኔቲላይ ኔሰ ሃኖ ጸላ? ኔ ኣይሰ ኔ ላጌዛራ ባቤኪ?» ጊ ኦይቺዴስ።

18 ሁሼይ ኣቤሴሎሜስ ዛሪዲ፥ «ሄሳ ታ ዋስታ ኦላኔ? ታኒ ጎዳን፥ ሃ ዴሬዛኒኔ ኢሰራኤሌ ኣሳ ኡባን ዶሬቲዳዴ ባጋ ጊዳና፤ ኢዛዴራ ኢሲፌ ዳና።

19 ሂሰቲን ታ ኢዛ ናዛሰ ሃጋዞንታ ኦናስ ሃጋዞ? ኔ ኣዋስ ታ ሃጋዚዳ ማላ ኔሰካ ሃጋዛና» ጊዴስ።

20 አቤሴሎሜይ አክጾፌሌ፡ «እኔ ኑስ ዘሬ ኢማ፤ ኑ አይ ኦሊኖ?» ጌዴሰ።

21 አክጾፌሌይ ኢዛስ ዛሪዲ፡ «ካዎ ኬላ ናጋና ማላ ኔ አዋይ አጊ ቢዳ ኢዛ ሳጌሶታራ ጌላ ዚንኣ፤ ሄሳፌ ጉዬ ኔኒ ኔ አዋ ኬሃ ኢጲዳይሳ ኩሜላ ኢሰራኤሌይ ሲዪኮ ኔናራ ዲዛ ኡባታ ቄሴይ ሚናና» ጌዴሰ።

22 ሄሳ ጊሻስ አቤሴሎሜስ ፖቄ ቦላ ዲንካኔ ቶሊዳ፤ ሄን ኩሜላ ኢሰራኤሌ ዴሬይ ቤኢሺን ባ አዋ ሳጌሶታራ ዚንኢዴሰ።

23 ሄ ዋዴ አክጾፌሌይ ኢሚዛ ዘሬይ ኡባይ ጸሳ ቃላይ ዘሪዛይሳ ሚሳቲ ቆዴቴሰ፤ ዳዊቲኔ አቤሴሎሜይ አክጾፌሌ ዘሬ ሄሳሶ ሂስቲ ኤኬቴሰ።

17

ሁሼይ አቤሴሎሜ ባሌሊዳ ባሌሶ

1 ሄሳፌ ጉዬ አክጾፌሌይ አቤሴሎሜስ፡ «ኔ አዋ ዬዴላናስ 12,000 ኣስ ታ ዶራዳ ሃቕ ኦማርስ ዬዳና።

2 ኢዚ ዳቡሪዲ ዋልቃ ኢጾቲዳ ዋዴ ታ ኢዛ ቦላ ዳፋ ዬጋናኔ ሺር ዬዳና፤ ሂስቲኮ ኢዛራ ኢሲፌ ዲዛ ዴሬይ ኢዛ አጊዲ ባቃታና፤ ታኒ ካዋዛ ጸላ ዋዳና።

3 ዴራ ኡባ ኔኮ ዛራና፤ ኔኒ ኮይዛይ ኢሲ ኣሳ ሃይቆ ጋሶን ኡባ ዴራ ኔኮ ዛራና ማላ ኦላና፤ ሄሳፌ ጉዬ ዴሬይ ሳርን ዳና» ጌዴሰ።

4 ኢዛ ዘሬዚ አቤሴሎሜኔ ኢዛራ ዲዛ ኢሰራኤሌ ጨማታ ኡባ ኡፋይሲዴሰ።

5 አቤሴሎሜይ ጊዲኮ፡ «ቃሴ እኔ ኣርኬ ዴሬ ኣስ ሁሼ ዴይጊዲ ኢዚ ጊዛይሳካ ሲዮስ» ጌዴሰ።

6 ሁሼይ ኢዛኮ ዪን አቤሴሎሜይ ኢዛስ፡ «አክጾፌሌይ ኑስ ሃይሳ ሃ ዘሬዛ ሺሺዴሰ፤ ሂስቲን ኑኒ ኢዛ ኦሊኖ? ኣካይ ጊኮ እኔ ኔ ቆፋ ኑስ ዮታ» ጌዴሰ።

7 ሁሼይካ አቤሴሎሜ፡ «አክጾፌሌይ ኔስ ኢሚዳ ዘሬይ ሃኒ ዋዴ ኔና ኬሲ ኤኬና።

8 ኔ አዋይኔ ኢዛ ኦላንቻቲ ሚኖ ኦላንቻታኔ ማራቲ ኢዚፔ ቦንቄቲቹዳ ዛርዶ ማላ ኢስቲ ባቢሲዛይሳ ኔካ ኤራሳ፤ ሄሳፌ ቦላራካ ኔ አዋይ ኦላን ኬሂ ሎሂዳ ኣሳ፤ ኦማርስ ባ ኦላንቻታራ ኣቄና፤

9 ሃኒ ዋዴ ኢዚ ኢሲ ጎንጎሎ ጊደን ዋይኮ ሃራሶን ቆቴቲ ኡቲዳ ጊዳና። ኢዚ ሲንፋቲዲ አሳ ቦላ ዳፋ ዩጊን ኔ አሳታፔ ጉፋቲ ሃይቁኮ ሄሳ ሲዱዳ ኡባይ፥ ላቤሴሎሜ ካሊዳ ኦላንቻቲ ዉሪዳ፤ ጊ ሃሳያና።

10 ኔ አዋይ ሚኖ ኦላንቻ፥ ኢዛራ ኢሲፌ ዲዛይቲካ ኦላ ቃራታ ጊዲዳይሳ ኢሰራኤል አሳይ ኡባይ ኤሪዛ ጊሻሰ ዋዚናይ ጋሞ ዋዚና ማላ ሙርታ ጌቴቲዳ ዋታዳራይካ ባቦን ባቂባቃና።

11 «ሄሳ ጊሻሰ ታ ኔና ዘሪዛ ዘሪይ ሃይሳ፤ ኢዛሰ ቆዳይ አባ ሻሚንታ ማላ ዳሪዳ ዳኔፔ ቢዲ ቤርሳቤሄ ጋካናሰ ዲዛ ኢሰራኤል አሳይ ኡባይ ኔኮ ሸቂኮ ኔኒ ኔ ሁኤራ ኦላ ካሌፋ።

12 ሂሰቲኮ ኢዚ ጌሊዳሶ ኡባ ጌሊዲ ኢዛ ቦላ ዳፋ ዩጋና፤ ጸዛይ ቢታ ቦላ ዋዲዛ ማላ ኑ ኢዛ ቦላ ዋዳና፤ ኢዛ ጊዲን ኢዛራ ዲዛ አሳታፔ ኢሳዳይካ ኬሲ ኤኪ አቴና።

13 ኢዚ ቢዲ ኢሲ ካታማይን ጌሊኮ ኢሰራኤላይ ኡባይ ዋዶሮ ኤኪ ቢዲ ኢሲ ሹቸካ ሄን አቶንታሼ ጋካናሰ ካታማዮ ዲጌ ላሊ ዩጋና» ጊዳሰ።

14 አቤሴሎሜይን ኢሰራኤል አሳይ ኩሜል፥ «አክጾፌሌ ዘሬፔ አርኬ ዳሬ አሰ ሁሼ ዘሪይ ሎኤሰ» ጊዳ፤ ጎዳይ አቤሴሎሜ ቦላ ባሽ ኤሃናሰ ሎኦ ጊዲዳ አክጾፌሌ ዘሪይ ኤኬቶንታ ማላ ኦሊዳሰ።

ዳዊቲ ኬሲ ኤኪ አቴል

15 ሁሼይ ቂሴ ሳዶቂኔ አቢያታሬ፥ «አክጾፌሌይ አቤሴሎሜይን ኢሰራኤል ጨማቲ አይ አይ ኦፋናሰ ቤሲዛኮ ኢሰታ ዘሪዳሰ፤ ታኒ ጊዲኮ ሃይሳ ሃይሳ ኦሊቲ ጋ ዘራዲሰ።

16 ሃኒ ኢዛሰ ኤሶን ከቲዲ፥ ሳዞን ዲዛ ሻፋ ፑርዴን አቆንታ ማላ፥ ጋሞኦንታ ኔ ኤሶን ፒናናሰ ቤሴሰ፤ ኔ ሂሰቶንታ አጊኮ ካዋዚኔ ኢዛራ ዲዛ ዳሬይ ኡባይ ኢንቴ ሚቴታና፤ ጊዲ ዳዊቲሰ ዮቴቲ» ጊዳሰ።

17 ሄ ዋዴ ዮናታኔይን አከማሲ ካታማ ጌሊኮ ኢሰቲ ቤታና ኤን-ሮጌሌን ናጌቴሰ፤ ኢሲ ጌላኦ አይሌ ዳራ ሄ ባዳ ኢሰታሰ ዮቴን ኢሰቲ ሄሳ ኤፊዲ ካዋ ዳዊቲሰ ዮቴቲሰ።

18 ጊዶ አቴን ኢሲ ናቴል ዳይሲ ኢሰታ ቤኢዲ አቤሴሎሜሰ ዮቴዳሰ፤ ሄሳ ጊሻሰ ናሞኦቲካ ኤሶን ዴንዲዲ ባሂሪሜን ዲዛ ኢሲ አዳዛሶ ቢዳ፤ አዳዛ ጊቤ ጊደን ኦላይ ዲዛ ጊሻሰ ኢሰቲ ሄ ኦላን ዋዲዳ።

19 ሄ አዳዛ ማቼያ ሚጨዛ ሚሽ ኤሃዳ ኢዛ ቦላ ካል ሚጨዲሰ፤ ሄሳ ኦኒካ ኤሪቤና።

20 አቤሴሎሜ አሳቲ ሄ ማጫሳይኮ ዪዲ፥ «አኪማሲኔ ዮናታኔይ አዋን ዲዞ?» ገ ኦይቺዳ።

ማጫሳያ ኢስታስ፥ «ሻፋ ፒኒ ቢዳ» ጋዱስ፤ ኢስቲካ ኮዪን ዳይዳ ገሻሰ ጉዬ ዬሩሳላሜ ሰሟዳ።

21 አሳቲ ቢዳ፤ ጉዬ ሃ ናምኦቲ ኦላፌ ኬዚዲ ቢዳ፤ ካዎ ዳዊቱስ፥ «አክጾፌሌይ ኔ ቦላ ሂዝጊ ሂዝጊ አሳ ዴንፎሊዛ ገሻሰ ዴንዳዳ ኤሶን ጌዴ ሻፋ ፒና» ገዳ።

22 ሄሳ ገሻሰ ዳዊቱኔ ኢዛራ ኢሲፌ ዲዛ ዴሬይ ኡባይ ዴንዲ ዮርዳኖሴ ፒኒዳ፤ ጋዴይ ዎንቲሺን ዮርዳኖሴ ፒናንታይ ኦኒካ ዴና።

23 አክጾፌሌይ ኢስቲ ኢዛ ዘሬዛ ኤኮንታ ኢዲዳይሳ ቤኢዲ ባ ሃሬዛ ጫኒ ኤኪዲ ባ ኬሊ ዲዛ ካታማ ቢዴስ፤ ባሶ ማራሲ ገግሲዳ፤ ጉዬ ባ ኩሼን ጨሌቲ ሃይቂዴስ፤ ሄሳሶ ሃይቂዲ ባ አዋ ዲፎን ሞጌቲዴስ።

24 አቤሴሎሜይ ኩሜሳ ኢስራኤሌ አሳራ ዮርዳኖሴ ፒኒሺን ዳዊቲ ማሃናይሜ ጋኪዴስ።

25 አቤሴሎሜይ ኢዮኦቤ ሶሆን አማሳ ኦላንቻታ ሃላቃ ሂስቲ ሹሚዴስ፤ አማሲ ኢስራኤሌ ዴሬ አስ ዮቶሬ ና፤ ዮቶሬይ ኢዮኦቤ አዮ፥ ጹሪያ ሚቾ፥ ናኦሴ ቢዮ አቢጋሎ ማቾ ኤኪዴስ።

26 ኢስራኤሌቲኔ* አቤሴሎሜይ ጋላኦን ዴንካኒዳ።

27 ዳዊቲ ማሃናይሜ ጋኪሺን አሞኔ ካታማ ኤራባፔ ዪዳ ናኦሴ ና ሾቤይ፥ ሎዲባሬፔ ዪዳ አምኤሌ ና ማኪሬኔ ኤርጊሊሜፔ ዪዳ ጋላኦ ዴሬ አስ ባርዚሌይ።

28 ሂጸ ሚንጸፌታ፥ ሹልኤታኔ ማና ሚሻታ ኤኪ ዪዳ፤ ሄሳሶካ ገሰቲኔ ባንጋ፥ ዲሌኔ ቲያ ጫጫ፤ ባኤላኔ ሚሲራ።

29 ኤስ፥ ሜቃ ማሐ፥ ዶርሳታኔ ፒላ ዳዊቲሲኔ ዴራስ ኢስቲ ማና ማላ ኤሂዳ። ኢስቲ ሄሳ ኦሊዳይ፥ «ዴሬዚ ባዞ ቢታን ኮሻቲዴስ፤ ዳቡርዴስ፤ ሳሜቲዴስ» ገዳ ገሻሳ።

18

አቤሴሎሜ ሃይቆ

1 ዳዊቲ ባናራ ዲዛ ዴራ ቆዲዴስ፤ ኢስታ ቦላ ሻላቃታኔ ማቶ ሃላቃታ ሹሚዴስ።

2 ሄሳፌ ጉዬ ዳዊቲ ጨጎ ገዲዛ ባ ኦላንቻታ ኢዮኦቤ፥ ናምኦንጶ ጨጎዛ ኢዮኦቤ ኢሻ ጹሪያ ና አቢሳዬ፥ ሄሻንጶ ጨጎዛ

* 17:26 ኢሲ ኢሲ ቢርሼላታን ኢስራኤሌ ገዛይሳ ኢስማኤሌ ጌቱስ። 1 ታሪ 2:17

ጌቱ ዳሬ አስ ኢታዬ አዛዞን አቃና ማላ ከቲደሰ። ካዎዚ ባ ኦላንቻታስ፡ «ቱማፔ ታኒካ አንቴናራ ኬዛና» ጌደሰ።

3 አሳቲ ጌዲኮ አዛ፡ «ኔኒ ኑናራ ኬዛናሰ ቤሴና፤ ኑና ባቃቲሲዛ ሚሺ ዲኮ አሳይ ሄሳ ጌታ ሚሻን ቆዴና፤ ሃራይ አቶሺን ኑፔ ባጋይ ሃይቄኮካ ኢስቲ ዉዲ ጌቱና፤ ኔኒ ኔርካ ኑፔ ታሙ ሺያታፔ አቆሳ፤ ሄሳ ጌሻስ ኔኒ ካታማን ኡታዳ ኑና ማዲኮ ሎኦ» ጌዳ።

4 ካዎዚካ፡ «አንቴስ ሎኦ ሚሳቲ ቤቲዛ ኡባ ታ ኦላና» ጌደሰ። ሄሳ ጌሻስ ዳሬይ ኡባይ ጾታን ጾታን፡ ሺያን ሺያን ሻኬቲ ሻኬቲ ሳልፊ ኬዚዛ ዎዴ ካዎዚ ጊምቤዛ ፔንፔን ኤቂ ደሰ።

5 ካዎዚ አዮአቤ፡ አቢሳኔ ኢታዬ፡ «ታ ጌሻስ ጌዲ ታ ናዛ አቤሴሎሜ ቦላ ኢሲ ሜቶካ ጋሶፍቲ» ጌ አዛዚደሰ። ካዎዚ ባ ና አቤሴሎሜ ጌሻስ አዛዚዛይታስ ኢሳስ ኢሳስ አዛዘ አሚሺን ኡባ ኦላንቻቲካ ሲዱዳ።

6 ኦላንቻቲ ኢሰራኤሌ ኦላናሰ ሳልፊዲ ኬዚዳ፤ ኦላዛ ኤፍሬሚ ዎራ ጌደን ኦሌቲዳ።

7 ሄን ኢሰራኤሌ አሳይ ዳዊቲ ኦላ አሳን ጸኔቲደሰ፤ ሄ ጋላስ ኬሂ ዳርቲ ሃይቄዳ፤ 20,000 አሲ ሃይቄደሰ።

8 ኦላይ ዳራ ጋርሳን አኪ አኪ ቢደሰ፤ ሄ ጋላስ ኦላይ ወርሲዳይሳፊ ዎራይ ሚቲ ቆይሲዳ አሳይ ዳሬሰ።

9 ሄ ዎዴ አቤሴሎሜይ ዳዊቲ አሳራ ቶሮንታ ዲሺ ጋይቲደሰ፤ አቤሴሎሜይ ባቁሎ ቶጊዲ ጨፒ ጌዳ ሃጋይ ዲዛ ዎላ ጋርሳራ አቂ ቢሺን አቤሴሎሜ ሁኔ ቢናናይ ሃጋን ኦይኬቲደሰ፤ ኢዚ ቶጊዳ ባቁሎያ አቆ ቢን ኢዚ ሳሎፔኔ ሳኦፔ ጌደን ካቂቲ አቲደሰ።

10 ኢሳዴይ ኢዛ ቤኢዲ አዮአቤስ፡ «ሄኮ ታኒ አቤሴሎሜይ ዎላ ቦላ ካቂቲ ዲዛይሳ ቤኢዲስ» ጌደሰ።

11 አዮአቤይ ባስ ዮቲዳ አዴዛስ ዛሪዲ፡ «አይ ጋዲ? ሂስቲን ኔ ቤኢዳ ማላ አይስ ሄራካ ዎቆዳ ቢታን ዬጋቤኪ? ኔ ሄሳሶ ኦሊዳኮ ታ ኔስ ታሙ ሳቂሌ ቢራኔ ኦላ ቃራታ ቃባቶ አማናኮሺን» ጌደሰ።

12 ጌዳ አቲን አዴዚ ዛሪዲ፡ «ኑኒ ሲዱሺን ካዎዚ፡ «ናቴላዛ አቤሴሎሜ ቦላ ቆሆይ ጋኮንታ ማላ ታ ጌሻስ ጌዲ ሚንሊ ናጌቲ» ጌዲ ኔና፡ አቢሳኔ ኢታዬ አዛዚዳ ጌሻስ 1,000 ሳቂሌ ቢራ ኔ ታስ አሚዳኮካ ታኒ ታ ኩሺ ካዎዛ ናዛ ቦላ ዎሊኩ።

13 ሃራ ባጋራ ታኒ ታ ሺምፖስ ሚሼቶንታ አጋዳ ታ ኢዛ ዎቂዳኮ ካዎዛፔ ቆቲቲ አቲዛ ሚሺ ባይንዳ ጌሻስ ኔኒ ኔ ባጋራ ታኮ ሺቃካ» ጌደሰ።

14 ኢዮአቤይ አዳዛለ፡ «ሃይሳፌ ጉዬ ሃይሳ ማላ ሃሳያን ታ ኔናራ ዋዴ ወርሲኬ» ጌዴሰ፤ 3 ቶራ ኤኪ ቢዲ አቤሴሎሜይ ሚላ ቦላ ካቂቲ ዲዛሶን ቡሮ ሸምፖ ኬዞንታ ዲሺን ቶራታ ጸንጊዲ ኢዛሰ ዋዚና አይፌን ጫዲዴሰ።

15 ሄሳፉካ ኢዮአቤ አዛቢዛ ታማቲ፡ አቤሴሎሜ ጌዶሊ ጫዲ ዋዲዴ።

16 ሄሳፌ ጉዬ ኢዮአቤይ ዛዬ ፑኒዲ ኢሰታ ዲጊዳ ጊሻሰ ኦላንቻቲ ኢሰራኤል ዬዴሊዛይሳ አጊዳ።

17 አቤሴሎሜ ዋራ ጌዶ ኤፌዲ ጨማ ኦላን ዬጊዳ፤ ጌታ ሹቻታ ኢዛ ቦላ ዶሪዳ። ሄ ዋዴ ኢሰራኤል አሳይ ኡባይ ባሶ ባሶ ባቃቲዴሰ።

18 አቤሴሎሜይ፡ «ታ ሱንሐ ጴይጊሲዛ ናይ ታሰ ዴና» ጌዲ ኢዛ ሃሳኢሳና ማላ ሸምፖራ ፓጻ ዲዛ ዋዴ ካዎ ዙሌ ጌቲቲዛሶን ባ ሱንላን ሃወልቲ ኤሲ ዋሊዳ ጊሻሰ ሄ ሶሆዚ ሃች ጋካናሰ አቤሴሎሜ ሃወልቲ ጌቲቲሰ።

ዳዊቲ ካዮቴሐ

19 ሄ ዋዴ ሳዶቄ ና አኪማሲ፡ «ሳዳይ ኢዛ ሞርኬታ ቦላ ኮሚ ኮጲዳይሳ ዋጸ ባዳ ታኒ ካዎዛሰ ሚሺራች ዮታና» ጌዴሰ።

20 ኢዮአቤይ፡ «ሃች ሚሺራች ቃላ ኤፋናይ ኔና ጌዳካ፤ ካዎዛ ናይ ሃይቂዳ ጊሻሰ ሃች ጌዶንታ ሃራ ጋላሰ ኤፋንዳሳ» ጌዴሰ።

21 ሄሳፌ ጉዬ ኢዮአቤይ ቶጵያ ዴሬ አዳዛለ፡ «ኔ ቤኢዳይሳ ባዳ ካዎዛሰ ዮታ» ጌዴሰ፤ ቶጵያ ዴሬ አዳዚ ኢዮአቤሰ ኩሼ ዴንሐ ቤሲዲ ዋጲ ቢዴሰ።

22 ሳዶቄ ና አኪማሲ ኢዮአቤሰ፡ «ባ ሃና ሃኖ፤ አኔ ዛይ ሃይሳ ቶጵያ አዳዛ ጌዶራ ታኒካ ዋጸይሰ» ጌዴሰ።

ኢዮአቤይ ጌዲኮ፡ «ኔ አይሰ ባና ኮያዲ? ኔሰ ኢሞታ ኢሚሲዛ አይ ሚሺራች ኤካዳ ባይ?» ጌዴሰ።

23 አኪማሲካ፡ «ባ ሃና ሃኖ፤ ታ ባና ኮያይሰ» ጌዴሰ።

ሄሳ ጊሻሰ ኢዮአቤይ፡ «ሂሰቲኮ ዋጸ!» ጌዴሰ። ሄሳፌ ጉዬ አኪማሲ ዴሞባን ዲዛ ኦጌዛራ ዋጲ ቶጵያ ዴሬ አዳዛ፤ ሲንላቲ ቢዴሰ።

24 ዳዊቲ ካሬ ባጋ ፔንጌፌኔ ጌዶ ፔንጌፌ ጌዶን ዲሺን ዛቤዚ ዲርሳ ጊምቤ ቦላ ዲዛ ሻኮ ካራ ኬዚዲ ካሬ ጴሊሼ ኢሲ አሲ ባርካ ዋጸዛይሳ ቤኢዴሰ።

25 ናጊዛይሲ ጴይጊዲ ሄሳ ካዎዛሰ ዮቲዴሰ፤

ካዎዚካ፡ «ባርካ ዪዛዴ ጊዲኮ ሎኦ ሚሺራኝ ኤኪ ዪዛዴ ጊዳና» ጊዳሰ፤ አዳዚ ማቲ ማቲ ዪዳሰ።

26 ቃሴካ ናጊዛይሲ ሃራ አሲ ዎጺሺን ቤኢዳሰ፤ ዛቤዛካ ዴይጊዲ፡ «ሄኮ ሃራ አሲ ባርካ ዎጺ ዪሺ ዳሰ» ጊዳሰ።

ካዎዚ፡ «ሄሳዴይካ ሎኦ ዎሪ ኤኪ ዪዛ ጊዳና ቤሴሰ» ጊዳሰ።

27 ናጊዛይሲ፡ «ኮይሮይሳ ዎሊ ሳዶቄ ና አኪማሴ ዎላ ሚሳቴሰ» ጊዳሰ።

ካዎዚ፡ «ኢዚ ሎኦ አሳ፤ ኢዚ ሚሺራኝ ቃላ ኤኮንታ ዬና» ጊዳሰ።

28 አኪማሲ ኬሂ ዋሲዲ ካዎዛሰ፡ «ኡባ ሚሺካ አንጃቲዳሰ» ጊዳሰ፤ ሄሳፌ ጉዬ ቢታ ቦላ ዛቁልል ዘርጺ ጊዳሰ፤ ካዎዛሰካ ኩሼ ዴንፊዲ፡ «ታ ጎዳ ካዎዛ ቦላ ባንታ ኩሼ ዴንፊዲ አሳታ አሊ ኢሚዳ ጎዳ ኔ ጸሳይ ጋላቴቶ!» ጊዳሰ።

29 ካዎዚካ ኢዛ፡ «ታ ና አቤሴሎሜይ ሎኦ ዲዜ?» ጊዳሰ።

አኪማሲካ፡ «ኢዮአቤይ ካዎዛ ኦሳንቻዛኔ ታና ኔ አይሌዛ ከቲሺን ጌታ ሺሮ ቤአዲሰ፤ ጊዳ አቲን ኢዚ አዛኮ ታ ኤራቤኬ» ጊዳሰ።

30 ካዎዚካ ኢዛ፡ «አኔ ኢሲ ባጋ አፃ ኤቃ» ጊዳሰ። ኢዚካ አፉ ኤቁዳሰ።

31 ሄሳፌ ጉዬ ቶጵያ ዳሬ አዳዚ ጋኪዲ፡ «ታ ጎዳ ካዎ፡ ሚሺራኝ! ጎዳይ ሃኝ ኔ ቦላ ዴንዲዳ ሞርኬታ ኡባፌ ኔና አሺዳሰ» ጊዳሰ።

32 ካዎዚካ ቶጵያ ዳሬ አዳዛ፡ «ታ ና አቤሴሎሜይ ሎኢ ዲዜ?» ጊዳሰ።

ቶጵያ ዳሬ አዳዚካ፡ «ታ ጎዳ ካዎዛ ሞርኬቲኔ ኔና ቆሃና ኔ ቦላ ዴንዲዛ ኡባቲ ሄ ናቴላዛ ማላ ጊዳቶ» ጊዳሰ።

33 ካዎዚ ኬሂ ጩጩዳሰ፤ ጊምቤዛ ፔንጌ ቦላ ዲዛ ፖቄ ቦላ ኬዚዲ ሄን ዬኪዳሰ፤ ቢሺካ፡ «ታ ና አቤሴሎሜ! ታ ና አቤሴሎሜ! ኔ ጊሻሰ ታ ሃይቃርኪና! ታ ና አቤሴሎሜ ዎ! ታ ና አቤሴሎሜ ዎ!» ጊዳሰ።

19

ኢዮአቤይ ዳዊቲ ዋላሲዳ ዋላሲ

1 ኢዮአቤሰ፡ «ካዎ ዳዊቲ ባ ና አቤሴሎሜ ጊሻሰ ዬኪሼኔ ካዮቲሼ ዳሰ» ጌቲቲ ዮቲቲዳሰ።

2 ካዎዚ፡ «ባ ናዛ ገሻሰ ካዮቴሰ» ገዛይሳ ሄ ጋላሰ ኦላንቻቲ ሲዪዳ ገሻሰ ሄ ጋላሳ ጸኖይ ኩሜላ ኦላንቻታ ማታን ጨጨን ላማቲ ፔኢዳሰ።

3 ሄ ጋላሰ ኦላፔ ዩላቲሼ ካታማ ጌሊዛ አሳ ማላ ዳሬይካ ሻጴቲሼ ካታማ ጌሊዳሰ።

4 ካዎዚ ባ አይፌሶ ካሚ ዋሊዲ፡ «ታ ና አቤሴሎማ ዋ! ታ ና አቤሴሎማ ዋ» ገሼ ዚላሊዳሰ።

5 ሄሳፌ ጉዬ ኢዮኣቤይ ካዎዛሶ ጌሊዲ፡ «ኔ ሽምፖ፡ ኔ አቱማ ናይታ ሽምፖ፡ ኔ ማጫ ናይታ ሽምፖ፡ ኔ ማቺታኔ ኔ ላጌሶታ ሽምፖ አሺዳ አሳታ ሃች ኔ ዩላቻዳሳ።

6 ኔና ኢዲዛይታ ኔ ዶሳሳ፤ ቃሴ ኔና ዶሲዛይታ ኢጸሳ፤ ኔ ኦላ ጋዳዋቲኔ ኢሰታ ዋታዳራቲ ኔሰ አይኮካ ገደንታይሳ ሄኮ ሃች ኔ ቆንጨሳዳሳ፤ ሃች አቤሴሎማይ ሽምፖራ ፓጸ ዲን ኦ ኡባይ ወሪዳኮ ኔ ኡፋዬታናይሳ ታ ቤኣዲሰ።

7 ሃኢ ዳንዳዳ ካሬ ኬዛ አሳ ሚንጮላ፤ ኔ ኬዘንታ ኢጸኮ ሃ አማርሳይን ኢሲ አሲካ ኔናራ ገደንታይሳ ታ ጎዳ ሱንላን ጫቃይሰ፤ ሄሲ ኔሰ ናቲቱላፌ ዶሚን ሃይሳ ጋካናሰ ኔ ቦላ ጋኪዳ ኢታ ዮኦታ ኡባፌ አፆ ሜቶ ኔ ቦላ ጋላና» ገዳሰ።

8 ሄሳ ገሻሰ ካዎዚ ፔንጌ ላንቄን ኡቲን ዳሬዛሰ፡ «ሄኮ ካዎዚ ፔንጌ ላንቄን ኡቲዳሰ» ጌቲቲ ዮቴቲን ዳሬዚ ኡባይ ካዎዛኮ ዪዳሰ።

ዩራሳላማ ባናሰ ዳዊቲ ዳንሐ

ሄ ዋዳ ኩሜሐ ኢሰራኤሌ አሳይ ባሶ ባሶ ባቃቲዳሰ።

9 ኩሜላ ኢሰራኤሌ ቆሞቲ፡ ዳሬዚካ ባ ጋርሳን ኢሶይ ኢሳራ ማርሼቲሼ፡ «ካዎዚ ኦና ኦ ሞርኬታ ኩሼፔ ኬሲ ኤኪዳሰ፤ ፊሊሰጾሚታ ኩሼፔካ ኦና አሺዳይ ኢዛ፤ ሃኢ ገዲኮ አቤሴሎማ ጋሶን ዳሬፔ ባቃቲ ቢዳሰ።

10 ኢዚ ኦና ሃራና ማላ ኦ ቲይዳ አቤሴሎማይ ገዲኮ ኦላን ሃይቂዳሰ። ሂሰቲን ኢንቲ ካዎዛ ሲሞ ገሻሰ አይሰ ጮኡ ጌቲ?» ገዳሰ።

11 ካዎ ዳዊቲ ቄሴ ሳዶቄሲኔ አቢያታሬሰ ኪታ ዩዲሼ፡ «ዩሁዳ ጨማታሰ፡ «ኩሜላ ኢሰራኤሌን ሃሳዬቲዛ ዮኦ ኡባይ ካዎዚ ዲዛሶን ኢዛሰ ጋኪዳ ገሻሰ ካዎዛ ካዎቱላ ኬሐ ዛራናሰ ኢንቲ ዋኒዲ ወርሴላ አሰ ገዳቲ?»

12 ኢንቲ ታ ሜቆላታ፡ ታ አሾታኔ ታ አሻታ፤ ሂሰቲን ኢንቲ ካዎዛ ዛራናሰ ዋኒዲ ወርሴላ አሰ ገዳቲ?» ገቲ።

13 «ቃሴ አማሴ፡ ሐኪካ ታ ማቄላኔ ታ አሾ ገዲኪ? ሃኒፌ ደሚዲ ኔ ዴኦ ወርሴሐ ጋካናሰ ኢዮኣቤ ቆጼ ታ ኦላንቻታ አዛዚዛዴ ኦሶንታ ኣገሶ ጸሲ ታ ቦላ ኢታ ሚሽ ኦሶ፤ ሃሳፊካ አጲዛ ኢታ ሚሽ ታ ቦላ ኤሆ፤ ገዴሰ» ገዲ ዮቲቲ።

14 ኢዚካ ዩሁዳ አሳ ኡባ ዎዚና ኢሲ አሳ ዎዚና ማላ ሂሰቲ ዲኢዴሰ፤ ኢሰቲካ ኢዛሰ፡ «ኔኒ ኔ አሳ ኡባራ ሲማ» ገዲ ኪታ ዩዲዲ።

15 ካዎዚ ሃሳፊ ጉዬ ሲሚዲ ዮርዳኖሴ ጋካናሰ ዩዴሰ።

ሄ ዎዴ ዩሁዳ አሳይ ካዎዛ ኤኪዲ ዮርዳኖሴ ፒንፋናሰ ጌልጌላ ጋካናሰ ቢዴሰ።

16 ባሂሪሜ ዴሬ አሰ ጌራ ና ቢኒያሜ ቆሞ ሸምኤይ ካዎ ዳዊቲ ሞካናሰ ዩሁዳ አሳራ ኢሲፌ ኤሶን ዎጲዴሰ።

17 ኢሲ ሺ ቢኒያሜ ቆሞቲ፡ ሃሳሶካ ሳኦሌሶ ኦሳንቻ ጸባሰ 15 አቱማ ናይቲኔ 20 ኣይሌቲ ኢዛራ ኢሲፌ ዴቲሰ። ሃሳፊ ጉዬ ካዎዚ ዲዛሶ ዮርዳኖሴ ኤሶን ዎጲዴ።

18 ካዎዛሶ አሳ ኤሃናሲኔ ኢዚ ኮዬዳ ኡባ ኦፋናሰ ኢሰቲ ዞኮራ ፒኒዳ።

ዳዊቲ ሸምኤ ማሪዳ ማሮ

ጌራ ና ሸምኤይ ዮርዳኖሴ ፒኒዴሰ፤ ካዎዛ ሲንፋን ጉፋኒዲ፡

19 «ታ ጎዳዉ ታ ኔና ቆሂዳይሳ ቆዶፓ፤ ታ ጎዳ ካዎ ኔ ዩሩሳላሜፔ ኬዚዳ ጋላሰ ታ ኦሊዳ ሞሮዛ ማራ፤ ኔ ዎዚናን ዎሶፋ።

20 ታኒ ኔ ኦሳንቻይ ኦሊዳ ናጋራ ኤሪዛ ገሻሰ ሃች ታ ጎዳ ካዎዛ ሞካናሰ ዮሴፌ ኬፋ አሳ ኡባፌ ኮይሮታ ያዲሰ» ገዴሰ።

21 ሃሳፊ ጉዬ ጹሪያ ና አቢሳዬይ፡ «ሸምኤይ ጎዳን ቲዬቲዳዴ ኢዚ ጫዬዳ ገሻሰ ኢዛሰ ሃይቆይ ቤሴኔ?» ገዴሰ።

22 ዳዊቲካ፡ «ኢንቲኖ ጹሪያ ናይቶ፤ ኢንቲናራ ታና ኣዚ ጋሊዜ? ኢንቲ ሃች ታሰ ሞርኬ ገዲዴታ! ኣይ ኣሲካ ሃች ኢሰራኤሊፔ ሃይቃና ቤሲዜ? ሄሲ ታ ኢሰራኤሌ ቦላ ካዎቲዳይሳ ታ ኤሪዳ ጋላሰ ገዴኔ?» ገዴሰ።

23 ሄሳ ገሻሰ ካዎዚ ሸምኤ፡ «ኔኒ ሃይቃካ» ገዴሰ፤ ሄሳ ካዎዚ ጫቆን ሚንሊዴሰ።

ዳዊቲ ሜምፌቦስቲ ማሪዳ ማሮ

24 ሳኦሌ ና ሜምፌቦስቲይ ካዎዛ ሞካናሰ ዲጌ ዎጲዴሰ፤ ካዎዚ ቤቲ ቦሶፌ ደሚዲ ሲሚ ዩዳ ጋላሰ ጋካናሰ ባ ቶሆሰ

ቤሲዛ ሚሽ ኦሊቤና፤ ባ ቡቹካ ሜዴቲቤና፤ ባ ማይኦካ ሚጪቤና።

25 ኢዚ ካዋዛ ሞካናስ ዩሩሳላሚፔ ዪን ካዋዚ ኢዛ፡ «ሚምፌቦስቲ፡ ኔ ታናራ ኣዛስ ቦንታ ኣጋዲ?» ጌ ኦይቺዴስ።

26 ኢዚካ ዛሪዲ፡ «ታ ጎዳ ካዋ! ታ ኔ ኦሳንቻይ ቶሆ ሲላ ጊዲዳ ጊሻስ፡ ታኒ ካዋዛራ ባና ማላ ታ ሃሬይ ታስ ኮሬቶ፤ ታ ኢዛ ቦላ ኡታ ባና፡ ጋዲስ፤ ጊዶ ኣቲን ታ ኦሳንቻ ጸባይ ታና ባሌሊዴስ።

27 ታ ጎዳ ካዋ ሲንፋን ታና ኔ ኦሳንቻዛ ሱንሐ ሞሪዴስ፤ ኣይዴ ጊዲንካ ታ ጎዳይ ካዋይ ኔኒ ጸሳ ኪታንቻ ማላ ጊዲዳ ጊሻስ ኔና ሎኢዳ ኡባ ኣፋ።

28 ታ ኣዋ ኬላስ ኡባስ ሃይቆይ ቤሲሺን ኔኒ ጊዲኮ ታና ኔ ኦሳንቻዛ ኔ ማዳፌ ሚዛይታራ ኢሲፌ ኡቲሳዳሳ፤ ሃይሳፌ ሃራይ ታስ ሃኖ ጋዳ ካዋዛ ኣይቻናስ ታ ኦኔ?» ጌዴስ።

29 ካዋዚካ፡ «ኔ ኣይስ ዮኦ ዳርሳይ? ኔኒኔ ጸባይ ኢዛ ጋዳ ኡባ ኢንቴ ጊሹቲ ኤካና ማላ ታ ኣዛዛዲስ» ጌዴስ።

30 ሚምፌቦስቲይ ካዋዛ፡ «ታ ጎዳ ካዋ! ኢዚ ሃሹ ሎኦን ሲሚዴስ፤ ኡባካ ኢዚ ኤኮ» ጌዴስ።

ዳዊቲ ባርዚሌስ ኦሊዳ ኪያቲሐ

31 ሂሳፉካ ጋላኣዴ ዳሬ ኣስ ባርዚሌይ ኤርጊሊሚ ዋራዳፔ ካዋዛ ሞይዛናስ ኢዛራ ኢሲፌ ዮርዳኖሴ ፒኒዴስ።

32 ሄ ዋዴ ባርዚሌይ ዋዴ ሱጊዳ 80 ላይላ ጨማ፤ ኢዚ ኬሂ ዲሬ ጊዲዳ ጊሻስ ካዋዚ ማሃናይሜን ዲሺን ኢዛስ ማና ሚሽ ኤሂዴስ።

33 ካዋዚ ባርዚሌ፡ «ታናራ ፒናዳ ዩሩሳላሚን ኢሲፌ ዳ፤ ታ ኔና ሄማና» ጌዴስ።

34 ባርዚሌይ ጊዲኮ ካዋዛስ፡ «ታኒ ካዋዛራ ዩሩሳላሚን ኣይ ኬና ላይሐ ዳናስ ቦ?»

35 ታኒ ሃኢ 80 ላይላ ጨማ፤ ሂስቲን ታኒ ኢታኔ ኪያ ሻካ ኤራና ዳንዳያኔ? ሃይሳፌ ጉዬ ኔ ኣይሌይ ሚዛይሳኔ ኡጹዛይሳ ማልኦ ሻኪ ኤራኔ? ኣቱማ ናይታ ጨንጉርሲኔ ማጫ ናይታ ጨንጉርሲ ሃኢ ታ ሲያና ዳንዳያኔ? ሂስቲን ኔ ኣይሌይ ታ ጎዳ ካዋዛስ ኣይስ ቦላራ ሃራ ቶሆ ጊዳኔ?

36 ኔ ኣይሌይ ካዋዛራ ፒኒዲ ጉላ ኦጌ ባና፤ ካዋይ ሄሳ ኩሼ ታስ ዛራንዴ?

37 ታ ዲዛ ካታማን ሃይቃዳ ታ አዋኔ ታ አዩይ ዱፎ አቻን ታ ሞጌታና ማላ ኔ አይሌዛ ኔ ሞይዚኮ ኢዚ ሲሞ፤ ጊዶ አቲን ኔ አይሌ ኬሜአሜይ ታ ጎዳ ካዎዛራ ፒና፤ ሂሰቲኮ ኔና ሎኢዳ ሚሽ ኔ ኢዛሰ ኦላ» ጊደሰ።

38 ካዎዚካ፡ «ኬሜአሜይ ታናራ ፒናና፤ ኔና ኡፋይሲዛ ሚሽ ኡባ ታ ኢዛሰ ኦላና፤ ኔ ታፔ ኮይዛ አይ ሚሺካ ታ ኔሰ ኦላና» ጊደሰ።

39 ሄሳ ጊሻሰ ዳሬዚ ኡባይ ዮርዳኖሴ ፒኒዴሰ፤ ሄሳፌ ጉዬ ካዎዚ ፒኒዴሰ። ካዎዚ ባርዚሌ ዬሪ ኤኪዲ እንጂዴሰ፤ ባርዚሌይካ ባሶ ሲሚ ቢዴሰ።

ዳዊቱ ጊሻሰ ዳራ ማርሼቱል

40 ካዎዚ ጌልጌላ ቢሺን ኬሜአሜይ ኢዛራ ኢሲፌ ቢዴሰ፤ ዩሁዳ ኦላንቻቲ ኡባይኔ ኢሰራኤሌ ኦላንቻታፔ ባጋይ ካዎዛ አዛቢዲ ፒንሊዳ።

41 ሄራካ ኢሰራኤሌ አሳይ ኡባይ ካዎዛኮ ዩዲ፡ «ኦ ኢሻቲ ዩሁዳ አሳቲ ካዎዛ ጋርሳራ ባንታርካ ኢዛኔ ኢዛሶ አሳታ፡ ኢዛ ካሊዛይታራ ዮርዳኖሴ አይሰ ፒንሊዳ?» ጊዳ።

42 ዩሁዳ አሳይ ኡባይ ኢሰራኤሌ አሳሰ፡ «ኦ ሃይሳ ኦሊዳይ ካዎዚ ኑሰ ማታ ዳቦ ጊዲዳ ጊሻሳ፤ ሂሰቲን ሃይሲ ኢንቲና ሃንቄሊዜ? ኩኒ ካዎፔ ኤኪ ሚዳ ሚሺ ዲዜ? ኩኒ አይ ሚሽ ኤኪዴኒ?» ጊዳ።

43 ሄሳፌ ጉዬ ኢሰራኤሌ አሳይ ዩሁዳ አሳሰ፡ «ኦና ካዎዛፔ ታሙ ኩሼይ ጋኬሰ፤ ሄሳፌ ቦላራካ ኢንቲፌ ኑሰ አፏዛ ማታይ ዴሰ፤ ሂሰቲን ኢንቲ ኦና አዛሰ ካፏዴቲ? ኦ ካዎዚ ሲማና ማላ ኮይሮ ኦይቺዳይ ኦና ጊዶኮኒ?» ጊዳ።

ጊዶ አቲን ዩሁዳ አሳይ ኢሚዳ ዛርይ ኢሰራኤሌ አሳይ ኢሚዳ ዛርፔ ኬሂ ሚና።

20

ሼባኤ ማካላቲል

1 ሄ ዎዳ ቢኒያሜ ቆሞታ ጊዶፌ ቢኪሬ ና ሼባኤ ጌቲቲዛ ኮፋ አሲ ዴሰ፤ ኢዚ ዛዬ ፑኒሼ፡

«ኦሰ ዳዊቱራ

ጋይቶቲል ዴና፤

ኢሴዬ ናኮን ኑሰ

ጸንጸይ ዴና፤

ኢሰራኤሌ አሳዉ!

ኔ ዲንካኔን ዲንካኔን
ሲማ!» ጊ ዋሲደሰ።

2 ሄሳ ጊሻሰ ኢስራኤል አሳይ ኡባይ ዳዊቴ ካዲዲ ቢኪሬ ና ሼባኤ ካሊደሰ፤ ጊዶ አቲን ዩሁዳ አሳይ ዮርዳኖሴ፤ ዶሚዲ ዩሩሳላሜ ጋካናሰ ባንታ ካዋዛ፤ ሻኬቶንታ ኢሲፌ ቢዳ።

3 ዳዊቴ ዩሩሳላሜን ዲዛ ባ ካዋቴላ ኬል ሲሚዳ ዋዴ ባ ካዋቴላ ኬላ ናጋና ማላ ካሴ ኢዚ ዋሊ ቢዳ ታሙ ላጌል ማጫሳታ ኤኪደሰ፤ ኢሰቲ ኢሲ ኬላን ናጌቲ ዳና ማላ ናጌ ዋሊደሰ፤ ኢሰታሰ ኮሺዛ ቃላባካ አሚደሰ። ጊዶ አቲን ኢሰታራ አቂቤና፤ ኢሰቲ ሃይቃናሼ ጋካናሰ አምኢ ማላ ባንታርካ ዲማ ዴኢዳ።

4 ሄሳፌ ጉዬ ካዋዚ አማሳሰ፡ «ዩሁዳ አሳይ ኡባይ ሄሹ ጋላሳ ጊዶን ታኮ ያና ማላ ጾይጋ፤ ኔካ ኔ ሁኤራ ቤታ» ጊደሰ።

5 አማሲ ዩሁዳ ጾይጋና ቢደሰ፤ ጊዶ አቲን ካዋዚ ባሪዳ ጋላሳታ፤ ኬሂ ታኪደሰ።

6 ዳዊቴ አቢሳዬ፡ «ሃኢ አቤሴሎሜ፤ ቦላራ ቢኪሬ ና ሼባኤ ዳር ሜቶ ኑ ቦላ ጋላና ኮይዛ ጊሻሰ ኔ ጎዳ ዋታዳራታ ኤካዳ ኢዛ ዩዳላ፤ ኔ ሂሰቶንታ አጊኮ ሚጸይ ዲዛ ካታማታ ዶሚዲ ኑ፤ ኬሲ ኤኪ አታና» ጊደሰ።

7 ሄሳ ጊሻሰ ኢዮአቤ ዋታዳራቲ፡ ኬሊቴቲ፡ ፔሊቴቲ፤ ዋልቃማ ኦላንቻቲ ኡባይ አቢሳዬ አዛዞን ኬዚዳ፤ ኢሰቲ ዩሩሳላሜ፤ ኬዚዳይ ቢኪሬ ና ሼባኤ ዩዳላናሳ።

8 ኢሰቲ ጌባኔን ዋጋ ዛላ ማታን ዲሺን አማሲ ኢሰታራ ጋይታና ኬዚደሰ፤ ኢዮአቤይ ኦላ ማይኦ ማይኢዲ ጊላ ማሻ ኮሆዛራ ጊጺ ኡቲደሰ፤ ኢዚ ሲንፊ ታንጊዳ ማላ ማሻዚ ኮሆዛ፤ ኬዚ ጋዴን ዋዲደሰ።

9 ኢዮአቤይካ አማሳ፡ «ታ አሻዘ ኔ አይ ማላ ዳይ?» ጊደሰ፤ ሂሰቲዲ ኢዮአቤይ ዩሪዛ አሰ ሚሳቲዲ ባ ኡሻቻ ኩሼን አማሳ ቡቶ ኦይኪደሰ።

10 ጊዶ አቲን አማሲ ኢዮአቤ ኩሼን ማሻይ ዲዛይሳ አኬኮንታ አጊዳ ጊሻሰ ባና ናጌቤና። ሂሰቲን ኢዮአቤይ ኢዛ ኡሎን ጫዲደሰ፤ ኢዛ ማራጨይ ቢታ ቦላ ዋሎሎ ጊደሰ፤ ኢዮአቤይ ሃራ ጉጃንታ ዲሺን አማሲ ሃራካ ሼምፖ ኬዚደሰ። ሄሳፌ ጉዬ ኢዮአቤይ ኢዛ አሻ አቢሳዬይ ቢኪሬ ና ሼባኤ ጎዴል ዶሚዳ።

11 አማሳ አሃ አቻን ኤቂዳ ኢዮኣቤ ዎታዳራታፔ ኢሶይ፡ «ኢዮኣቤ ዶሲዛይኔ ዳዊቲስ ጊዲዳ ኡባይ ኢዮኣቤ ካሎ!» ጊዴስ።

12 ሄ ዎዴ አማሳ አሃይ ሱላን ሞሬቲዲ * ኦጌስ ጊዶ አዳን ፖርጩ ጊ ዴስ። ሄራ አጂ ቢዛ ዎታዳራቲ ኡባይ ኤቂ ጸሊሺን ሄ አዴዚ ቤኢዲ አሃዛ ማታ ጋኪዳ ዎታዳራቲ ኡባይ ኤቂ ጸሊዛይሳ አኬኪዴስ፤ አማሳ አሃዛ ኦጌ ቦላፌ ጎሻ ጊዶ ኤፊዲ ማይኦ ኢዛ ቦላ ዩጊዴስ።

13 አሃዚ ኦጌፔ ዴንዲዳፔ ጉዬ አሳይ ኡባይ ቢኪሬ ና ሼባኤ ጎዳናስ ኢዮኣቤ ካሊ ቢዴስ።

14 ሼባኤይ ኢስራኤል ናይታ ቆሞታ ኡባ ጊዶራ ካንሊዲ አቤሊ-ቤቲ-ማኢካኔ ቤሬ ዴሬ ዩዴስ። ቤሬ አሳይ ኢሲ ቦላ ሹቄቲዲ ኢዛ ካሊዴስ።

15 ኢዮኣቤራ ዲዛ ዎታዳራቲ ዩዲ አቤሊ-ቤቲ-ማኢካን ሼባኤ ጊዶሊዳ፤ ካታማፔ ካሬ ባጋራ ዩዩ አጃናስ ጊሞቤዛስ ፑዴ ጸራ ጋካናስ ቢታ ዶሪዳ፤ ኢስቲ ጊሞቤዛ ላላናስ ኬሂ ሾጪዛ ዎዴ፡

16 ሄ ካታማይን ኢሲ ዎዚናማ ማጫሲ ዲዛራ ባ ቃላ ቶቄ ሂስታዳ «አሶ ሲዩቲ! ሲዩቲ! ኢዮኣቤስ ታ ዮታና ሚሺ ዲዛ ጊሻስ ኢዚ ሃ ያና ማላ ኢዛስ ዮቲቲ!» ጋዱስ።

17 ኢዮኣቤይ ኢዚኮ ቢን ማጫሳያ ኢዛስ፡

«ኢዮኣቤይ ኔኔ?» ጋ ኦይቻዱስ።

ኢዚካ ኢዚስ ዛሪዲ፡ «ኤ ታና» ጊዴስ።

ኢዛካ ኢዛስ «ሂስቲኮ ታኒ

ኦሳንቻያ ጊዛይሳ ኤዘጋ» ጋዱስ።

ኢዚ ቃሴ፡ «ኤሮ ታ ኤዘጋ ሲያይስ» ጊዴስ።

18 ኢዛካ ዛራዳ ኢዛስ፡ «ቤኒ ዎዴ አሳይ፡ «ዞሬ ኦይቻናስ አቤሌ ካታማ ቢቲ!» ጌስ፤ ኢስቲ ጊዳ ማሳካ ፖሌቲስ።

19 ሄ ካታማያ ጊታ ካታማ፤ ኢስራኤሌን ሳርይ ኩሚዳራኔ አማኔቲዳ ካታማያ ኢዘ፤ ሂስቲን ኔኒ ኢስራኤሌን አዮ ጊዲዳር ጃይሳና ኮያሳ። ጎዳ ጸንጾዮ ሚታናስ አይስ ኔ ኮያይ?» ጋዱስ።

20 ኢዮኣቤይካ ኢዚስ፡ «ሂሲ ታፔ ሃኮ! ሚቶይኔ ጃይሲ ሃኢካ ታፔ ሃኮ!

21 ዮኦይ ሄሳ ማላ ጊዴና፤ ሄን ዙማዛን ኤፍሬሜ ጌዜፌ ቢኪሬ ና ሼባኤ ጌቲቲዛይሲ ካዎ ዳዊቲ ቦላ ባ ኩሼ ዴንሊዴስ፤ ኢንቲ ሄ አዴዛ ጸላ ታስ አሊ ኢሚኮ ታኒ ሃኖ ካታማዮ ዬዳ ባና» ጊዴስ።

* 20:12 ሱላን ሞሬቲዲ ጊዛይሲ ኢብራዊታ ማጻፋን ጌንዴሪዴስ ጌስ።

ማጫሳያካ ዛራዳ ኢየሱሴስ፡ «ኣዳዛ ሁኔታ ቃንጺዲ ኔስ ገምቤ ቦላራ ካሬ ዩጋና» ጋዲስ።

22 ሄሳፌ ጉዬ ማጫሳያ ጨንጫቴላን ኩሚዳ ባ ዞሬ ኡባ ዴራኮ ኤካ ባዲስ። ኢስቲካ ቢኪሬ ና ሼባኤ ሁኔታ ቃንጺዲ ኢየሱሴስ ካሬ ኦሊዳ። ሂስቲን ኢየሱሴይ ዛዬ ፑኒዴስ፤ ኣሳይካ ካታማይፔ ሃኪ ቢዳ። ኡባ ባጋራካ ላሌቲ ባሶ ባሶ ቢዳ። ኢየሱሴይ ካዎዛኮ ዬሩሳላሜ ሲሚ ቢዴስ።

ዳዊቲ ሹሚታ

23 ኢየሱሴይ ኢስራኤሌ ኦላንቻታ ኡባ ቦላ ኣዛዚዛዴ ጊዲዴስ፤ ዮዳሄ ና ባናያይ ቃሴ ኬሊቲታ ቦላኔ ፔሊቲታ ቦላ ሃላቃ ጊዲዴስ።

24 ኣዶራሚይ ዎልቃ ኦሶ ኦሊዛይታ ቦላ ሃላቃ ጊዲዴስ። ኣሂሉዴ ና ኢየሳፊዴይ ታሪኬ ጸፊዛዴ ጊዲዴስ።

25 ሼባኤ ካዎ ኬላስ ጸፊ ጊዲሺን ሳዶቄይኔ ኣቢያታሬይ ቄሴ ጊዲዳ።

26 ሄሳሶካ ያኢሬ ዴሬ ኣስ ኢራይ ዳዊቲ ዞሪዛዴ ጊዲዴስ።

21

ሳኦሌ ዜሬላታ ቃጸዬቴላ

1 ዳዊቲ ካዎቴላ ዎዴ ሄቹ ላይላ ኩሚል ኢታ ኮሻይ ቢታ ቦላ ዴንዲዴስ፤ ሄሳ ጊሻስ ዳዊቲ ጎዳ ኦይቺዴስ፤ ጎዳይካ ኢዛስ፤ «ሳኦሊ ጌባኦኔ ኣሳ ዎጂ ዉርሲዳ ጊሻስ ኢዛ ቦላኔ ኢዛሶ ኣሳ ቦላ ሱላ ኣጮይ ዴስ» ጊዴስ።

2 ካዎዚ ጌባኦኔ ኣሳ ጸይጊ ሃሳይሲዴስ፤ ጌባኦኔቲ ኣሞሬታፔ ኣቲዳይታ ኣቲን ኢስራኤሌ ዴሬ ኣስ ጊዴቲና፤ ኢስራኤሌ ኣሳይ ካሴ ኢስቲ ናጋናስ ጫቂዳ ጊዲኮካ ሳኦሊ ኢስራኤሌ ኣሳሲኔ ዩሁዳ ኣሳስ ሚሹቲዛ ጊሻስ ጌባኦኔታ ሙሌራ ጳይሳናስ ኮዬዴስ።

3 ሄሳ ጊሻስ ዳዊቲ ጌባኦኔ ኣሳ፡ «ታ ኢንቴስ ኣይ ኦሶ? ጎዳ ጸንጾ ኢንቴ ኣንጃና ማላ ናጋራ ኡባስ ታ ኣይ ኦሳና ቤሲዜ?» ጊ ኦይቺዴስ።

4 ጌባኦኔ ኣሳይ ኢዛስ ዛሪዲ፡ «ሳኦሌፔ ጊዲን ኢዛሶ ኣሳፔ ቢራ ዎይኮ ዎርቃ ኦይቻናስ ማታይ ዴና፤ ቃሴካ ኦኒ ኢስራኤሌፔ ኦናካ ዎጳናስ ማታይ ዴና» ጊዳ።

ዳዊቲካ፡ «ሂስቲን ታ ኢንቴስ ኣይ ኦሶ?» ጊ ኦይቺዴስ።

5 ኢስቲካ፡ «ኑኒ ላሌታና ማላኔ ኢስራኤል ጌዶን አዋንካ ደንታ ማላ ኑ ቦላ ጌኔ ኦሴዲ ኑና ጳይሲዳዴ

6 ዜሬላፌ ላፑን አቱማ ናይቲ ኑስ ኢማቴቶ። ኑኒካ ጎዳን ዶሬቲዳ ሳኦሌ ዴሬ ገቢኣን ጎዳ ሲንፋን ኢስታ ካቃና» ገ ዛሪዳ። ሂስቲን ካዋዚ፡ «ኤር ታ ኢማና» ገዴሰ።

7 ካዋ ዳዊቲ ሳኦሌ ና ዮናታኔ ጌዶኒኔ ባ ጌዶን ጎዳ ሲንፋን ጫቂቲዳ ጫቆ ገሻስ ጌዲ ሳኦሌ ናዛ ዮናታኔ ና ሜምፌቦስቲ ሃይቆፔ አሺዴሰ።

8 ጌዶ አቲን ካዋዚ አያ ቢዮ ኤርጺፋይ ሳኦሌስ ዬሊዳ 2 አቱማ ናይታ አርሞኔኔ ሜምፌቦስቲ፡ ኢስታራካ ኢሲ ቦላ ሳኦሌ ቢያ ሜሮባ ማሆላቲ ዴሬ አስ ባርዚሌ ና አዲርኤሌስ ዬሊዳ 5 አቱማ ናይታ ኤኪ ቢዴሰ።

9 ኢስታ ጌባኦኔ አሳታስ አላ ኢሚዴሰ፤ ጌባኦኔቲ ኢስታ ዋጂዲ ዙምቡላታ ቦላ ጎዳ ሲንፋን ካቂዳ፤ ላፑናቲ ኢሲ ቦላ ሃይቂዳ፤ ኢስቲ ሃይቂዳይ ካላ ሺሾ ዋዴ ኮይሮ ጋላስ፡ ባንጋይ ማጸ ዶማቲዳ ጋላሳ።

10 ሄሳፌ ጉዬ አያ ቢዮ ኤርጺፋይ ማቃ ኤካዳ ዛላ ቦላ ዲንካናዲሰ፤ ካላ ሺሾ ኮይሮ ጋላሳፌ ቢዲ ኢራይ ቡካናሼ ጋካናስ፡ ጋላስ ሳሎ ካፎቲ ቦቾንታ ማላ፡ ኦማርስ ዋራ ዶኣቲ ቦቾንታ ማላ ናጋሺ ሄን ጋምኣዲሰ።

11 ሳኦሌ ላጌልያ አያ ቢዮ ኤርጺፋይ ኦሴዳይሳ ዳዊቲ ሲዪዳ ዋዴ፡

12 ቢዲ ሳኦሌ ሜቄላኔ ኢዛ ና ዮናታኔ ሜቄላ ያቡሴ ጋላኣዴ አሳፔ ኤኪዴሰ። ያቡሴ አሳይ፡ ኢስቲ ካቂዳሶፔ ቤቲ-ሳኔ ዱቡሻፔ ቆታራ ኤኪ ቢዳ።

13 ዳዊቲ ሳኦሌ ሜቄላኔ ኢዛ ና ዮናታኔ ሜቄላ ሄፔ ኤሂዴሰ። ሄሳልካ ሄ ሃይቂዳ አሳታ ሜቄላ ሺሺዳ።

14 ሳኦሌ ሜቄላኔ ኢዛ ና ዮናታኔ ሜቄላ ቢኒያሚ ቢታን ጸላ ጌቴቲዛሶን ኢዛ አዋ ቂሴ ዱፎን ሞጊዳ፤ ካዋዚ አዛዚዳይሳካ ኡባ አላዳ። ሄሳፌ ጉዬ ቢታይስ ኢስቲ ዋሲዳ ዋሳ ጸሲ ሲዪዴሰ።

ፊሊስጶሜ ቦላ ዴንዲዳ ኦላ
(1ታሪ 20:4-8)

15 ቃሴካ ፊሊሰጾሜሲኔ ኢሰራኤሌስ ጊዶን ኦላይ ዴንዲዴስ፤ ዳዊቲካ ባ አሳራ ፊሊሰጾሜ አሳ ኦላናስ ዲጌ ዋዲዴስ፤ ኢዚ ሄን ዳቡርዴስ።

16 ኤራፋዬ ዜሬላታፔ ኢሶይ ኤሽቢ-ቤኖቤ ጌቲቲዛ አሲ ዴስ፤ ኢዚ ጳርቂማላፔ ኦሴቲዳ 300 ሳቂሌ ዴጸዛ ቶራኔ ኦራላ ማሻ ጊጺ ኤቲዴስ፤ ኢዚካ ዳዊቲ ዋዳና ቆፒዴስ።

17 ጊዶ አቲን ጹሪያ ና አቢሳዬይ ዳዊቲ ሹምፖ አሻናስ ዬዲ ፊሊሰጾሜ አዴዛ ጫዲ ዋዲዴስ። ሄሳፌ ጉዬ ዳዊቲ አሳቲ፤ «ኢሰራኤሌ ጸምፔይ ቶኦንታ ማላ ሃይሳፌ ጉዬ ኔ ኑናራ ኦላሶ ኬዛና ቤሴና» ጊ ጫቂዳ።

18 ሄሳፌ ጉዬ ጎቤ ጌቲቲዛሶን ፊሊሰጾሜ አሳራ ኦላይ ዴንዲዴስ። ሄ ዋዴ ሁሼ ዴሬ አስ ሲቢካዩይ ኤራፋዬ ዜሬላታፔ ሳፌ ዋዲዴስ።

19 ጎቤን ፊሊሰጾሜታራ ዴንዲዳ ሃራ ኦላን ቤቴሊሄሜ ዴሬ አስ ጃር-ኦርጊሜ ና ኤልያኔይ ኢዛስ ቶራ ቶማይ ዋንዲራሽ ሚሐ ሊኪዛይሳ ጌቲ ዴሬ አስ ጎልያዴ ዋዲዴስ።

20 ቃሴካ ጌቲን ዴንዲዳ ኦላን ኢዛስ ኢሲ ኢሲ ኩሼ ቦላኔ ኢሲ ኢሲ ቶሆ ቦላ ኡሱፑን ቢራዴይ፤ ኢሲ ቦላ ናምኡ ታማኔ ኦይዱ ቢራዴቲ ዲዛ ኢሲ ዋልቃማ አሲ ዴስ፤ ኢዚ ኤራፋዬ ዜሬላ።

21 ኢዚ ኢሰራኤሌ አሳራ ኤቄቲሺን ዳዊቲ ኢሻ ሺምኤ ና ዮናታኔይ ኢዛ ዋዲዴስ።

22 ሃይቲ ኦይዳቲ ጌቲን ዲዛ ኤራፋዬ ዜሬላታ፤ ኢስቲካ ዳዊቲ ኩሼኔኔ ኢዛ አሳታ ኩሼን ኩንዲዳ።

22

ዳዊቲ ዬዲዳ ጋላታ ማዛሙራ
(ማዛ 18)

1 ጎዳይ ዳዊቲ ኢዛ ሞርኬታ ኡባ ኩሼፔኔ ሳኦሌ ኩሼፔ አሺዳ ዋዴ ዳዊቲ ሃይሳፌ ካሊዛ ማዛሙራ ጎዳ ቦንሾስ ዬዲዴስ፤

2 «ጎዳይ ታስ ዛላ፤

ታስ ሚጸኔ ታና አሺዛዴ።

3 ታ ጸሳይ ታ ጌሜቲዛ ዛላ፤

ታስ ጎንዳሌኔ አቶቲላ ካጩ፤

ኢዚ ታስ ሚኖ ሚጸ፤

ታስ ዜምፖኔ

- ታና አሺዛዳ፤
 ኔ ታና ማካላንቻታፔ
 አሻሳ።
- 4 ጋላታይ ቤሲዛ ጎዳ ታ ጴይጋይሰ፤
 ታኒ ታ ሞርኬታፔካ ኣታይሰ።
- 5 «ሃይቆ ዳምባላይ
 ታና ጊዶሊዳሰ፤
 ዳይሲዛ ዲኦይ ታና ሚቲዳሰ።
- 6 ሲኦሌ ዋዶሮይ
 ታ ቦላ ጳጳቲዳሰ፤
 ሃይቆ ዋጺማዳይ
 ታሰ ዋጾቲዳሰ።
- 7 ታ ጨጨዳ ዋዴ ጎዳ ጴይጋዲሰ፤
 ታ ጸሳኮ ዋሳዲሰ።
 ኢዚ ባ ኬላን ዲሾ
 ታ ጨንጉርሳ ሲዪዳሰ፤
 ታ ዋሶይ ኢዛ ሃይላን ጌሊዳሰ።
- 8 «ኢዚ ሃንቄቲዳ ገሻሰ ቢታያ
 ኮኮራዲሲኔ ሽርታዲሰ፤
 ሳሎታ ዮቺ
 ዛኢዳሲኔ ቃጺዳሰ።
- 9 ኢዛ ሲዴፔ ሃንቆ
 ጨዋይ ጨዋቲዳሰ፤
 ኢዛ ዶናፔ ጸጊዛ
 ታማይ ኤጺዳሰ፤
 ታማ ቦንቆይካ ኬዚዳሰ።
- 10 ሳሎታ ዳኪ ዋዲዳሰ፤
 ኢዛ ቶሆ ጋርሳን ዲፔ ጊዳ
 ሻራይ ዳሰ።
- 11 ኢዚ ኪራቤ ቦላ ኡቲዲ ፒራዲዳሰ፤
 ጨርኮ ቄፌ ቦላ ኡቲዲ
 ፑዴ ፓሊዳሰ።
- 12 ዱማይ ኢዛ ጊዶሊዳሰ፤
 ዲፔ ጊዳ ኢራ ሻራይ
 ኢዛ ጌንሊዳሰ።
- 13 ኢዛ ሲንላን ዲዛ ፖኦዛፔ

- ዋዋጪ ጊዛ ዋልቃንሉ ኬዚዳሰ።
- 14 ጎዳይ ሳሎታፔ ጉሚዳሰ፤
ኡባፌ ቶቃ ጸሳ
ጨንጉርሰ ሲሲዳሰ።
- 15 ባ ዪሻ ዱኪዱ
ባ ዋርኬታ ላሊዳሰ፤
ዋልቃንሉ ዬዲዱ ኢሰታ ሺርሲዳሰ።
- 16 ጎዳ ሴራፔኔ
ኢዛ ሲዴፔ ኬዚዛ ሃንቆ
ጨዋፔ ዴንዲዳይሳን፥
ኣባ ጊደን ዲዛ ዙሌቲ ቤቲዳ፤
ሳኣ ዮቻቲ ቆንጪዳ።
- 17 «ቦላፌ ባ ኩሼ ዬዲዱ
ታና ኦይኪዳሰ፤
ጨማ ሃላታ ጊደፌካ
ታና ኬሲዳሰ።
- 18 ሚኖ ዋርኬታፔ፥
ታኒ ኢሰታራ ኤቄታና
ዳንዳዮንታ ባሊጋራታፔ
ታና ኣሺዳሰ።
- 19 ታ ሜቶቲዳ ጋላሰ ታ ቦላ ዪዳ፤
ጊዶ ኣቲን ጎዳይ ታና ካፊዳሰ።
- 20 ኢዚ ታና ኣኮሶ ኬሲዳሰ፤
ታናን ኡፋዬቲዳ ጊሻሰ
ኢዚ ኢሰታ ኣሺዳሰ።
- 21 «ጎዳይ ታሰ
ታ ጺሎቴላ ማላ ኦፊሰ፤
ታ ጺሎቴላ ማላ
ታሰ ኩሼ ዛሪዳሰ።
- 22 ጎዳ ኦጌ ታ ናጊዳ ጊሻሰ
ታኒ ጸሳፌ ሸርኢ ጋዳ ኢታ ኦላቤኬ።
- 23 ኢዛ ዋጋ ኡባይ ታ ሲንላን ዳሰ፤
ኢዛ ማራፔካ
ሃራሶ ሲማቤኬ።
- 24 ኢዛ ሲንላን ቦሪይ ባይንዳ ዴኣዲሰ፤
ታናካ ናጋራፔ ናጋዲሰ።

- 25 ጎዳይ ታ ደሎቴላ ማላ፥
 ኢዛ ሲንላን ደዛ
 ጌሻቴላ ማላ
 ታስ ኩሼ ዛሪዴስ።
- 26 «አማኔቲዳይታስ
 ኔካ አማኔቲዳይሳ፥
 ሱሬታስ ኔኒ ሱሬ
 ጌዲዳይሳ ቤሳሳ።
- 27 ጌሻታስ ኔኒ ጌሽ ጌዲዳይሳ፥
 ማካላ አሳስ ኔኒ ማካላ
 ጌዲዳይሳ ቤሳሳ።
- 28 ኔኒ ቆሄቲዳ ዴራ አሻሳ፤
 ጌዶ አቲን ኔ አይፌይ
 ካዉሻናስ
 ኦቶራንቻታ ጸሌስ።
- 29 አቤት ጎዳዉ!
 ኔኒ ታስ ጸምፔ፤
 ጎዳይ ታ ቋማ ፖኢሴስ።
- 30 ኔ ማዶን ሞርኬታ ኦላ
 ሲንላ ሱጋ ሱጋ ባና፤
 ታኒ ታ ጸሳ ዋልቃን
 ጌምቤዛ ቦላራ ጸላይስ።
- 31 «ጸሳ ኦጌይ ኩሜላ፤
 ጎዳ ቃላይ ሙሩታ፤
 ኢዛን አማኔቲዳይታ ኡባስ
 ኢዚ ጎንዳሌ።
- 32 ጎዳፔ አቲን
 ሃራ ጸሲ ኦኔ?
 ኑ ጸሳፌ አቲን
 ዛላይ ኦኔ?
- 33 ታስ ዋልቃ ኢሚዛይሲ፥
 ታ ኦጌካ ሱሪሲዛይሲ
 ኢዚ ታ ጸሳ።
- 34 ታ ቶሆታ ጌኔሳ
 ቶሆ ማላ ፒላቲሴስ፤
 ቋቃሶሆታን

- ታና ሚንሒ ኤሴስ።
 35 ታ ኩሼታ ኦላ ታማርሴስ፤
 ታ ቄሴቲ ጸርቂማላ
 ዋንዳፌ ዚንቄቴስ።
 36 ኔ አቶቴላ ሳንዳሌ
 ታስ ኢማዳሳ፤
 ኔ ካፎይ ታና ጊታሲዴስ።
 37 ታ ታንሳ አሳዳሳ፤
 ታ ቶሆቲካ ጴጶቲቤቴና።
 38 «ታ ሞርኬታ ዩዴላ ጳይሳዲስ፤
 ኢስቲ ዲፒ ጋናሼ ጋካናስ
 ጉዬ ጋቤኬ።
 39 ሙሌራ ታ ኢስታ ጳይሳዲስ፤
 ስሚዲካ ኤቃናስ
 ዳንዳይቤቴና፤
 ታ ቶሆ ጋርሳንካ ኩንዲዳ።
 40 አላስ ታስ ዋልቃ ኢማዳሳ፤
 ታናራ ኤቄቲዛይታ ታ ቶሆ
 ጋርሳን ኔ ጉልባቲሳዳሳ።
 41 ታ ሞርኬቲ ጉዬ ስሚ
 ባቃታና ማላ ኦላዳሳ፤
 ታና ኢጺዛይታ ጳይሳዳሳ።
 42 ኢስቲ ማዶ ዴማናስ ዋሲዳ፤
 ጊዶ አቲን ኢስታ ማዲዳይ ዴና፤
 ኢስቲ ጎዳኮ ዋሲዳ፤
 ጊዶ አቲን ኢዚ ኢስታስ ዛሪቤና።
 43 ጉዲላ ማላ ኢስታ ሊቂሳ ጋጫዲስ፤
 ኦጌን ዲዛ ኡርቃ ማላ
 ኢስታ ጊንዳዲሲኔ ዩጴታዲስ።
 44 «ታ ዴሬይ ቆፒዳ ዳፋፔ
 ታና አሻዳሳ፤
 ካዋቴላታስ
 ታና ሁኤ ሂስታዳሳ።
 ታ ኤርንታ አሳይ
 ታስ ሃሬቲዴስ።

- 45 አላጋቲ ታና ሾባናሰ ዪዳ፤
ኢስቲ ታና ሲዪዳ ማላ ታስ አዛዜቴቴስ።
- 46 አላጋቲ ባቢዳ፤
ባንታ ሚጸፔ ኮኮሪሼ ዪዳ።
- 47 «ጎዳይ ዴኦ ጸሳ፤
ታ ዛላይ ኢዚ ኣንጄቶ፤
ታ አቶቴላ ዛላይ
ታ ጸሳይ ቶቁ ቶቁ ኀ።
- 48 ታ ጊሻሰ ሃሎ ኬሲዛ ጸሳይ፤
ካዎቴላታ ታስ ሃሪሲዛይ ኢዛ።
- 49 ኢዚ ታ ሞርኬታ ኩሼፔ
ታና ኬሴሰ፤
ታ ሞርኬታፔ ታና
ቶቁ ቶቁ ሂስታዳሳ፤
ሜንጼ ኢታታፔ
ታና አሻዳሳ።
- 50 አቤት ታ ጎዳዉ!
ካዎቴላታ ጊዶን
ታ ኔና ጋላታና፤
ኔ ሱንላሰ ጋላታ ማዛሙሬ
ታ ዬጸና።
- 51 ኢዚ ካዎዛሰ ጊታ ጸኖ ኢሜሰ፤
ባ ቲይዳ ዳዊቴሲኔ
ኢዛ ዜሬላሰ፤
ባ ሜርና ኪያቴላ ቤሴሰ።»

23

ዳዊቲ ወርሴላን የቲዳ ቃላ

- 1 ዳዊቲ ወርሴላን ሃሳይዳ ቃላይ ሃይሳፌ ካሊዛይሳ፤
«ያቆቤ ጸሳን ቲዬቲዳይሲ፤
ኡባፌ ቶቃ ጸሳይ
ቶቁ ቶቁ ሂስቲዳ አሲ፤
ኢሰራኤሌን ዶሴቲዳ ዬላንቻይ፤
ኢሴዬ ና ዳዊቲ ቲንቢቲ
ቃላይ ሃይሳ፤

- 2 «ኅዳ አያናይ
 ታ ባጋራ ሃሳይዳሰ፤
 ኢዛ ቃላይ ታ ደናን ዳሰ።
- 3 ኢሰራኤል ጸሲ ሃሳይዳሰ፤
 ኢሰራኤል ዛላይ ታሰ፤
 ሐሳ ጸሎቴላን ሃሪዛይ፤
 ጸሳ ያሻቴላን አይሲዛይ፤
- 4 ኢዚ ሻራይ ባይንዳሶን፤
 ማላዶ ጸልቄይ ኬዚዛ
 ዋዴ ዲዛ ፖኦ ማላ፤
 ኢዚ ቢታ ሶላ ማታ
 ፑርጨሲዛ ጸልቄ ማላ፤
 ኢራይ ቡኪ አጳሽን
 ኬኢዛ አዋ ማላ፤ ጊዳሰ።

- 5 «ታ ኬሊ ጸሳ ማታን
 ሊኬ ጊዳኔ?
 ኡባ ሚሽ ገግሲዲኔ ናጊዲ፤
 ታናራ ሜርና ጨቆ ቃላ
 ጌሊዲይ ኢዛ ጊዳኔ?
- ታ አቶቴላ ፖሎ ጋላናይ
 ታ አዋ ኡባ ታሰ አማናይ
 ኢዛ ጊዳኔ?
- 6 ጊዶ አቲን ኢታ አሳቲ ኡባይ፤
 ኩሼን ሺሻና ዳንዳዬቶንታ
 አጉንላ ማላ
 ዋራ ዋዳና።
- 7 አጉንላ ሶቺዛ ኡባሰ፤
 ቢራታ ዋይኮ
 ቶራ ቶማ ኮሼሰ፤
 ኢሰቲ ባ ዲዛሶን ሙሌራ
 ታማን ጸጌታና።»

ኤሬቲዳ ቃራ አሳታ
 (1ታሪ 11:10-41)

- 8 ዳዊቴስ ኤሬቲዳ ቃራ አሳታ ሱንሊ ሃይሳፌ ካሊዛይሳ፤
 ኮይርይሲ ታሂኪሞኔ ዳሬ አሰ ዮሼቢ-ባሼቤቴ ጊዲሺን ኢዚ

ሄሹ ሃላቃታስ ሃላቃ፤ ኢዚካ ኢሲ ኦላን ባ ቶራ ጸንጊዲ 800 ኣስ ዋጲዳ ቃራ።

9 ናሞኣንጾዚ ኣሂሆሄ ዴሬ ኣስ ዶዴ ና ኤልኤዘሬ፤ ኦሌታናስ ኢሲ ቦላ ሸቂዳ ፊሊሰጾሜ ኣሳይ ኤቄቲዛ ዋዴ ኢሰራኤል ኣሳይ ባቃቲዳስ፤ ዳዊቲራ ዲዛ ሄሹ ቃራታ ጋርሳፊ ኢሶይ ኢዛ።

10 ኢዚ ጊዲኮ ባ ኤቂዳሶ ዩዲቤና፤ ኢዛ ኩሼይ ኣርጋጫናሼኔ ማሻራ ኢሲፊ ኦይኬታናሼ ጋካናስ ፊሊሰጾሜታ ኦሊዳስ፤ ሄ ጋላስ ጎዳይ ኢዛስ ጊታ ጸኖ ኢሚዳስ። ባቃቲ ቢዳ ኦላንቻቲ ሃይቂዳ ኣሳፔ ኦላ ሚሺኔ ማይኦ ጸላ ቃራታናስ ኤልኤዘሬኮ ጉዬ ሲሚዳ።

11 ሄሻንጾዚ ሃራሬ ዴሬ ኣስ ኣጌ ና ሻማ፤ ፊሊሰጾሜቲ ሌሃን ኩሚል ሚሲራይ ዘሬቲዳ ጋዴን ኢስቲ ኢሲ ቦላ ሸቂ ዲሺን ኢሰራኤል ኦላንቻቲ ፊሊሰጾሜታ ሲንፋፊ ባቃቲዳ።

12 ሻማይ ጊዲኮ ባ ኤቂዳሶ ዩዲቤና፤ ሄ ኦላ ኤቄቲዲ ፊሊሰጾሜታ ዋጲዳስ፤ ሄ ጋላስ ጎዳይ ጊታ ጸኖ ኢሚዳስ።

13 ካፋ ሺሾ ዋዴ ፊሊሰጾሜ ኦላንቻቲ ኤራፋይሜ ዙሌን ዲንካኒ ኡቲዳሼ ሄሹ ታሙ ሃላቃታፔ ሄሻቲ ዳዊቲ ዲዛሶ ኣዲላሚ ጎንጎሎ ዪዳ።

14 ሄ ዋዴ ዳዊቲ ሚጸ ጊዶን ዳስ፤ ፊሊሰጾሜ ኦላንቻቲ ቤቴሊሄሚን ዳቲስ።

15 ዳዊቲ ላሞቲዲ፥ «ቤቴሊሄሚ ፔንጌ ኣቻን ዲዛ ኦላ ሃፋፊ ታስ ኦኔ ኤሃናይ!» ጊዳስ።

16 ሄሳ ጊሻስ ኤሬቲዳ ኦላ ቃራ ሄሻቲ ፊሊሰጾሜ ኦላንቻታ ጊዶራ ካንሊ ቢዲ ቤቴሊሄሚ ፔንጌ ኣቻን ዲዛ ሃፋ ኦላፊ ዲቂ ዳዊቲስ ኤሂዳ፤ ኢዚ ጊዲኮ ጎዳ ሲንፋን ያርሾ ሂስቲ ጉሲዳስ ኣቲን ኡዪቤና።

17 «ኣቤት ጎዳዉ! ሃይሳ ማላ ኦሶ ታ ዋስታ ኦሶ? ሃይሲ ታፔ ሃኮ! ሃይሲ ባንታ ሸምፖ ቦላ ፒርዲዳ ኣሳታ ሱል ዴኔ?» ጊዲ ዳዊቲ ኡያና ኮዪቤና፤ ሄኮ ኤሬቲዳ ሄሹ ኦላ ቃራቲ ኦሊዳ ጎባቲፋ ኦሶይ ሄሳ።

18 ጹሪያ ና ኢዮኣቤ ኢሻ ኣቢሳዬይ ሄሹ ኤሬቲዳ ኦላ ቃራታስ ሃላቃ፤ ሄሹ ጾቱ ኣሳ ቦላ ባ ቶራ ጸንጊዲ ዋጲዳኔ ሃ ሄሹ ቃራታ ማላ ኤሬቲዳ ጎባ ኣሳ።

19 ኣቢሳዬይ ሄሻታፔ ቦላራ ኬሂ ኤሬቲዳ ኣስ ጊዳኔ? ኢዚ ኢስታፊ ጊዶንታ ኣጌኮካ ኢዚ ኢስታስ ሃላቃ።

20 ሃራ ኤሬቲዳ ቃራይ ቃብጺኤል ዴሬ ኣስ ዮዳሄ ና ባናያይ ጊታ ኤሬቲዳ ኦሶ ኦሊዳስ። ኢዚካ ናሞኡ ኤሬቲዳ ሞኣቤ ኣሳታ

ዎዲዳስ፤ ቃሴካ ሻቺ ቡኪዳ ጋላስ ኦላ ጊዶ ጌሊዲ ጋሞ ዎዲዳስ።

21 ሄሳሶካ ኢሲ ጊታ ጊብጾ አስ ዎዲዳስ፤ ሄ ጊብጾ አዳዚ ባ ኩሼን ቶራ ኦይኪዳስ፤ ጊዶ አቲን ባናያይ ኢዛራ ኦሌታናስ ጉፊ ኦይኪዲ ኢዛኮ ቢዳስ፤ ጊብጾ አዳዛ ኩሼፔ ኢዛ ቶራ ዎሊ ኤኪዲ ኢዛ ቶራን ኢዛ ዎዲዳስ።

22 ዮዳሄ ና ባናያ ጎባቴሊ ሄሳ፤ ኢዚካ ኤሬቲዳ ሄሹ ቃራ አሳታ ማላ ኤሬቲዳ ጎባ አሳ።

23 ኢዚ ሄ ሄሹ ታሙ አሳታፔ አዲ ቦንቹቲዳዳ፤ ጊዶ አቲን ኤሬቲዳ ሄሹ ቃራ አሳታ ማላ ሳቤቴና። ዳዊቲ ባናያ ባ ቦንቾ ዛቤታ ቦላ ሹሚዳስ።

24 ሄ ሄሹ ታማታፔ ባጋይታ ሱንሊ ሃይሳፊ ካሊዛይሳ።

ኢዮአቤ እሻ አሳሄሌ፥

ቤቴሊሄሜ ዳሬ አስ ዶዳ

ና ኤልያኔ፥

25 ሃራሬ ዳሬ አስ ሻማሃ፥

ሃራሬ ዳሬ አስ ኤሊቃ፥

26 ፓሊጾ ዳሬ አስ ሄሌጾ፥

ቴቁሄ ዳሬ አስ ኢቆሻ

ና ኢራ፥

27 አናቶቴ ዳሬ አስ አቢኤዜሬ፥

ሁሼ ዳሬ አስ ሜቡናዬ፥

28 አሂሆሄ ዳሬ አስ ጻልሞኔ፥

ናጾፊ ዳሬ አስ ማሂራዬ፥

29 ናጾፊ ዳሬ አስ ባኣና

ና ሄሌቤ፥

ቢኒያሜ ባጋፊ ጊቢኣ ዳሬ አስ ኤሪባዬ ና ኢታዬ፥

30 ፒራቶኔ ዳሬ አስ ባናያ፥

ጋኣሼ ዙሌ አስ ሂዳዬ፥

31 አራቤ ዳሬ አስ አቢ-ኤልቦኔ፥

ባርሁሜ ዳሬ አስ አዚሞቴ፥

32 ሻልቦኔ ዳሬ አስ ኤሊያሂቤ፥

ያሹኔ ናይታ፥

ዮናታኔ፥

33 ሃራሬ ዳሬ አስ ሻማሃ ና፥

ሃራሬ ዳሬ አስ

ሻራሬ ና አሂአሜ፥

34 ማኢካቴ ዳሬ አስ

እሃሲባ ና ኤልፋሌጾ፥
 ጌሎ ዳሬ አሰ
 እክጾፌሌ ና ኤልአሜ፥
³⁵ ቃርሜሎሴ ዳሬ አሰ ሄጺሮ፥
 አራቤ ዳሬ አሰ ፓራዬ፥
³⁶ ጸባ ዳሬ አሰ
 ናታኔ ና ዪጊአሌ፥
 ጋዴ ዳሬ አሰ ባኔ፥
³⁷ አሞኔ ዳሬ አሰ ዛላቃ፥
 ጹሪያ ና ኢዮአቤስ
 ጎንዳሌ ኦይኪዛ ቢኤሮቲ
 ዳሬ አሰ ናሂራዬ፥
³⁸ ያቲሬ ዳሬ አሰ ኢራ፥
 ያቲሬ ዳሬ አሰ ጋሬቤ፥
³⁹ ሄሳሶካ ሂቲ
 ዳሬ አሰ ኦሪዮ፥
 ኢስቲ ኢሲ ቦላ ሄዡ
 ታማኔ ላፑና።

24

ዳዊቲ ኦላ አሳ ቆዲዳ ቆዶ
 (1ተሪ 21:1-27)

¹ ቃሴካ ጎዳይ ኢስራኤሌ አሳ ቦላ ከሂ ሃንቄቲዳስ፤ ኢስታ ቦላ ዳዊቲ ዳንፌሊዲ፥ «ባ! ኢስራኤሌ አሳኔ ዩሁዳ አሳ ቆዳ!» ጌዴስ።

² ሄሳ ጊሻስ ካዎዚ ኢዮአቤኔ ኢዛራ ዲዛ ኦላ አሳ አዛዚዛይታ፥ «ዳኔፔ ቢዲ ቤርሳቤሂ ጋካናስ ዲዛ ኢስራኤሌ ቆዋታ ኡባታኮ ቢቲ፤ ኢስታ ቆዳይ አይ ከና ጊዲዳኮ ኑ ኤራና ማላ ኦላ አሳታ ማዘጋቢቲ» ጌዴስ።

³ ኢዮአቤይ ካዎዛስ፥ «ጎዳ ኔ ጸሳይ ኦላ አሳ ጾቱ ኩሼ ዳሪሶ፤ ታ ጎዳ ካዎ አይፌይ ሄሳ ጋኪ ቤዮ፤ ጊዶ አቲን ታ ጎዳ ካዎይ ሄሳሶ ኦላናስ አይስ ኮዪዴ?» ጌዴስ።

⁴ ጊዲኮካ ካዎዛ ቃላይ ኢዮአቤኔ ኦላ አሳ አዛዚዛይታ ጸኒዳ ጊሻስ ኢስራኤሌ ኦላ አሳ ማዘጋባናስ ኢዛ ሲንላፌ ከዚ ቢዳ።

⁵ ኢስቲ ዮርዳኖሴ ሻፋ ፒኒዳፔ ጉዬ ሾባዛ ጊዶን ዲዛ ካታማፔ ዱጌሃ ባጋራ ዲዛ አሮኤሬ ማታን ዱንካኒዳ፤ ሄፕካ ጋዴ ባጋራ አፂ ኢያዜሬ ቢዳ።

6 ሄፔ ጋላኣዴኔ ሂቴ ዳሬን ዲዛ ቃዴሴ ኣሳኮ ቢዳ፤ ቃሴ ዳኒ-ጃኔራ ዩዩዲ ሲዶና ቢዳ።

7 ቃሴ ጸርሴ ሚጸ፥ ሂዌታ ካታማታኔ ካናኔታ ካታማታ፥ ዉርሴላን ዩሁዳፔ ዲጌሃ ባጋራ ዲዛ ቤርሳቤሄ ቢዳ።

8 ቢታዮ ኡዲፋን ኣገናኔ ናሞኡ ታሙ ጋላሰ ኡባ ዩዩ ጸሊዳፔ ጉዬ ዩሩሳላሚ ሲሚዳ።

9 ኢዮኣቤይ ኦላ ኣሳ ቆዳ ኡባ ካዋዛ ኤሪሲዴሰ፤ ኢሰራኤሌን 800,000 ዩሁዳን 500,000 ማሻ ሾዲ ኦሌታና ዳንዳይዛቴ ቤተዳ።

10 ዳዊቲ ኦላንቻታ ቆዲዳፔ ጉዬ ባ ዋዚናራ ሞጼቲዲ፥ «ታ ጌታ ናጋራ ኦላዲሰ፤ ሃኢካ ጎዳዉ! ታና ኔ ኣይሌዛ ኔ ማራና ማላ ታ ኔና ዋሳይሰ፤ ሃኢካ ጎዳዉ ታኒ ኔ ኣይሌይ ጌታ ባላ ኦሶ ኦሊዳ ጌሻሰ ማራርኪ?» ጌዴሰ።

11 ዋንቴላ ጋላሰ ዳዊቲ ዴንዳናፔ ሲንላን ጎዳ ቃላይ ዳዊቲሰ ኣጁታ ዮቲዛ ናቤይ ጋዴኮ ዩዲ፥

12 «ባዳ ዳዊቲሰ፥ ጎዳይ ኔና ኢሰታፌ ኢሲኒዮ ዶራና ማላ ሄሹ ዮኦታ ሺሻዲሰ፤ ታ ኔ ቦላ ኦላና ማላ ኢሲኒዮ ዶራ» ጌዴሰ።

13 ጋዴይ ዳዊቲሰ ቢዳ፥ «ኔ ቢታ ቦላ ሄሹ ላይላ ኮሻይ ዮ ጋይ? ዋይኮ ኔ ሞርኬቲ ኔና ሄሹ ኣገና ጋካናሰ ጎዳን ባቃታና ኮያይ? ዋይኮ ኔ ቢታ ቦላ ሄሹ ጋላሰ ኩሚል ኢታ ሃርጌይ ዮ ጋይ? ሄሳ ጌሻሰ ታና ኪቲዳይሳሰ ታ ኣይ ዛር ኢማናኮ ቆፓ» ጌዴሰ።

14 ዳዊቲ ጋዴሰ፥ «ታኒ ኬሃ ጨጫዲሰ፤ ኢዛ ማርቴላይ ጌታ ጌዲዳ ጌሻሰ ጎዳ ኩሼን ኦ ኩንዳና ኣቲን ታ ኣሳ ኩሼን ኩንዲኬ» ጌዴሰ።

15 ሄሳ ጌሻሰ ጎዳይ ሄ ጋላሳ ማላዶፔ ዶሚዲ ባ ባሪዳ ጋላሰ ጋካናሰ ኢሰራኤሌ ቦላ ኢታ ሃርጌ ዩዲዴሰ፤ ሄሳ ጋሶን ዳኔፔ ቢዲ ቤርሳቤሄ ጋካናሰ 70,000 ኣሲ ዉሪዴሰ።

16 ጎዳ ኪታንቻይ ዩሩሳላሚ ዲፒ ሂስቲዲ ጳይሳናሰ ባ ኩሼ ዩዲን ኣሳ ቦላ ጋኪዳ ቆሆይ ጎዳ ቃጼሊዴሰ፤ ሂስቲን ዴሬዛ ዉርሲዛ ኪታንቻዛ፥ «ጌዳና! ኣጋ!» ጌዴሰ። ሄ ዋዴ ጎዳ ኪታንቻይ ያቡሴ ዴሬ ኣሰ ኦርና ባሌ ኣቻን ኤቂ ዴሰ።

17 ዳዊቲ ዴሬዛ ቦላ ቦሻ ጋሊዛ ኪታንቻዛ ቤኢዲ ጎዴሰ፥ «ናጋራ ኦሊዳይ ታና፥ ባሊቲዳይ ታና፤ ሃይቲ ጌዲኮ ዶርሳታ፤ ኢስቲ ኣይ ሞሪዶ? ኔ ኩሼይ ታ ቦላኔ ታ ኬላ ቦላ ጌዶ» ጌዴሰ።

ዳዊት ገግሲዳ ያርሺዛሶ

18 ሄ ጋላስ ጋዴይ ዳዊትኮ ቢዲ፥ «ፑዴ ያቡሴ ዳሬ ኣስ ኦርና ባሌ ኬዛዳ ጎዳስ ያርሾ ያርሻናሶ ገገሳ» ገዴስ።

19 ሄሳ ገሻስ ዳዊት ጎዳይ ጋዴ ባጋራ ኢዛስ ኣዛዚዳ ማላ ኬዚዴስ።

20 ኦርናይ ዲጌ ሲሚ ጽሊሽን ካዎዚኔ ኢዛ ዴሬዚ ባኮ ዪዛይሳ ቤኢዴስ፤ ኢዚ ካሬ ኬዚዲ ኢዛስ ቢታ ቦላ ሆኪ ዘገዴስ።

21 ኦርናይካ፥ «ካዎ! ታ ጎዳፌ ታኮ ኢንቴ ኣይሌዛኮ ኣይስ ዪዴቲ?» ገዴስ።

ዳዊት ዛሪዲ፥ «ዴራ ቦላ ያና ቦሻይ ሲማና ማላ ጎዳስ ያርሾ ያርሺዛሶ ገገሳናስ ኔ ባሌዛ ሻማና ያዲስ» ገዴስ።

22 ኦርናይካ ዳዊትስ፥ «ካዎይ! ታ ጎዳይ ባና ሎኢዳይሳ ኤኪዲ ያርሾ ሽሾ፤ ጽጌቲዛ ያርሾስ ቦራቲ ዴቲስ፤ ኤሶ ሚላስ ካል ቡኪዛ ሎዳኔ ቦራ ቃምባራይ ዴስ።

23 ካዎ! ታኒ ኦርናይ ሃይሳ ኡባ ካዎስ ኢማይስ» ገዴስ፤ ቃሴካ ኦርናይ፥ «ጎዳ ኔ ጸሳይ ኔኮ ጽሎ» ገዴስ።

24 ካዎዚ ገዲኮ ኦርናስ፥ «ሄሳሉ ሃኖፖ፤ ዋጋዛ ታ ኔስ ቃንጻና ቤሴስ። ጎዳ ታ ጸሳስ ሚሼ ቃንጸንታ ያርሾ ሺሺኬ» ገዴስ።

ሄሳ ገሻስ ዳዊት ባሌዛኔ ቦራታ 50 ሳቂሌን ሻሚዴስ።

25 ሄን ዳዊት ያርሾ ያርሺዛሶ ገገሲዴስ፤ ጽጌቲዛ ያርሾኔ ኢሲፌቴፋ ያርሾ ያርሺዴስ፤ ሄሳፌ ጉዬ ጎዳይ ቢታይ ገሻስ ሺቂዳ ዎሳ ሲዪዴስ። ኢሰራኤሌ ቦላ ዪዳ ቦሻዚ ሲሚዴስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b